



# **TUSI FAITAU ASO**

**KUATA 4**

**Oketopa - Tesema 2023**

EKALESIA FAAPOTOPOTOGA KERISIANO I AMERIKA SAMOA

(1) FALETUSI O TUSITUSIGA PAIA – BIBLICAL LIBRARY

**Faamatalaga** (*Narrative*)

**Aso Sā – Oketopa 1: “Tulu’iga o le lalolagi”** (*To the ends of the earth*)

**Tusi Faitau – Galuega 1:1-11**

**Matua – ff. 6-8:** “*Ua potopoto i latou, ona latou fesili ai lea ia te ia, ua faapea mai, Le Alii e, o ona po nei ea e te toe fuatai mai ai le malo ia Isaraelu? A ua fetalai atu o ia ia te i latou, E le tusa ona o outou iloa o ona po ma ona tausaga, ua tuu e le Tama i lana lava pule. A e peita’i, o le a maua e outou le mana, pe a afio ifo le Agaga Paia i luga ia te outou.*”

O lenei vaiaso atoa o le a tatou vaavaai ai i le auala eseese e mafai ona tatou faitau manino ai i **Faamatalaga** (*Narrative*) o le Tusi Paia. E tatou te amata atu foi i lenei Aso Sā i se tasi vaega tāua tele o loo taoto i le va o le Evagelia a Luka ma le Ekalesia fou o loo faamatalaina i le tusi o Galuega. O le tatou galuega muamua pe a faitau i faamatalaga poo *narratives*, o le tatou fesili atu lea, “O ai? (*who?*)” “O fea?” (*where?*).

O loo manino upu o le tusitala o Galuega, o le au soo o loo faatasi pea ma Iesu ae le’i afio a’e o ia i le lagi. Ioe! O le au soo lava lea sa faafetaia’i ma le soifua tulaga ese o Iesu sa ia galue ai i totonu o sa Iutā. Le au soo sa latou tofo ai foi i le maliu tigā o Iesu ma toe faate’ia ai i lona toetū mai. Ua latou iai nei la ma le Iesu toetū i totonu o Ierusalemā—*the center of the Jewish world*. O le a tuua nei e Iesu la latou mafutaga, a o talalelei o le faaolataga a le Atua ua tuuina i aao o le au soo, i le ma le faatasi mai o le Agaga Paia, se’ia soo ai “tulu’iga o le lalolagi”.

**Tatalo:** Le Alii e, fesoasoani mai ina ia o matou malamalama i lau talalelei, matou te faamoemoe i le faaagaina o matou ola i ou fe’au, **Amene**.

**Aso Gafua – Oketopa 2: “Taofi tutū i ona ala”** (*Stopped in his tracks*)

**Tusi Faitau – Galuega 10:9-47**

**Matua – ff. 15-16:** “*Ua foi faalua mai le siufofoga ia te ia, ‘O mea ua faamamāina e le Atua, aua e te ta’ua e sa.’ Ua fai faatolu mai lenei mea; ona toe avae lea o le mea i le lagi.*”

E tatou te amata atu i lenei aso i le fetalaiga a Iesu o loo logo ai pea o tatou taliga: ‘Ia fai outou ma molimau ia te a’u ia Ierusalemā, o Iutaia uma ma Samaria, seia oo atu lava i tuluiga o le lalolagi’. A o tatou faitau i le tala, e ao ona tatou toe fesili e uiga i “tagata”, “nofoaga” ma le “auivi” o le tala, ma se’i tatou vaai poo le a se mea o loo ta’u mai ia te i tatou.

O ‘Peteru le Papa/Maa’ o se tagata toa nai loo le Peteru na faafiti ia Iesu. Ua ia vaaia i le to’atele sa faamaloloina ma le toaafē ua liliuina ia Iesu. Ua ia faafitia le ‘au Saniterini malolosi ma ua ia faatumuina Ierusalemā i le talalelei. O le tusi faitau o lenei aso fai mai o loo iai Peteru i Kopa, o se taulaga e tu lata

i le sami. Ua soo atoa Iutaia i ona faiga malaga ma o lenei ua tuvae o ia i tuaoi o Samaria; e ui lea ua tatau foi ona taofi tutū o ia i ona ala. Ua faailoa mai e le tusitala o Galuega, e iai le faafitauli ia Peteru o loo mana’o le Atua e faatonutonu ma faasa’o, ina ia mafai ai e Peteru ona faaaauu lana galuega. O se faafitauli ua tatau ona ati ma le aa, ina ia mafai ai foi e le talalelei ona faaaauu. Ua tatau ia Peteru ona ia taliaina soo se ituaiga tagata, pe Iutaia pe Nuuese foi. O le faaaliga lea a le Atua na faaali ia Peteru i Kopa. Ina ia mafai ai e Peteru ona ia taliaina Konelio e fai ma soo o le talalelei.

**Tatalo:** Le Alii e, ia fai a’u ma tagata e tali atu i lu’itau o le ola, ma ia avea au ma se na te talepeina i lalo pa puipui e taofia ai le talalelei, **Amene.**

### **Aso Lua – Oke 3: “E galue le Atua i tuluiga uma”**

**Tusi Faitau – Galuega 11:1-30** (*God at work on the edges*)

**Matua – ff. 17-18:** “*O lenei, afai ua tusa le alofa o le Atua i a’i tatou atoa ma i latou i le faatuatua, o ai a’u ou te vavao atu ai i le Atua? Ua latou faalogo mai i ia upu, ona latou faalologo lea, ua vivii atu foi i le Atua, ma faapea ane, E moni, ua foa’i atu e le Atua i nuu ese le salamo e ola ai.*”

O le faitauga o lenei aso ua o tatou iloa ai ni ata se lua o loo i totonu o le tala, O nei ata e lua o loo faailoa mai ai mea o loo galue ai le Atua. Muamua, o le Atua e galue i totonu o Ierusalem. O le ata o le Atua e na te lē tuulafoa’iina ona tagata. Lona lua, o le Atua e galue i tuluiga uma. Ua aumai ai se ata o le Atua e faasalafa lona alofa i soo se tagata. O loo ua toe ta’ua foi Peteru, i lona molimauiina o galuega a le Atua i totonu o Ierusalem, ma faailoa atu i tagata o Nuuese, e galue foi le Atua i tulu’iga uma o le lalolagi.

O loo aumai ai se ata manino, e tāua tagata uma i le Atua. Ua le faapito le alofa o le Atua ia Isaraelu, ae ua faasalafa atu i tagata uma o Nuuese. Sa le lagona e tagata o Nuuese le tāua o le talalelei, ae ina ua latou faalogo i le atoatoa o le talalelei, ua mafai ai ona tuuina atu atoatoa o latou tagata mo Iesu ma lana faaolataga.

**Tatalo:** Le Alii e, fesoasoani mai ina ia mafai ona avea a’u ma tagata e fiafia e faalogologo i tala o le faaolataga. **Amene.**

### **Aso Lulu – Oke 4: “O le tala tele: aumaiga o le faaolataga i le lalolagi”**

**Tusi Faitau – Galu 13:13-52** (*The big story: bringing salvation to the earth*)

**Matua – f. 47:** “*Auā ua faapea ona poloai mai o le Alii ia te i matou, Ua ou todia oe e fai ma malamalama o nuu ese, ina ia avea oe ma faaolataga e oo i tulu’iga o le lalolagi.*”

I le Galuega 13 o loo tatou faatasi ai ma Paulo i Pisitia Anetioka, e silia ma le 800 kilomita le mamao ese mai le mea na tatou amata mai ai i le Aso Sā. Ua tatou mamao ese mai Ierusalem! Atonu e te manatua le faamatalaga a Paulo ia Filipi 3:5 – “*o le Eperu o Eperu*”. O lea foi, o Paulo ua faapei o se Ierusalem e fai ona vae—*Jerusalem on wheels!* Peiseai ua ava’e e le Atua le ogatotonu ma ave i le pito i fafo—*taking the center out to the edges.*

I le faamatalaga o le tala, o le nofoaga muamua na o iai Paulo ma Panapa, na la'ua o lava i le au Iutaia. Ma o lea na tu atu ai lava o Paulo i totonu o le sunako, ma na ia faia ai le mea e tatau foi ona tatou faia pe a tatou faitau i faamatalaga o le Tusi Paia – o le ava'e lea o tala ia Iesu ma lalaga ai faatasi ma talafaasolopito atoa o Isaraelu. Ua ia lalagaina Iesu faatasi ma tala lauiloa ia Mose le perofeta laveai, ma Tavita le tupu mamalu, ma na ia fa'aalia ai foi o Iesu o se vaega o le tala lava e tasi, ae peita'i e sili atu nai lo i la'ua uma. Ae ina ua teena o ia e tagata Iutaia, ona faasaga atu ai lea o ia i tagata o Nuuese. Atonu e foliga mai ua eseese ia mau talaaga, pe foliga mai foi ua toe amata se tala fou a le Atua. Peita'i o Luka na mana'oina ia tatou manino, o le talalelei-mo-Nuuese o le tala lava lea e tasi ma tala ia Isaraelu.

**Tatalo:** Le Alii e, fesoasoani mai ia ou iloa lou tala atoa i le aumaia o le faaolataga i lenei lalolagi, **Amene.**

**Aso Tofi – Oketopa 5: “O fea na tatou vaai muamua i lenei mea?”**

**Tusi Faitau – Galuega 15:1-29** (*Where have we seen this before?*)

**Matua – ff. 9, 11:** “*Ua na le faaeseeseina foi o i tatou ma i latou i lona faamamāina o o latou loto i le faatuatua ... A e peitai ua tatou taofi, o le alofa tunoa o le Alii o Iesu Keriso e faaolaina ai i tatou, faapei o i latou lava.*”

O lenei aso, ua tatou toe foi mai lava i le mea sa tatou amata ai. O le tele o galuega o le 'au aposetolo i totonu o le tusi o Galuega, o loo ai galulue i nofoaga e aupito i fafo, ae le aveesea ai le tāua o le ogatotonu – o le nofoaga lea e alu ai Paulo e faamautinoa ai ona aoaoga. Ua foliga mai o loo iai nisi ua aoaoina le faaperitomeina o le 'au faatuatua o Nuuese. Lona uiga, e tatau ona avea i latou ma faa-Iutaia ina ia faaolaina. Peita'i i le vaaiga lautele i le tala atoa o le faaolataga a le Atua, o le mea tausui lenei mea mo Nuuese, ma o le a faapeaina ai foi ma le talalelei. O Paulo, le Iutaia faamisiona mo Nuuese, ua ootia lava lona manatu ma ua toe foi mamao ai lava i Ierusalem e talatalanoa ma i latou ua taualoa o latou manatu i lea faiga.

O le fesili mo lenei aso, “**O fea na tatou vaai muamua i lenei mea**” (*Where have we seen this before?*). Afai tatou toe susu'e i tua i le Evagelia a Luka, ua uma ona faailoa mai e Luka, o uiga ia o le 'au Faresaio – o e ua faatāuaina o ia lava e ala i le 'faia o le mea tonu', o e inoino ia'i latou o loo tauivi, ma ē o loo faamamafaina avega tagata ae mumusu e fesoasoani iai. O le lu'itau o lenei tala, e pei ona iloa ma tatou silafia, e le faailogalanu le Atua. O le alofa atu ua sili lea ona tāua nai loo le faafiaamiotonu; o le valaaulia i totonu e sili atu ona tāua nai loo le leoleoina o le faitoto'a; ma o le faia o le mea tonu e sili atu ona tāua nai loo le fia vaaia o faia le mea tonu.

**Tatalo:** Le Alii e, fesoasoani mai ina ia aua ne'i avea mea ua ou faatauaina e fai ma pa pupuni e oo atu ai le talalelei i e moomia. **Amene.**

**Aso Faraile – Oketopa 6: “Toilalo i faosoosoga”** (*Bowing to pressure*)

**Tusi Faitau – Kalatia 2:1-14**

**Matua – f. 11-12:** “A ua alu Kefa i Anetioka, ona ou matua finau atu lea ia te ia i ona luma, aua ua iloga lona sese. Aua a o le’i o mai nisi mai ia Iakopo, ua ‘aai faatasi o ia ma tagata ese, a ua latou oo mai, ona ‘alo lea o ia, ma vavae ese lea o ia aua ua fefe i le au peritomeina.”

O le faasalalauina o le talalelei, pei ona faaautū ai lenei vaiaso atoa, ua toe “faasoosoina”. Peita’i o lenei aso, ua tula’i mai se feteena’iga o le galuega i le va o ni leotetele e lua – o Paulo ma Peteru (Kefa). O i la’ua nei e la te alolofa uma ia Iesu, la te naunau uma foi e ave le talalelei i tulu’iga o le lalolagi, ma ua uma foi ona faaali i ai le Atua ia te i la’ua ina ia tala’i le talalelei i Iutaia, atoa ai ma Nuuese. Ae e ui lea, o Peteru ua faasoosoina ona o si’uleo a nisi o ē tamau i tu ma faiga masani faalutaia. I le avea ai ma soo o Iesu, e iai pea si’uleo e finafinau i mea sa sau’i. O le tala o lenei aso, o Peteru ua foliga mai ua amata ona “**toilalo i faasoosoga**” o le galuega.

Ia tatou ne’i avea si’uleo o le galuega ma mea tatou te lafoa’i ai le faia o le mea tonu i le galuega a le Atua. E ui la i vaivaiga faaetagata sa toilalo ai Peteru, o le mea tāua o le toe taumafai ina ia faamalosi e faia le amiotonu ma aga’i pea i luma le tala’iina o le fe’au o le talalelei.

**Tatalo:** Le Alii e, fesoasoani ina ia mafai ona pulea lo’u loto ma alofa ia aua ne’i avea vaivaiga ma faaletonu o le galuega e taofia ai mea tonu, **Amene.**

**Aso Toona’i – Oketopa 7: “Tepa i tua ma taga’i i luma”**

**Tusi Faitau – 2 Peteru 3:1-16** (*Looking back and looking forward*)

**Matua – f. 15:** “Ia outou manatu o le onosai o lo tatou Alii o le faaolataga lea; faapei ona tusi atu ia te outou e Paulo lo tatou uso pele, e tusa ma le poto ua foaiina atu ia te ia.”

A o tatou savalia le savaliga umi o lenei tausaga, e lelei foi pe afai tatou te mapuane ma nofo i lalo, ma se’i toe tepa i tua ma faasolo o tatou manatu i le mamao o le ala ua ‘aumaia ai e le Alii i tatou. E foliga mai e tau faapena foi se lagona o loo faia e tatou tusitala o lenei aso. O Peteru ua toe tepa i tua i upu a le perofeta ia Isaraelu, ua toe taga’i i le soifua a Keriso ma ona a’oa’oga i le au aposetolo, ma ua ia iloa ai o mea uma ia o le vaega o le tala atoa a le Atua mo lona faaolataga i le lalolagi. A o se tala foi e le’i oo atu i lona taunuuga.

O le tusi atu la o Peteru i aulotu ma le au faitau, ma i tatou uma lava, ina ia tatou lavapapale pea, ma lava le onosa’i, ma ia ola filemu, i le faagasolo pea o lea lava tala, o le a maua ai foi ma le tatou avanoa, e tatou te tauina ai lea lava tala o loo faaauauina pea.

**Tatalo:** Le Alii e, a o matou faalogo i le tala i lou lava afio, tala o le ola, tala i mea o loo e faia ma o loo faia pea, ia ave i matou o se vaega o lea lava tala. **Amene.**

## UA TASI UMA IA KERISO – ALL ONE IN CHRIST

**Aso Sā – Oke 8: “Faamanuiaga mo tatou uma mai le foafoaga a le Atua”**

**Tusi Faitau – Kenese 1:26-28** (*Blessings to all of us through God’s creation*)

**Matua – f. 28:** *“Ua faamanuia foi e le Atua ia te i laua, ma ua fetalai atu le Atua ia te i laua, Ia fanafanau ia, ma ia uluola, ma ia tumu ai le lalolagi, ia faatoilalo i ai, ma ia pule i i’a i le sami, ma manu felelei, atoa ma mea ola uma e fetolofi i le elelee.”*

O le aso lenei na e lagona ai i lou tino le pa’i mai o le agaga o le Atua. O le aso sa atofaina mo a tatou fanau, o le aso ua o tatou vaaia ai le susulu matagofie mai o le La. O aso o timuga ma aso faapogisa, ua tuana’i atu lea, o le aso ua tatau ona ta’ua o le aso ua faaoloaina ai. A o se aso foi ua tatou molimauina ai le auai mai o le Atua i ona tagata. A o tatou vaaia le lanulauava o atu mauga ma togā laau, o le faailoa foi lea o galuega mamana a le Atua. E faigofie ona tatou talanoa i le auai mai o le Atua.

O le faia foi e le Atua o manu ma meaola fetolofi, e tofua a le meaola ma lona uiga ma lona aoga; o manu felelei, ma i’a, a’o ta’ifau ma pusi, e ese foi o latou aogā. E i ai a le aoga o meaola uma faapea ma meaola ninii i le faasologa o le “upega o le ola” (*web of life*) i lenei si’osi’omaga ua fai lava mo i tatou. O mea uma lava na faia i le mataisau o le Atua, ne’i e manatu e leai se aoga, ae o loo fesooota’i mea uma o le foafoaga ma faatumauina ai pea le ola.

**Tatalo:** Le Atua le ola, faafetai mo le lalolagi ua e aumaia; fesoasoani ina ia matou iloa ma vaaia au faamanuiaga ua i a’i o matou lima. **Amene.**

**Aso Gafua – Oke 9: “O upu mai le Atua mo oe, ma a’u, ma tatou uma”**

**Tusi Faitau – Sal 139:13-16** (*Words from God to you, and me, and everyone*)

**Matua – f. 14:** *“Ou te vivii atu ia te oe, aua na faia a’u e ala ai ona matautia ma ofo tele ai; o mea na e faia, o mea mamana ia, ua ou matua iloa e a’u nei mea.”*

O lea faato’a mou malie atu le vaitau o le faama’i Koviti -19, sa feagai ai le atunuu ma le lalolagi atoa ma le tele o mea e saisaitia ai le ola, le ola sa masani ai, le aiga, galuega, ma soo se mea lava, ua le tutusa e pei ona masani ai. Ua foliga mai ua suia uma e le faama’i le gasologa o le olaga sa masani ai, o totonu o aiga, ua saisaitia i totonu o fale, ma ua le mafai ona feoai i mea e fia o i ai, totonu foi o gaaluega, ua leai se usu mai ma feiloai ma le aufaigaluega, fonotaga sa masani ai, ua leai. O lagona la ua oo ma ii le tagata i nei mea uma, ua le mautonu ai le mafaufau, ma ua tau faavaivai ai. E iai foi nai faamanuiaga na maua i le faama’i, e pei o tupe ma mea ’ai, ma isi mea, ae le mafai ai ona fo’ia le mafatiaga ua oo mai i le tagata. O nei lagona ma mafatiaga uma, ua fiu a e saili se fofo, ae ua leai se faamoemoe.

I le tele o nei mau mea ua oo i le atunuu ona o lenei faama’i mata’utia. Ae Talofa e i le Atunuu ma le lalolagi atoa, o lea ua tuuina mai upu mo’i tatou, upu mai le afioga a le Atua, upu e maua ai le mafanafana, maua ai foi le malosi e faaaauai ai i le ola o loo i ai. Fai mai upu, aua ua fai a’u e ala ai ona mata’utia ma ofo tele ai, ioe, o le faia o i tatou e le Atua, ua faaalua ai i a’i tatou le mata’utia o le Atua, a’o le ofoofogia o galuega a le Atua, ioe, e aumai le mafanafana ma le filemu i le tagata i taimi faigata ma le le mautonu..

**Tatalo:** Le Alii e, ua e saili mai ia te a'u ma ua e silafia a'u, faalatalata mai i taimi o afa ma matagi malolosi ina ia faaolaina ai a'u, **Amene.**

**Aso Lua – Oketopa 10: “O le fafine Samaria ma o tatou tagata moni”**

**Tusi Faitau – Ioane 4:1-14** (*The Samaritan woman and our true colors*)

**Matua – ff. 13-14:** *“Ua tali atu Iesu ia te ia, ‘O lē inu i lenei vai e toe fia inu ia. A o sē inu i le vai ou te avatu ia te ia, e le toe fia inu lava ia; a o le vai ou te avatu ia te ia, e avea i totonu ia te ia o le vaipuna, e puna i luga i le ola faavavau.”*

O le talanoaga a Iesu ma le fafine Samaria, o le tasi lea o talanoaga umi a Iesu ma soo se tagata i totonu o le Tusi Paia. E ui le umi, a o le tele o le faatāua sa ave i nai isi fuaiupu, faapei o tane ma tamaloloa sa ia alu ai. O le ona to'alua e 5 o loo ta'ua i le tusi faitau e mafai foi ona faaliliuina o ni alii e 5, auā o tagata Samaria e tapua'i i atua e 5. Poo le a lava le mea tatou te manatu ai i lenei tala aemaise o lenei fafine Samaria ma ona tane e 5, o le mea moni ua tatou faailogaina o ia e tusa ai ma mea o loo vaaia i le papa'u – o le faailoga lanu ma le faamasinoina o tagata i o tatou itu faaletino.

O Iesu na saofa'i i lalo ma sa ia faafeiloai lenei fafine i lona tagata moni. Sa la'ua talanoa e uiga i le faatuatua, ma e tele foi vaega loloto o lo la'ua talanoaga, peiseai ua loloto atu i le vaieli lava ia. Afai tatou te faapei o Iesu ma taumafai ina ia tatou faitau lelei i le fafine Samaria, atonu e faamanatuina o tatou lava tagata ma le alofa mai o le Atua i o tatou lava olaga. Atonu o le a faapeaina foi la tatou vaai i isi tagata e aunoa ma se faailoga lanu.

**Tatalo:** Le Atua o le ola, fesoasoani mai ina ia atagia o matou tagata moni, ma ia matou vaaia ai foi i nisi o ou tagata e matou te feiloa'i, **Amene.**

**Aso Lulu – Oketopa 11: “O le alofa o le Atua mo i tatou uma”**

**Tusi Faitau – Galuega 17:14-28** (*God's love for all of us*)

**Matua – ff. 27-28:** *“Ina ia latou saili i le Alii, pe mafai ona latou tautāgotago ma latou iloa o ia; a e peitai e le mamao o ia ma i tatou taitoatasi. Auā o ia o loo ola ai i tatou, ma gaoiōi ai, o loo i ai foi i tatou ona o ia; pei ona fai mai foi e isi o outou fatu pese, Auā o lana fanau i tatou.”*

E le mafai ona tatou mauaina se tali ona o mea tigā pe afai e ta'ita'iina i tatou e le ti'apolo e fesiligia le Atua. O loo tatou faalogo pea, o le Atua e faatasi ma i tatou uma taitoatasi. Auā na faia e le Atua i tatou uma, ma e iai foi o ia ma i tatou uma. O le manatu o loo iai le Atua i soo se mea, o le a lē aveesea ai mea tigā o le olaga. O le mea moni, o lenei lalolagi e leai sona atoatoa; ma e le mafai foi ona aveesea le lagona faaletagata, o le Atua ua mamao ese i nisi o taimi. Afai tatou te fetai'a'i ma taimi e sili ona nutimomoia ai o tatou tagata, o le faamantu o le tusi faitau o lenei aso, “o le alofa o le Atua e mo i tatou uma”. Lona alofa lea na faasatauro ai le Atua i luga o le laau, ma ia tatalaina ona aao ma valaauina i tatou ma ia. O le alofa le na o le Atua e na te tuulafoa'i ai lana fanau, ae o loo tigā faatasi ma i tatou uma.

Ioe, tatou te le maua se tali o se fesili e ala mai i auala faati'apolo, aua o le galuega lava lea a le ti'apolo o le faalega o mea ua lelei i le suafa o le Alii. "E le mamao o ia ma i tatou taitoatasi. Auā o ia o loo ola ai i tatou, ma gaoioi ai, o loo i ai foi i tatou ona o ia; pei ona fai mai foi e isi o outou fatu pese, Auā o lana fanau i tatou."

**Tatalo:** Le Atua o le Ola, e matou te faafetaia lau Afio i lou fetalai mai i auala eseese, ma taimi eseese; ia viia lau Afio ona o lou faatasi mai, **Amene.**

**Aso Tofi – Oketopa 12: "Le Atua o mea uma mo tagata uma"**

**Tusi Faitau – 1 Korinito 9:19-23** (*God as all things to all people*)

**Matua – ff. 22-23:** "*Ua ou faapei o sē vaivai i e ua vaivai, ina ia ou maua e ua vaivai; ua ave a'u ma mea uma mo tagata uma, ina ia iu lava ina ola nisi ia te au. Ou te faia foi le mea nei ona o le tala lelei, ina ia ou auai i ona faamanuiaga.*"

Faamatalaina e le tusi tala se tasi o aoga, sa ia vaaia ai se tamaititi sa tutu i totonu o le potu a'oga a'o taaalo uma tamaiti i fafo, o loo ua matauina e le tusitala poo le a se mea o loo faapea ai le tamaitiiti, manatu le tusitala e i ai le mea le e faapea ai le tamaitiiti lea, ona savali lea i ai o le alii tusiyala lea ma fesili i le tamaitiiti pe e i ai se mea o tupu ua le alu ai i fafo i taaloga a tamaiti, e le tautala le tamaitiiti, ae faasino lona lima i lona *jacket* e le mafai e ia ona faamaulu, ona faamaulu lea e le tusitala le *jacket* a le tamaititi, ua uma ona faamaulu, ona alu lea i le atoa i fafo ma taalo i tamaiti.

O le fesoasoani o loo moomia ae lemafai ona faaleo mai, o ina tatou te tuuina atu ai le fesoasoni o loo moomia e lea tagata. O le Atua o le Atua e alofa i le tagata, e le faapito le alofa o le Atua, ae alofa i soo se tagata, e le mafai ona tali mai le Atua i le isi tagata ae le tali i le isi tagata, e tutusa le alofa o le Atua mo tagata uma. E silafia e le Atua le taimi sa'o e moomia ai e le tagata le fesoasoani. Pei ona fai mai le Aposetolo, e ave ma tuuina atu lona tagata, ina ia ia maua mai ai le tagata. E le ona o le tau faalata, ae ia malamalama muamu le tagata i ona laasaga o le a ia uia. O le Atua o le Atua e alofa, ma e e alofa le Atua i tagata uma lava.

**Tatalo:** Le Atua o le Ola, Faafetai ona o lau fetalaiga i a'i matou i auala eseese, taimi eseese, **Amene.**

**Aso Faraile – Oke 13: "E eseese uma, peita'i ua tasi ia Keriso Iesu"**

**Tusi Faitau – Kalatia 3:26-29** (*All unique, but also one in Christ Jesus*)

**Matua – f. 28:** "*E le o i ai se Iutaia po se Eleni, e le o i ai se tane po o se fafine; auā ua tasi lava outou uma ia Keriso Iesu.*"

"Ua tasi lava i tatou uma ia Keriso Iesu." Lona uiga, ua auai i tatou uma i le aiga a Keriso. E ese ma lo'u fiafia i upu ia a Kalatia, auā o loo tau aofa'i ai o tagata uma i le aiga a Keriso Iesu. A o se fesili, E auai faapefea? E tatau ea ona suia i tatou ina ia auai ma faatasi ai tagata uma ia Keriso?

O le o manino se upu a le Aposetolo ia Kalatia i le tatau ai ona tatou suia. E pau le mea ua manino, o "lou faatuatua". O le Atua e tapu'eina i tatou ma o



tatou tagata atoa, ma e na te valaauina foi i tatou i o tatou lava tagata moni; auā afai tatou te faatuatua i le na mea ma talitonu iai, ua auai lava i tatou iai. E le faapei o se faitotoa e tapuni pe tatala foi, e valaauina lava i tatou ia te ia. O lana valaau foi o le valaaulia ina ia tatou o mai ma auai faatasi ma ia e ala i le faatuatua ia Keriso.

**Tatalo:** Le Atua o le ola, faafetai ona o lou valaauina i matou i le aiga a Keriso; fesoasoani mai ina ia maotu taofi mau i le faatuatua ia Keriso, **Amene.**

**Aso Toona’i – Oketopa 14: “O ituaiga ma atunuu taitasi ua faatasia”**

**Tusi Faitau – Faaaliga 7:9-12** (*Every tribe and nation together as one*)

**Matua – f. 9:** *“Ua mavae atu ia mea, ona ou iloa lea, faauta foi i le motu o tagata e toatele mai atu nuu uma, ma aiga, ma nuu, ma gagana eseese, e le ma faitaulia e se tasi, o loo tutū i latou i luma o le nofoālii ma luma o le Tamai Mamoe, ua oofu i latou i ofu sisina, ua i ai foi lau pama i o latou lima.”*

O ni upu matagofie le tatou matua o lenei aso, aemaise lava pe afai tatou aveva ma ata o se lumana’i o le a oo mai. O tagata mai i soo se itu o le lalolagi, e talanoa i gagana eseese, ae oofu uma i ofu papae. Oka! Se mea a matagofie tele ma manaia.

O le tusi o lenei aso oute manatua ai nai aso a’o le’i leva ona tatalaina sã o le Koviti. Sa fai si toatele o tagata na toe faatumulia le aai ma auala. O nisi na aveese a latou talifofoga, ona e le toe mana’omia. Sa ou manatua, ua umi tele se taimi talu ona le toe lagonaina se mea faapea, o le toe mafuta ma tagata. I luma o se tasi fale’olova, na alaga mai se leo ua faapea, ‘Ua faatagaina i tatou e toe fusi, tatou fai fusi vaega!’ Na faafuasei lava ona lagona le fusi o tagata ese e pei o se mea e sili ona lelei. Ou te mafaufau pea i lea aso e tau maua ai se ata faafātusa i upu o le matua ma tatou tusi faitau o lenei aso.

**Tatalo:** Le Atua o le ola, fesoasoani ia matou tausia avanoa matagofie e matou te mafuta faatasi ai ma tagata eseese o lenei lalolagi, **Amene.**

## SU’ESU’E IA LEVITIKO – APPROACHING LEVITICUS

**Aso Sã – Oketopa 15: “Sauniga ma le usiustai: tepa i le Atua”**

**Tusi Faitau – Luka 2:21-35, 39** (*Ritual and obedience: glimpsing God*)

**Matua – ff. 27b-28:** *“Ua au mai le tama o Iesu e ona mātua, ia la faia ia te ia faapei ona tatau i le tulafono, ona sapaia lea e ia i ona lima, ua vivii atu i le Atua, ua faapea atu ...”*

O Maria ma Iosefa sa tausi a’e la’ua i tu ma aga masani e mao tuā peā ma le senituri. Na la’ua iloa le mea e fai e tusa ai ma sauniga masani, aemaise o mea e tele o le olaga faaIsaraelu. E le masalomia foi o Iesu na peritomeina i le aso lona valu. Auā o le mea lena e manaomia e le tulafono. Mulimuli ane, na mana’omia ona faamamāina Maria ina ua uma ona fanau, na mana’omia ona tuuina atu Iesu ma ofoina atu se taulaga. O nei tulafono, atonu e foliga faigata (e oo lava i le puleaina), ae na uuna’iaina le faamasani i le usiustai, ma tausisi ai le maopoopoga o le ola i totonu o se nuu.

E ui i lea, peita'i ane, e iai lava se faaeteetega i tulaga o mea masani ma mea na saua'i, o le avea lea ma mea e leai se uiga ma to'agaogao. E le'i manatu le Atua o le usita'i i le tulafono e avea ma se i'uga, ae o se auala e faafaigofie ai le mafutaga ma ia. O le masani a Simeona o le usiusitai i le tele o tausaga na mafai ai ona ia iloa atu le finagalo ofoofogia o le Atua mo lenei tamaititi o Iesu.

**Tatalo:** Le Tamā e, faamalosi mai ina ia matou faamasani atu i lau Afio, ina ia matou tali lelei ai lou valaau i o matou ola, **Amene.**

### **Aso Gafua – Oketopa 16: “Faapaiaina i tatou e auauna”**

**Tusi Faitau – Levitiko 4:1-35** (*Making us holy to serve*)

**Matua – f. 35b:** *“E faia foi e le faitaulaga se togiola mo ia ona o lana agasala ua ia agasala ai, ona faamagaloina ai lea o ia.”*

O le ola faitaulaga o le tagata, o le faiga taulaga a le tagata o le agaga o le faafetai i le Atua ona o lana tausiga ma lana foa'i. O lea la o loo tau vaevae mai e le tusi o levitiko ia faiga o taulaga eseese, epei o le taulaga o le faafetai, taulaga o le faamagaloga, ia ma le taulaga o le tapua'iga. E eseese uma le faiga o ia taulaga, e eseese foi mea e fai a'i. O le faitaulaga la o le aso lenei, o loo aumai se ata manino i le faiga taulaga sa ola ai Isaraelu. O taulaga paia auā e Paia le Atua. E tatau foi la ona faapa'iaina le e faia le taulaga.

O le agasala o le agasala, pe faafuase'i pe fuafuaina, e tupu lava ona o i tatou lava ma a tatou gaioiga. I le tatou faitauga la o le aso lenei, o se mea sa'o pe a tatou mafaufau ia faamagaloina a tatou agasala. O a tatou sauniuniga la mo le faamagaloga, e le faigofie. A'o lea ua faamatala mai e Levitiko le auala e fai ai lea taulaga ma lea taulaga. O le taulaga ia Levitiko e tapenapena ia atoatoa uma mea e fai ai, ma ia sa'o foi auala i lona faiga. A'o le taulaga i le feagaiga fou, e le o se taulaga na fai pe sa'o lona faiga, o le taulaga na ofoina atoa le ola o Keriso e fai ai.

**Tatalo:** Faafetai le Alii e, ona o lou lava toto na faamaligiina i luga o le satauro, ua magalo ma faapa'iaina ai i matou e auauna ia te oe, **Amene.**

### **Aso Lua – Oketopa 17: “O le a le uiga?”** (*What's the point?*)

**Tusi Faitau – Levitiko 9:1-24**

**Matua – f. 24:** *“Ona alu ane ai lea o le afi mai luma o le ALII, ma susunu ai le taulaga mu i luga o le fata faitaulaga, atoa ma ga'o; ua iloa e le nuu uma, ona latou alalaga ai lea, ma faapauufao.”*

E leai se isi vaega o le tusi Pa'ia e ta'ua ai se povi po'a e fai a'i le taulaga. Ua na'o le tupua povi auro o loo i le tusi o Esoto (32) e tau latalata ane iai. O le fesili o lenei aso, “O le a le uiga?” (*What's the point?*). O le tali o loo i upu o le tatou matua. Ua amatatia nei le galuega faa sa Levī o Arona, ina ua foa'iina le taulaga e faamagaloina ai lona agasala e pei ona ta'ua i le tupua povi auro i Esoto. O le faamama muamua o Arona, faatasi ai ma ona atalii, o lea ua mafai ai ona fai i latou ma osi taulaga o tagata i luma o le Atua.

O se faamanatu mo i tatou i lenei aso, poo le a lava le galuega ua valaauina ai i tatou e le Atua, e tatou amata muamua ia'i tatou lava, aemaise o lo tatou va

ma le Atua. Vaai muamua poo ua e lelei ma le Atua, ae le'i tatou faia ana galuega mo nisi tagata. Ia tatou mua'i saili muamua i le faamagaloina o tatou lava leaga i luma o le Atua. Ia auā lava ne'i fatia'i pe faatalatuu, ae ia le aunoa ona fai soo i aso uma le faamagaloga. O i na tatou maua ai le mana galuea'iga o le faatasi mai o le Atua, ma faaali mai ai lona alofa, ma e maua ai foi le faamalosiaga e tautua ma auauna atu mo isi. O le uiga tāua le na o le faitaulaga.

**Tatalo:** Le Alii e, fesoasoani mai ina ia ou iloa ma talia le faamagaloina o a'u, ina ia mafai ona ou auauna atu ia te oe atoa ai ma nisi tagata. **Amene.**

**Aso Lulu – Oketopa 18: “O le ola mamā e sosoo ma le amioatua”**

**Tusi Faitau – Levitiko 13:1-45** (*Cleanliness next to godliness*)

**Matua–f.17:** “*Ona matamata atu ai lea o le faitaulaga; faauta foi, ua liua le ila ua sinasina; ona taumamāina ai lea e le faitaulaga o ia o i ai le ila; ua mamā o ia.*”

O le ola faamamaina e pei ona aumai i le tatou autu, o le tele o taimi e tatou te taumafai e puipui mai le tatou ola mai faama'i o loo faapea ona pesia ai lo tatou atunuu ma le lalolagi atoa, le faama'i o le koviti-19 lea sa matua afaina ai le atunuu ma le lalolagi. O le taumafai la e puipuia o tatou tino mai i ia faama'i uma, o le taumafai foi lea e tausia o tatou tino ina ia aua ne'i faaleagaina, a ia tausia pea le ola faamamaina. O tatou tino e taua i le Atua, o lona uiga, e tatau foi ona tatou faataua o tatou tino, ia o tatou faamama ma teuteu lelei, aua, o i tatou na faia lava i tatou i le faatusa o lo tatou Atua, o i tatou foi, o loo tusi atu ai Paulo i Korinito, tou te le iloa ea o outou tino, o le malumalu lea o le Atua, ma o loo nofo foi le agaga o le Atua i totonu ia te outou. Aua afai o le toto o le povi po'a ma 'oti, ma le lefulefu o le povi fafine tanoa, ua susunu atu ai ie ua leaga, ae faapa'iaina ai e oo i le faamamaina o le tino, Eperu 9; 13-14

**Tatalo:** Le Alii e Iesu, ia ou maua le maosi e aumai ai i latou i totonu o lou malo, ma avea ma faaitaiga e faailoa lou alofa e faavavau. **Amene.**

**Aso Tofi – Oketopa 19: “Togiola: e siitia a tatou agasala ma aveesea”**

**Tusi Faitau – Levitiko 16:1-34** (*Atonement: our sins lifted and carried off*)

**Matua – f. 22:** “*E ave foi e le 'oti i ona luga a latou amio leaga uma i le nuu e le āina, na te tuua foi le 'oti e alu i le vao.*”

O le tasi uiga o le upu Eperu o le *nasa*, o le “siitia”, ia poo le “ave-eseina”, e faaogaina foi le upu lava lea o le Nasa i le faamagaloina. I le faitauga la o le aso leni, o le 'oti ua faae'e i ai agasala a Israelu, ona tuu atu lea e alu i le toga vao, ma leiloa atu ai ma agasala. O le mamao mai sasa'e e oo atu i sisifo, e faapena le mamao e na ave eseina ai o tatou leaga uma.

O le tulaga o a tatou agasala uma, poo le a le mamafa tu, e toe faai'u ifo lava i 'aao alofa a lo tatou Tama oi le lagi. I le fuaiupu e 16, Ioe, e alofa faamaoni le Atua i le tagata, ae e i ai le taimi e faaali ai foi le amiotonu a le Atua, ae ui a i le to'asa o le Atua, e i'u a i le alofa o le Atua i le tagata. O le Atua e alofa ma e alofa faamaoni, e ui a la i le alofa faamaoni o le Atua, ae faaali foi a le amiotonu a le Atua i le tagata. Mai le vaaiga faakerisiano sa ola mai ai, Isaia

53:4. Fetalai ai Iesu ua faapea mai, e nate tauave o tatou tiga ma ana tau aveina o tatou tauave o tatou puapuaga, o faigata uma ua ia amoina, o Ia lava foi na saunoa mai, o mai ia te a'u, o a'u foi e malolo ai outou.

**Tatalo:** Le Faaola e, faafetai mo aveseina o agasala, fesoasoani ina maua le ola ma le malamalama ai i le sa'olotoga ua maua ai le faamagaloga. **Amene.**

### **Aso Faraile – Oketopa 20: “Olaga manino ma le tulagaese”**

**Tusi Faitau – Levitiko 25:1-17** (*Living distinctly and radically*)

**Matua – f. 17:** “*Aua lava tou te faasaua le tasi i le tasi; a ia e mata'u i lou Atua; auā o a'u o le ALII lo outou Atua.*”

O le fuaiupu e 17 lena o loo aumai ai le “tulafono faa auro” na lauga ai Iesu i luga o le mauga, ma faapea mai ai, “*O mea uma foi tou te loto i ai ia faia e tagata ia te outou, faapea lava ona outou faia ia te i latou; auā o le tulafono lea ma le au perofeta*”. I le gagana Eperu, o faamamafa o le tatou matua o loo faapea mai, e tali atu le tagata lava ia i lona vā ma le Atua faatasi ai ma le nuu atoa o le Atua.

Atonu tatou te lagona o le talaiina o le Sapati ma le tausaga o le Iupeli e faasilisili atu i so tatou malosi. Peita'i ane, e iai le fesootaiga o le tausaga o le Sapati ma tulafono e sefulu (Eso 20:8-11); o le Sapati na faia mo lo tatou penifiti (Mar 2:27) ina ia maua le soifua maloloina i le itu faaletino ma le mafaufau. O le isi mafuaaga tāua ua faatonuina lona tausia, ina ia ola paia le tagata auā ua uma ona tofia le nuu filifilia e le Atua, mo le Atua. O se feau taugologolo o lenei aso ma le tatou tusi faitau, o le lapata'iga ina ne'i o tatou faatauanāina le ola o nisi.

**Tatalo:** Le Alii e, faailoa mai ia te'i matou ala uma e faasoa ai lou alofa mai, ma ia fai ma faataitaiga lelei i tagata uma o lenei lalolagi, **Amene.**

### **Aso Toona'i – Oketopa 21: “Alofa ae le o le tulafono”** (*Love not law*)

**Tusi Faitau – Levitiko 27:1-34**

**Matua – ff. 1-2a:** “*Ua fetalai mai foi le ALII ia Mose, ua faapea mai, Fai atu ia i le fanauga a Isaraelu, ia faapea atu ia i latou, Ai se tagata na te faasaina se tasi i le tauto ...*”

O tautoga tāua o loo ta'ua i le tusi Paia. O tautoga e mafai ona taliaina, e ui a e le aumaia ai se faamalosi au. Ae ese foi le faaeteete gatā o ia mea o tautoga. I le Faamasino e 11, o loo aumai le tala ia Iefata ma lona afafine. O le tautoga sa faia ma lona masalosalo o le a fesoasoani le Atua ia te ia i le taua, ua iloa a e Iefata e toatasi lava lona afafine. O le faigata lea o tautoga, faia ma le lē mautinoa. Talitonu, sa le nofonofa lelei Iefata i masina ia e lua na tuu i lona afafine.

Levitiko e lusefulufitu (27) ma o le mataupu faai'u foi lea o le tusi o Levitiko. O loo aumai ai faatonuga i le faia o taulaga e aofia ai tautoga. E pei ona ta'ua i luga, e le faigofie tautoga, e lelei le tautoga pe a mulimulita'i le tagata i lana tautoga. E le taumate foi le faia o lana tautoga. O mea ua ofoina atu e fai ai le taulaga, o ina la o loo i ai le faaetetega. O le uiga o le upu pe a

faamatalaina. O lea ua vaevae le totogi, o le taulaga, o le alofa, o mea 'ai a le aiga, o pili a le aiga, ae alualu toe aapa atu faaaoga le alofa, faaaoga le taulaga, ina ua le mafai ona tatali le fia alu i le bingo, le fia ulaula, ae ua toe faaaoga mai ai mea ua uma ona vavae ese lau taulaga, alofa, ma mea faalelotu, o au taulaga uma ia i le Atua.

**Tatalo:** Le Atua mamalu e, fesoasoani mai ina ia ou malamalama i lau tulafono e faaosofia ai le agaga o le fia auaua pea i lau Afio, **Amene.**

## FAITAUGA MAI LE TUSI O ESETA – READING IN ESTHER

**Aso Sā – Oketopa 22: “O se fafine tete’e”** (A woman resists)

**Tusi Faitau – Eseta 1:1-22**

**Matua – f. 17:** *“Auā e oo atu le tala i le masiofo i fafine uma, ona inosia ai lea e i latou o a latou tane, pe a latou ta’u ane, Na poloai atu le tupu o Asueru ia au mai i ona luma le masiofo o Vasati, a e lei alu ane o ia.”*

O le tala ia Vasati le masiofo a le tupu o Asueru, o le tupu o Peresia. O se e tupu e malosi lona leo. E au lana pule i le tele o malo o le lalolagi. O le fiafia la na tala'iina e le tupu i Alii sili ma ta'ita'i o malo sa ia valaaulia i lenei fiafia. E fitu aso o le fiafia ma sa tele ai le uaina sa i ai, ua tele le fiafia o Asueru, ma sa ia manatu ai e aami Vasati, ina ia faaali atu lona lalelei i ana malo faaaloologina. O le upu a Vasati, o ia foi o le isi tagata e pei foi o isi tagata, ou te le alu atu.

Ua le fiafia Asueru ina ua le usita'i Vasati ia te ia. Fai mai le manatu o le masiofo, ua avea le ona o le tupu ma mea e faamaasiasi ai o ia. E foliga mai o isi ia auala o loo sauaina ai fafine, o le tagofia o le ava oona, ona fai lea o le mea e le talafeagai. O le vaaiga lea e vaaia i le tala lea, e foliga mai ua sauaina le tina ona o le ava, o le faaaogaina o le uaina ma fai ai isi tulaga e afaina ai le aiga, A o le masiofo, ua le usita'i lona alii. O le ata vaaia lena o le aiga ua faaleagaina ona ua faaseseina e le ava. A o se vaaiga foi lea ua iloa i totonu o aiga i nei ona po, o aiga ua malepelepe ona o le faasuaava o le Tama, ia poo le tina foi. O le finagalo o le Atua ia maua uma e aiga le ola fiafia, a o le tina foi ia ususita'i i ta'itoalua, ona maua lea o se aiga fiafia ma le manuia.

**Tatalo:** Le Alii e, ua o matou faalogoina le fetagisi o fafine i o latou ta'ito'alua, ua matou faapea atu, e lea ii sauaga faapena. **Amene.**

**Aso Gafua – Oketopa 23: “O se fafine ua suia”** (A woman replace)

**Tusi Faitau – Eseta 2:1-23**

**Matua – f. 3:** *“Ia tofia foi e le tupu o matai i itu malo uma o lona malo, latou te faapotopotoina teine taupou lalelei uma i Susana le maota, i le fale o fafine, ia Hege le eunuka a le tupu, o lē tausī i fafine; ma ia avatua ia te i latou mea e faamamāina a'i i latou.”*

Vasati o le Masiofo a le tupu o Asueru. Ua le usita'i o ia i le mana'oga o le Tupu, ina ia faaali lona lalelei i luma o ana malo faaaloologia. A ua iloa e Vasati, ua tele le uaina ua taumafaina e le tupu. Ua iloa la e Vasati, ua pulea lona to'alua

e le ava, ma o le mea foi o loo mana’o ai lona to’alua, o se mea e le tatau ia te ia ona faia; e manumanu i ona tagata, ona o ia e vaai i ai le faiga malo ma le atunuu foi.

Ua faapotopoto mai teine taupou uma o le malo i le maota i Susana, e saili ai se tasi e malie atoatoa i ai le mana’o o le tupu o Asueru. Ma ua filifilia mai ai Eseta le tama’ita’i Eperu sa i ai i Susana. O le filifilia o Eseta ua suia ai le tama’ita’i o Vasati ina ua le fiafia le tupu ma i le masiofo ma aveeseina mai ai i le maota o le tupu, ae tula’i mai ai le teine Eperu ma ua faaeaina i le malo o Peresia. Filifiliga sa faia ma le le mautonu o le tagata, ae ua faaalua ai le alofa o le Atua. O le faaeaina foi o le tagata e tapenaina e le Atua, sa le iloa e Eseta o le a oo i lea tulaga, Peita’i, ua faia e le Atua le auala e faaeaina ai Eseta, a’o le lavea’ina o tagata Isaraelu mai lima sauā o Naamanu.

**Tatalo:** Le Alii e, ina ua e faia o Eva, Akara, Ruta, Vasati, Eseta, Raava, ma fafine uma o le tusia paia, ua e fautauina o lauulu o latou ulu, **Amene.**

### **Aso Lua – Oketopa 24: “Faamata’u mai o le matuā faaumatiaina”**

**Tusi Faitau – Eseta 3:1-15** (*The threat of annihilation*)

**Matua – f. 13:** *“Ona molia lea o tusi e ē ua tele vavave i itu malo uma o le tupu, ina ia faaumatia, ma ia fasiotia, ma ia fano sa Iutā uma, o taulelea atoa ma toeaina, o tama iti atoa ma fafine, i le aso e tasi, o le sefulu ma le tolu lea o aso o le sefulu ma le lua o masina, o le masina lea o Atara; ma a latou mea ia vetea.”*

Ua faapaleina Eseta ina ua filifilia e Asueru e fai ma masiofo, ae le o saogalemu ai lona ola atoa ai ma ona tagata. O Moretekai ua tetee atu ia Haamanu. O Haamanu, o se tasi o ta’ita’i iloga ma le malosi a le tupu o Asueru. O lenei, ua filifili ai Haamanu e faaoo sala ia Moretekai ma ona tagata uma o loo i totonu o le malo o le tupu o Asueru. Ua faalumaina e Moretekai le alii o Haamanu, ina ua teena e Moretekai le usita’ia o faatonuga a Haamanu. Ona finauvale ai lea o Haa-manu e faaoo le faamata’u o le matuā faaumatiaina o tagata o le nuu o Moretekai.

O le masani foi lea o ni tagata maualuluga o loo uuina le pule a se faiga malo poo ni faalapotopotoga tetele. E mua’i lava ona latou taugapa i sauaga ma le faaoolima i tagata, ina ia latou faatumauiina ai le matata’u i tagata ina ne’i latou fouvale mai. Ua le sailia le nonofo fifilemu i totonu o se faapotopotoga, ae ua na’o le fevaevaea’i. O nei faiga faatogafiti ua tele ona tutupu mai ai le fevaevaea’i o tagata i lenei lalolagi, ona o le pule ma le malosi ua latou uumia. O le fesili, o fea so tatou aoga i lenei faiga faatogafiti, ma le faapolokiki? Ua fai ea i tatou ma e sauā, poo ua fai i taotu ma e tetee atu i nei faiga leaga?

**Tatalo:** Le Alii, fesoasoani i le lalolagi faitogafiti, ma ia fai i matou ala e auala mai ai lou filemu mo tagata uma. **Amene.**

### **Aso Lulu – Oketopa 25: “O itu aso faapenei”** (*For such time as this*)

**Tusi Faitau – Eseta 4:1-17**

**Matua – f. 14:** “*Auā afai e te matuā faalogo i nei ona po, e tupu mai le tuusaunoaina ma le laveaiina o sa Iutā mai se tasi mea; a o oe, ma le aiga o lou tamā e fano outou; e iloa foi e ai po ua fai oe ma masiofo ona o se aso faapenei?*”

O le tusi faitau o lenei aso o loo atagia mai ai le nuu o le Atua o loo nonofo i Peresia. E ese foi le faigata o mea ua oo i ai latou ona o le tulafono ua faia e Hamanu, o le a fasiotia uma o Iutaia i totonu o Peresia; ma ua logo tala ai nei o Eseta e uiga i lona nuu. O se tala e mata’utia, ona o le faaiuga o le a oo i ona tagata. E le i faailoaina e Eseta i le tupu poo ai tonu o ia, ma le mea e sau ai, o le faigata la lea o loo nofo nei ma Eseta, ua mafaufau i faiga lelei ma faiga alofa a le tupu mo ia, a’o lea e na te le’i failoa iai poo ai o ia, a’o tagata o lona nuu lea ua fai i ai le faai’uga a le tupu ina ia fasiotia uma i latou.

Ua nofo nei le masiofo ma mafaufau i lana faai’uga o le a faia, fai o lona mafaufau i le sa’olotoga ma le fiasia i le maualuga ma mamalu le nofoaga o loo ua nofo ai nei, a’o le isi itu, o le alofa i ona tagata, a’o mafaufau Eseta ae faalatalata atu Moretekai ma lana faaupuga ua fai ma muagagana i le atunuu, o ai na manatu o le a fai oe ma masiofo i taimi faigata faapenei,? O le uiga o le faamatalaga a Moretekai, Ia alofa Eseta ma lavea’iina le ola o le nuu. Sa umi lava se taimi, peitai sa alofa lava le masiofo i lona nuu. O le filifiliga ua faia i le tamaoaiga, mamalu, ua tuuese nei, ae ua filifili i le alofa. Ua alofa le masiofo i lona nuu, a ua le popole i le faaiuga a le tupu, ae ua tonu ia te ia, poo le a lava le mea e oo ia te ia, ua sili-sili lava le alofa o le masiofo i le nuu o le Atua. O le mea lea ua faasaoina ai o ia.

**Tatalo:** Le Atua Tolutasi Paia, foi mai lou Agaga i taimi faigata o le ola ina ia fai i matou ma faolataga i lou nuu, **Amene.**

**Aso Tofi – Oke 26:** “*Afai ou te oti ai, oti ai pea*” (*If I perish, I perish*)

**Tusi Faitau – Eseta 5:1—6:14**

**Matua – Ese 5, f. 2:** “*Ua iloa mai e le tupu o le masiofo o Eseta o loo tu atu i le lotoā, ona alofaina lea o ia e ia; ua faaloaloa mai foi e le tupu lona tootoo auro na i ai i lona lima ia Eseta; ana faalatalata atu ai lea o Eseta, ma pai atu i le iu o le tootoo.*”

Ua fai lava le faai’uga a le masiofo o le a alu i le tupu mo ona tagata ia faaolaina. O le filifiliga a le masiofo, o le a lava le mea e oo i ai, ua ia talia ina. E pei ona faimai ai le taotu autu, “Afai ou te oti, oti ai pea”. O le taumafai e sui le faai’uga ua uma ona faia e le tupu, e le faigofie. Afai lava e mamao ma le finagalo o le tupu, e faia lava le mana’o o le tupu, ma e ono afaina ai ma le tagata o loo taumafai e sui. Peita’i sa faigofie mea uma aua sa auai le Atua ia Eseta, auā foi na tatalo Eseta i le Atua ina ia fesoasoani mai.

E ui na fai Eseta ma tagata mata’u i lona tupu, o loo aumaia foi e lenei tala se faamoemoega mo i tatou ina ia tatou mafai foi avea i tatou ma ala e faasa’olotoina ai tagata o loo sauaina ma faapologaina e lenei lalolagi. O aso nei, e to’a tele tagata ua teena a latou sa’olotoga faaletagata soifua ona o le pule

faafaigapolokiki a malo. E tatou te mana'omia lava le lototoa e tula'i ai ma tetee i nei faiga leaga.

**Tatalo:** Ia tatou viia nisi ua mafai ona ofoina lo latou soifua ina ia maua e le ola sa'olotoga. Ia faamalalamaina mea pogisa uma o le lalolagi, **Amene.**

**Aso Faraile – Oketopa 27: “A’oa’oga mai ia Eseta”** (*Lerning from Esther*)

**Tusi Faitau – Eseta 7:1—8:17**

**Matua – Ese 8, f. 17:** *“O mea foi na oo i ai le poloaiga a le tupu ma lana tulafono, i itu malo uma, ma aai uma, ua tupu ai le olioli ma le fiafia i sa Iutā, ua fai foi le tausamiga ma le aso lelei. E toatele foi tagata o le nuu ua fai ma tagata o sa Iutā; auā ua matatau i latou i sa Iutā.”*

Ua faamatiaina e le tupu o Asueru le alii o Haamanu ona o le finagalo o Eseta, aemaise ai ona o lona finau atu i le tupu ina ia faasa'olotoina ona tagata. E le faigofie lea tulaga, ae ona o le naunau o le masiofo, lea ua faasaolotoina ai sa Iutā, ma ua avea ai ma mea ua fefefe ai nisi o le nuu o le Atua, ma ua o latou filifili ai e avea ma tagata sa Iutā. O le avea ai ma sa Iutā, atonu o le a faia ai e le tupu mea latou te mananao i ai. Ua silafia ai e le tupu mea leaga o loo faufau e lana ta'ita'i 'au, ma ia faoa le faigamal. O le laau na saunia e Hamanu e faatautau ai Moretekai, ua faatautau ai lava o ia.

O le fesili tele lea ua tula'i mai, o le a la se a'oa'oga ua tatou maua mai i le tala lea ia Eseta? Muamua, ua tatou iloa ai, o Eseta e le o se tagata e gaioia, e le o se tagata foi e losilosivale, e le o se tagata e faualuga ona o lona tulaga faamasiofo, ae vaai ma fesili poo le a tonu le mea e ao ona faia. O lona mafaufau loloto, ina ia tosina mai le loto o le tupu e tusa ma lona manao ia faasaolotoina ona tagata. A o le mea moni, poo fea lava o loo i ai o ia, e le faagaloina le Atua. O le finagalo foi lea o le Atua mo'i tatou uma.

**Tatalo:** Le Atua mamana e, e le'i faaigoaina ta'uina e Eseta lou suafa, ae na atagia mai ai lau Afio i ana mea na fai, ia faapena i matou uma, **Amene.**

**Aso Toona'i – Oketopa 28: “Aua ne'i galo i a'i tatou”** (*Let us not forget*)

**Tusi Faitau – Eseta 9:1—10:3**

**Matua – Ese 9, f. 16:** *“O sa Iutā uma foi e na i ai i itu malo o le tupu, na potopoto i latou e tetee atu ia ola ia i latou, ona mapu ai lea o i latou i e na ita ia te i latou; na latou fasiotia foi e na 'ino'ino ia te i latou e fitu sefulu o afe ma afe e lima; a e lei vetea e i latou le oloa.”*

I le tau faai'ui'u o le tusi a Eseta, o le tusi na amata mai nisi o faafitauli ua aveesea ai le ola sa'oloto o le tagata, ua aumai ai i le tala le ola taotaomia o le tagata, ae ua avea ma ala ua faamalasia ai le ola tauivi o le tagata, le tagata ua manatu ua leai se faamoemoe, ae ua faatalitali i le taimi e oo mai ai le oti. Ua galo i a'i latou o loo i ai pea le Atua faaola, le Atua na te aumai le tala e fiafia ai, le Atua lea na tatalo i ai Eseta mo se fesoasoani, le Atua lea e tupu mai ai manatu lelei, o manatu e ola ai le tagata. Aua la ne'i galo ia Isaraelu le Atua lea na suia le faanoanoa i le fiafia, le Atua lea na suia le loto momomo i le fiafia. Aua la ne'i galo le Atua na lavea'iina mai i latou mai le lima sau o Hamanu.



Aua ne'i galo le Atua, o le Atua e tausi pea i lana feagaiga ua uma ona osia ma lona nuu. E fai Isaraelu ma ona nuu, ae fai le Atua ma o latou Atua. E tausi faamaoni pea le Atua i lea feagaiga, a'o le nuu o Isaraelu o se nuu femoumoua'i. I le tala la lea ia Eseta, o loo atagia mai ai le Atua Alofa lea, le Atua lavea'i, le Atua e tausi pea i lana feagaiga ma lona nuu. lea ua faaalua mai e Eseta, ma ua matata'u ai ma tagata o Peresia ma ua avea ai i latou ma tagata o sa Iuta. Aua lava ne'i galo i a'i tatou le faaolataga tele lea na saunia e le Atua, o le lavea'iina mai i latou mai lima o le latou fili, o Hamanu.

**Tatalo:** Tatalo i le Atua lavea'i. Tatalo i le Atua e auai, Tatalo i le Atua mo taimi faapenei, ia tatou tatalo i le Atua. **Amene.**

## **TAGATA SOIFUA MALOLOINA – HEALTHY HUMANITY**

### **1. Savali ma le Atua i le loto faamaulalo** (*Walk humbly with God*)

**Aso Sā – Oketopa 29: “O a’u lenei: ia faia lea”** (*Here I am: let it be*)

**Tusi Faitau – Luka 1:26-38**

**Matua – ff. 31, 38:** *“Faauta foi, o le a to oe, ma e fanauina se tama tane, e te faaigoa ia te ia o Iesu ... Ua fai atu Maria, Faauta, o a’u nei o le auauna a le Alii; ia faia ia te au e tusa ma lau fetalaiga. Ona alu ese ai lea o le agelu ia te ia.”*

O le tala o le oo mai i o tatou tagata, o tala e faailoa mai ai i a'i tatou mea o loo tutupu i lea taimi ma lea taimi. I le faitau ai la i le tala lea o le aso, e foliga mai o se tala e aumai ai i le tagata le fiafia, a'o se tala foi e fou i le faalogo, o se tala foi e taumate e le tagata lona faataunuuna, aua foi e fou ile faalogo i ia ituaiga tala. I le mafaufau la o Maria, afai la e moni e pei ona fai mai ai le Agelu, o le fesili la, o ai le tama o le pepe, O le biological father, o le Tama lea o le pepe o loo ua i le manava o le Tina. O le tali atu la o Maria, na te le'i iloa se tane, ae fai mai le agelu, o le to lena o le agaga Pa'ia, O lona uiga, o le Alo lena o le Atua. Ua maua e Maria le faaliga, ma ua ia talitonu o le Agelu lea a le Atua. Ua le toe tali Maria, ae ua na ona ia faapea atu, ia faia lava i ia te a'u e tusa ma lou finagalo.

O lea ua malamalama Maria o le Atua lea e talanoa mai ia te ia, ona ia faamaulalo lea ma faapea atu i le Atua, o a'u lava o lau auauna ia faia ia te a'u e tusa ma lou finagalo. Tauga tele le tatou faalogo i musumusuga, e tatou te iloa ai le mea e ao ona tatou faia. Afai ua o tataou mautinoa ua valaauina i tatou e le Atua, ia tatou malamalama, o i tatou lava ua na oni auauna faatauva, o le a lava le valaauga ua valaauina ai i tatou, tali atu i ai, o i tatou lava o ni auauna le aoga i tatou, ia faia lava e tusa ma lona lava finagalo.

**Tatalo:** Le Alii e, ia o matou iloa lo matou sootaga ma lau Afio, fesoasoani mai ina ia o matou iloa ona matou tali atu i lou finagalo. **Amene.**

**Aso Gafua – Oketopa 30: “Faamoemoe i le Alii”** (*Hope in the Lord*)

**Tusi Faitau – Salamo 131:1-3**

**Matua – ff. 1b-2a:** “*Ou te le masani ma mea faasilisili ma mea ua sili ona faigata ia te a’u. E moni, na ou fifilemu ma ou faalologo, faapei o le tama ua te’a ma le susu o lona tinā.*”

Ua e lagonaina le filemu ma le faamoemoe o loo faatumulia ai le faisalamo? O Tavita na faauuina e le Atua. O ia o se tupu ua tusa ma lona lava loto (1 Samuelu 13:14), e taualoa ma malosi. Ae peita’i ua iloa lava e ia lona nofoaga; e iai mea e sili atu ia te ia, a o mea na te le mana’omia ona ia popole iai. O lea na ia tusia ai tusitusi atu ai ma le agaga faamalieleina.

Ae a tatou, e faafia ona tatou faaalu o tatou taimi i mea e le mafai ona tatou pulea pe faatagā, ma le faamoemoe (atonu e le aoga) e mafai ona tatou taulimaina? O le tele o taimi ma le malosi o loo tatou faaaluina i nei mea, o le pogai lea foi lea o le tele o mea tatou popole, fefe, ma atuatuvaile ai. O loo fautuaina i tatou e Tavita, e le manaomia ona tatou ola faapenei; e mafai ona tatou iloa e i ai mea e le oo i ai lo tatou iloa ma le puleaina. O le taliaina o leni mea, o le lotomaulalo ma le filemu ia o faatasi.

**Tatalo:** Le Ali’i le Atua, a’oa’o mai ina ia matou le faaaluvale o matou taimi i mea e le aoga, ae ia matou maua le agaga faamalieleina, **Amene.**

**Aso Lua – Oketopa 31: “O le faamaoni o le Atua”** (*God’s Faithfulness*)

**Tusi Faitau – Salamo 146:1-10**

**Matua – ff. 3, 5, 6b:** “*Aua tou te faatuatua i alii, po o le fanau a tagata, e le o i ai se olataga ... Amuia le tagata o i ai le Atua o Iakopo e fai mona fesoasoani; o i ai lona faamoemoe i le ALII lona Atua ... o le na te tausia le faamaoni e faavavau.*”

I le fanau mai o le tagata e oo atu i le oti, o lo tatou olaga e tatau ona tatou faamoemoe i tagata; mo mea taumafa, lavalava, fale, faasinomaga, ma le fealolofaa’i. E iai foi manaoga tatau e tatou te faalagolago iai, faapei o le saogalemu ma le fia auai i mafutaga, o nisi tagata tatou te tua iai ma faamoemoe iai. A o le faafitauli, e iai taimi e le taulau ai o tatou faamoemoega i isi, ma e faatupuina ai foi o le tele o mea tigā ona o isi.

A’o le Atua na te ofoina mea uma tatou te mana’omia. E na te fafana ia te i tatou, faasa’olotoina ma faia le mea e tonu ma sa’o. E alofa Ia i e faamaoni ma e siamupini foi mo e sauāina, tuulafoaiina, ma e ua ta’uleagaina. O le agaga lea o le faisalamo i leni aso, e pei ona tatou faitau ai: “*aua tou te faatuatua i alii, poo le fanau a tagata, e le o iai se olataga ... amuia le tagata o iai le Atua o Iakopo se fai mona fesoasoani; o iai lona faamoemoe i le Alii lona Atua ... o le na te tausia le faamaoni e faavavau.*” O le fe’au lea o le tatou tusi faitau aso, ia tatou faamoemoe ma faalagolago i le Atua soifua. O loo iai lona faamaoni e faavavau.

**Tatalo:** Le Alii le Atua, faafetai i lau afio ona ua le galo lava i lau afio upu na e tauto mai ai, e te foa’ina soo se mea e tusa ma o matou mana’oga. **Amene.**

**Aso Lulu – Novema 1: “E afio le Atua i le ala maulalo”**

**Tusi Faitau – Isaia 57:14-16** (*God dwells with the humble*)

**Matua – f. 15:** *“Auā o loo faapea ona fetalai mai o le ua Maualuga ma ua Silisili, o lē afio e faavavau, e paia lona suafa, Ou te nofo i le mea maualuga ma le paia, ma te nonofo foi ma le ua momomo ma ua maualalo lona loto, e faamafanafanaina loto o e ua loto momomo.”*

E iai taimi e oo mai lagona i o tatou tagata, ma foliga mai ai ua mamao ese le Atua ma i tatou. Ia te a’u lava ia, ou te le mana’o a’u i se mafutaga e vava mamao ma le Atua; oute mana’o lava ina ia latalata mai le Tamā o le lagi ia te a’u. Oute matuā mana’omia lava lona Agaga faatasi mai ona o lona alofa. Peita’i, o i tatou lava e iai foi taimi tatou te tuleia ese ai le Atua ma i tatou, e ui na alofa mai pea o ia, ma o le ala foi lea ua foliga mai ai ua mamao ese le Atua.

O le feau o le tatou tusi faitau o lenei aso, o loo iai pea le Atua ma i latou ua manatu e faatauavaa ma maualalo o ia i lo le Atua. O e ua pulunaunau i le ala maualalo ma le lotomaulalo, o fanau ia e sili ona latalata ai le Atua e Afio i le mea maualuga. Afai tatou te manana’o ina ia latalata mai o ia ia te i tatou, ia tatou saili ia te ia i le lotomaulalo; auā e saili i lalo le malo o le Atua.

**Tatalo:** Le Atua le Tama, ua o matou faafetai i lau Afio ina ua avea i matou ma au fanau, ua o matou auai i lou faatasi mai. **Amene.**

**Aso Tofi – Novema 2: “Savali male lotomaulalo”** *(Walk humbly)*

**Tusi Faitau – Mika 6:6-8**

**Matua – f. 8:** *“Sole, ua faaali atu e ia ia te oe le mea lelei’ se a foi se mea e finagalo ai le Alii ia te oe, pe a le o ia mea, ia fai le amiotonu, ia naunau i le alofa, ma ia feooai ma lou Atua ma le loto faamaulalo?”*

Pe na e fesili ifo ea ia te oe lava po o le a le finagalo o le Atua ia te oe, pe faapefea foi ona e faamamaluina o ia? E lagona le tiga alofa ia Mika a o taumafai o ia e iloa lenei mea. Tau mafaufau foi poo le a tonu le taulaga o le a faafiafiaina ai le Atua. Ioe! Faapei o Mika, ua tatou faafaigataina le mataupu. Afai e tusa se manatu ma le tusi o Mika, o le finagalo o le Atua e faigofie lava. O lona finagalo, o lona fia mafautā mai ia’i tatou, ina ia tatou feooai ma ia ma le loto faamaulalo.

O le feooai ma le Atua ma le loto faamaulalo, o lona uiga e iai le ituaiga savali e tatau ona tatou savavali iai. O lona finagalo lava ia, e pei ona ta’ua e Mika, o le loto faamaulalo – faapei ona iai le tunoa o lona alofa. Ia faapei o le Atua, ia faapea foi ona tatou faia; ia faia le amiotonu, naunau i le alofa ma feooai ma ia i ala uma tatou te savalia i lenei lalolagi.

**Tatalo:** Faafetai i le Atua foafoa, o lou malosī lea ua matou malolosī ai, ua matou maua ai le ola sa’oloto i mea ua saisaitia ai i matou, **Amene.**

**Aso Faraiile – Novema 3: “O upu ou te faiaina ai”** *(Words fail me!)*

**Tusi Faitau – Iopu 42:1-6**

**Matua – ff. 5-6:** *“Sa ou faalogo ia te oe i le faalogo o o’u taliga; a o lenei, ua vaai atu o’u mata ia te oe; o le mea lea ua ou ‘ino’ino ai ia te au, ua ou salamō foi i le efuefu ma le lefulefu.”*

O le tala ile le mautonu o Iopu. O upu mai le afioga a le Atua o loo faamatalaina ai, o Iopu o le tagata ua sa’o lana amio ma le amiotonu, o lē ua mata’u ile Atua ma alo’aloese i mea leaga. (Iopu 1:8b), pe faapefea ona oo ia te ia nei mea leaga uma? O le manuia faaletino ua tatou maua ua tatou o ese mai ai ile amiotonu a le Atua. Ua faitioina e Satani le Atua ona o Iopu ina ua ia faamanuia iai. Ae ui i lea e le aveesea ai le filifiliga saoloto o Iopu, pe aveesea mai faamanuiga ia Iopu e filifili lava e ia le amiotonu.

O le malamalama o Iopu ile Atua, sa faataata I mea na ia faalogo iai, ae le o se potu masani. O le mafuaaga lea e alai ona tatou faailoga fesili, male le malamalama ile Atua. Ma avea lea ma mea tatou te mafaufau ai i soo se mea tatou te fia mafaufau ai, ma limiti ai foi le tatou mafutaga ma le Atua. O le alofa tunoa o le Atua ua faatoilalo ai leaga ma faafitauli ua tatou feagai.

**Tatalo:** Le Atua i le malosi e, fesoasoani i le matou vaivai, fesoasoani mai ina ia o matou maua le sa’olotoga e ala i lou faatasi mai, **Amene.**

**Aso Toona’i – Novema 4: “O le tupu auauna”** (*The servant king*)

**Tusi Faitau – Ioane 13:12-20**

**Matua – ff. 14-15:** *“O lenei, afai o a’u le Alii, ma le a’oa’o, ua ou mulumuluina o outou vae, e tatau ona outou femulumuluai o outou vae. Auā ua ou avatu le faaaoao ia te outou, e pei ona ou faia ia te outou, ia faapea lava e outou ona fai.”*

A o tatou savavali ma le lotu faamaulalo ma lo tatou Atua ma tuputupu ae ai foi lo tatou faatuatua ia te ia, o loo ua faasilia ai foi o tulaga mai le mea sa tatou iai. Ua faaalua e Iesu i le tusi faitau o lenei aso le uiga moni o le lotu faamaulalo.

Sa molimauina e le au soo le faaofogia e Iesu le motu o tagata e toatele, i lona faia o faamalologa ma isi vavega, o lona ‘aai faatasi ma e agasala faatasi ai ma lona luitiina o e sa iai puleaga malolosi. Sa ia faaali foi le mea moni i le au soo, ma ua latou silafia ai o Iesu o le Mesia, o le Alo o le Atua. Peita’i, ua faate’ia nei le ‘au soo, ua fululuina e Iesu o latou vae palapala – o se galuega mo na o le auauna aupito maualalo e na te faia. O le fufuluina e Iesu o latou vae, o le faailoga lea o le tupu auauna ua o loo iai le lotu faamaulalo moni. O le agaga lea o le Atua mo ona tagata faatuatua. Poo le a lava lou matua, poo le a foi le maualuga o lou tulaga, ia e iloa ona faamaulalo lou lotu i luma o le Atua, ma ia e auauna atu i nisi.

**Tatalo:** Le Tupu e Iesu, faafetai ona ua e faamaulaloina oe lava ma maliu mo a matou agasala, ia e fesoasoani mai ia matou faapei o oe, **Amene.**

## **TAGATA SOIFUA MALOLOINA – HEALTHY HUMANITY**

### **2. Ia iā te oe le manatu e tasi** (*Let the same mind be in you*)

**Aso Sā – Novema 5: “Ia ou faaitiitia”** (*I must decrease*)

**Tusi Faitau – Ioane 3:28-31**

**Matua – ff. 29b-30:** *“A o le uo a le faatoafaiavā, e tu mai ma faalogo ia te ia, e tele lona olioli i le leo o le faatoafaiavā; o lea foi ua atoatoa ai lo’u nei olioli. E ao ina tupu pea o ia; peitai a’u nei, e tauāu ina itiiti o a’u.”*

Sa i ai se taimi i le sauniga o le faailoga o lo’u afafine ina ua matou patipati i latou ua faauu. Na faafuasei lava, i lo’u ofo, na amata patipati mai i latou na maua tikeri, mo la matou lagolago. Ina ua ou tilotilo atu i lo’u afafine ma luelue mai lo’u ulu, ma le leo, ‘Ioe’ i lo’u loto, ona sa ia mana’o ina ia faia nisi su’esu’ega, ae na ou taofia i le tulaga sa i ai o ia.

O lo’u luelue o lo’u ioe, o se mea na faate’ia ai - o lo’u mitamita ma fiafia ia te ia, ae sa ou iloaina foi o lenei mea na suia ai la’u sootaga ma ia. O le a le lava se taimi e ma te mafuta ai ma ia, ma sa ou mana’o e faafiafia ia te ia. Ou te talitonu o loo vivii atu Ioane le Papatiso i lenei taimi i le Ioane talalelei – e le o fiafia o ia mo ia lava ae mo Keriso, le Tamai Mamoe a le Atua o le a faateleina e pei ona ia faaitiitia. Ua olioli Ioane i lenei mea, taimi o le iloa, o ona mata e le o ia te ia lava, tuputupu ae itiiti, ae e faasino atu ia Keriso o lē e sili atu nai lo o ia; lana uo, O Iesu, le Keriso, o le a faamagaloina agasala ma aumaia le faaolataga.

**Tatalo:** Keriso, le Tamai Mamoe a le Atua, e te aumaia le olioli i le lalolagi ma e faafiafiaina o matou loto, ‘ia ‘oli’oli ‘iā te oe! **Amene.**

**Aso Gafua – Nov 6: “Lotomaulalo poo le faamaualuga”**

**Tusi Faitau – Luka 14:7-14** (*Humble or exalted*)

**Matua – ff. 10b-11:** *“Ina ia fai atu le na tala’i ia te oe, pe a sau o ia, Sole, ina alu ae ia oe i le mea e sili; ona mamalu ai lea oe i luma o e taotoo e aai faatasi ma oe. Auā so o se faamaualuga e ia ia te ia, e faamaualoina lea; a o lē faamaualalo e ia ia te ia, e faamaualugaina lea.”*

I le avea ai ma se faifeau i se faalapopotoga tele o faapisinisi, sa ou i ai i se taumafataga faapitoa o le afiafi, faatasi ai ma fetu o le leitio ma le TV – sa i ai foi se aloalii i le taumafataga. Sa ou amataina le matou faigaai i se tatalo. Sa i ai i luga o le laulau se lisi o suafa o e uma o loo i ai i le fonotaga. o lenei lisi o igoa o failauga ta’itasi o loo i ai i le taumafataga. O Le IT na filifili le au faaenisinia e faaali atu, i luga o se laulau tele, le lisi o lauga. A o faagasolo le mea na tupu, sa latou suia le igoa o se failauga na muamua atu ma le igoa o le isi.

A o faagasolo le mea na tupu, sa latou suia le igoa o se failauga na muamua atu ma le igoa o le isi. A o le taimi lea e ‘aai ai, na avea a’u ma failauga mulimuli mo le fa sefulu minute, o lona uiga sa i ai lo’u igoa i luga o le laulau i le taimi atoa o le taumafataga. sa ou lagonaina le maasiasi, ae sa fiafia teisi ona sa i ai lo’u igoa i luga e umi atu le taimi nai lo le aloalii! I se faatusatusaga, mulimuli ane, sa ou talanoa ma se leoleo o le puipuiga o le saogalemu, sa fesili mai po o le a la’u mea na fai. Sa ou faamatala atu e uiga i le faifeau ma le ofoina atu o se fe’au mo le au faalogologo, ae foliga mai sa le’i faalogo o ia. ae nai lo lena sa ia talanoa pea e uiga i lona olaga faigata ma sootaga. Ina ua mavae se itula sa ou vaivai. O le faalogologo malosi e mafai ona avea ma galuega faigata. sa

faateia ma faamamaluina i lona faatuatuaina o au e faasoa mai na mea. sa ia toe fesili mai lea ia te au, 'O le a la lau mea e fai?'

Ua lapata'ia e Iesu ona tagata faalogologo i le mata'utia o le mafaufau iā i latou lava e sili atu nai lo isi, ma fautua mai o lo tatou lotomaulalo e ua faamanuiaina i tatou. Atonu e i ai taimi e faateia ai pe a tatou tuu i luga o le 'laulau pito i luga' ae e le tatau ona tatou taumafai ia maua atu nai lo ia. e tatou te manatu i ai e ala i le tuuina o i tatou lava i nofoaga o le mamalu.

**Tatalo:** Le Atua agalelei e, ua e tuuina atu lou alofa i tagata uma ia Keriso, faamagalalo mai ia i matou mo taimi na tatou mananao ai i le mamalu faalelallolagi nai lo le olioli e auauna atu ia te oe. **Amene.**

**Aso Lua – Nov 7: “Aua ne’i faapei le Faresaio” (Don’t be like the Pharisee)**  
**Tusi Faitau – Luka 18:9-14**

**Matua – ff. 11, 13-14a:** *“Na tulai le faresaio, ua tatalo lemu atu i nei upu, Le Atua e, ou te faafetai atu ia te oe, ina ua ou le pei o isi tagata, o e fao mea, o e amio leaga, o e mulilulua, e le pei o lela tagata ao lafoga foi ... A o le tagata ao lafoga, ua tu mamao atu, e le mafaia ona tepa ae ona mata i le lagi, a ua pōpō lona fatafata, ua faapea atu, Le Atua e, ia e alofa mai ia te au le tagata agasala. Ou te fai atu ia te outou, na alu ifo lona tagata i lona fale ua ta'uamiotonuina, a e le faapea le isi.”*

O le tei o lo'u aiga i Kanata, e 9 tausaga, sa i tua o le matou taavale a o i ai i le aso malolo faatasi ma i matou i Egelani. Sa ou tuuina ni sukalati i totonu o se ato i tua o le taavale mo se taimi mulimuli ane, ae, pe tusa ma le 45 minute a'o matou malaga, sa ou sosogi i le sukalati, ma lo'u liliu atu i tua, sa ou vaaia le tamaitiiti ua leaga uma foliga i le sukalati, sa faapea atu, ua ou le fiafia ia te oe, sa ou taumafai lava e taofi lo'u fai atu i ai, ae ua le mafai ona taofia lava a'u. sa galo ia te a'u ua o matou mamao ese ma le matou fale. o loo galo foi ia te a'u o le aso malolo lea e matou te i ai. Sa maligi lemu o'u loimata ona ua ou lagona ua leai se loto faamagalalo ia te a'u. na maligi loimata o lo'u tei ma tagi masusu seia oo ina matou tutu i se vaega o le auala, ma sa o matou talatalanoa ai ma toe maua ai le filemu, ona matou toe feosofi lea i totonu o le taavale ma matou o ese. toe oso i totonu o le taavale ma matou o ese. Ou te mafaufau pea pe aisea na mafua ai ona ou tautala faapea, ae e na'o le iva tausaga o le tamaitiiti

O le luitau o lena faataoto e le mo lo'u tei, ae mo au o le tagata e faafiaamiotonu ia te ia lava. E pei o le Faresaio i le tala a Iesu, sa ou manino lava i la'u agasala, sa ou faamalie ma o'u loimata. na iloa le faanoanoa o lo'u tei, sa ia iloina le mea sa ia faia, ma ia saili ai se auala e fo'ia ai, sa ou taliaina ma lo'u agaga maua, ona ou te iloina, ana ou le faia se upu, e le afaina lona mafaufau. Saunoa manino Iesu, i le faresaio faafiaamiotonu, ta'uta'u agasala a le isi tagata, Tatou faapea ifo e pei o le tusiupu ma lana tatalo, le Atua e, o a'u o le tagata agasala. alofa ma faamagalalo mai so'u sese, ioe, e leai lava se tagata amiotonu, e tofi uma lava i tatou ma sese, ae o le tatalo i le Alii, e mama ma magalo ai a tatou agasala.

**Tatalo:** Le Atua Paia e, e te ofoina atu lau faamagaloga e tusa lava pe tatou te le agavaa. Fesoasoani mai ia matou iloa lelei lau Afio ina ia matou le tausalaina isi ae ia taulimaina i latou i le agaalofo. **Amene.**

**Aso Lulu – Novema 8: “Aua le inoino i isi”** (*Don't despise others*)

**Tusi Faitau – 1 Korinito 11:17-22**

**Matua – ff. 21-22a:** *Auā a aai, ua taitoatasi ma muai fai lana lava talisuaga; ua laina le tasi, ua onā le tasi. E leaiea lava ni o outou fale tou te aai ai ma inu ai? Po ua faatauavaa ea ia te outou le Ekalesia a le Atua, ma outou faamāina e ua matitiva?*

Sa manao le tusitala o le 1 Korinito e aloese mai le faalumaina o i latou ile leai o ni mea. O le vaifofo na ia fautuaina mai o le faia lea o le taumafataga ia sili atu ona faafaatusa i mea 'ai i le fale. E foliga mai e mamao lava lenei mea mai le uluai ekalesia, o le mea e tutusa ai mea uma, e faasoa atu i e tusa ai ma le mana-omia ma gau falaoa i le fale (Galuega 2:44–46). Ae peitai, o iinei, o se popolega matuia e uiga i le fevaevaeaiga ua mafua ona o le tufatufaina o meaai i totonu o a latou Ekalesia, o le faatasiga o fesoootaiga ua lamatia i le leiloloa ona o le le tutusa o le fefaasoaai o meaai, i le tufaina atu o meaai foai, ua na faateleina i le UK a o faateleina le manaomia o meaai. O le mea lea e moni ai Coventry, lea e toatele tagata e tauivi e lava mea e saunia meaai mo o latou aiga. O iinei, o nisi taimi e leai ai ni meaai a tina ina ia mautinoa ua lava le fafagaina o a latou fanau. I le matou o le faaaliga o le seleselega tatou te auina atu ai meaai i le faaputuga o meaai. O nei meaalofa ua tufatufa atu i tagata o le lotoifale, ma e auina atu e la matou faaputuga o meaai i le lotoifale meaai ma fasi fanua i atunuu mamao. I le taimi lava e tasi, e masani ona faamaumauina meaai i le tele o aiga mauoa. O le mauaina o meaai o se pogai lea o fevaevaeaiga ma feteenaiga i lo latou lalolagi. I le 1 Korinito, ua valaaulia ai le au faitau e toe iloilo a latou sootaga ma meaai latou te aai ai ina ia mafai ona latou fefaasoaai ma o latou uso ma tuafafine. O le mea e moni mo tagata o Korinito ma tagata o Coventry ma le lalolagi lautele.

**Tatalo:** Le Atua le Tama, alofa ma a'oa'oina i matou ina ia o matou iloa ona oa faasoa atu mea 'ai mea inu. Tau ina ia tatou aoao e faasoa atu mo i latou o loo faapea ona fia maua le fesoasoani. **Amene.**

**Aso Tofi – Novema 9: “Se auauna ta'ita'i”** (*A servant leader*)

**Tusi Faitau – Luka 22:24-27**

**Matua – ff. 24b-26:** *“A ua fetalai atu o ia ia te i latou, O tupu o nuu ese ua aliitai i latou; o e pule foi ia i latou ua ta'ua i latou o e agalelei. A e lē fapea outou; peitai o lē sili ia te outou, ia avea o ia ia pei o le aupito itiiti, o lē pule foi, ia pei o le auauna ia.*

Sa faia sa'u talanoaga faafaifeautalai i le fale o se tagata mauoa ma se ulugalii matutua, sa vaaia se aiga e faaaloalo i a latou malo, sa vaaia foi le matagofie o toga laau, a'o luga foi o mauga, e ese le matagofie i le matamata. Ina ua tuuina mai ia te au se apa keke, sa ou aveeseina se fasi keke mai le apa.

Sa ou iloa le teuteuga o le keke, ma sa ou le fiafia i ai, ae sa ou taliaina ma le faaaloalo, sa toe pasi mai le apa, ae na ou tali atu, faafetai lava le faaaloalo. O lenei aafiaga e ese mai le aafiaga o le faafeiloaiga, na ou masani ona maua i fale o tagata e itiiti lava ni mea e maua, ae faasoa atu mea ua latou maua ma le agalelei tele, ou te mafaufau i le matua nofofua o loo nonofo i se tamai fale maototogi, ma lana fanau talavou e toalua afafine. Sa ia ou 'ai muamua i le araisa ma le kale.

Ua luuina au e Iesu, i le tala lenei mai le Evagelia a Luka, i le toe mafaufau i le agalelei ma le maoae, e faigata ona le faagaetia i fale lelei ma tulaga o tagata mauoa, ae ua manino lava Iesu i ona soo e le o le tamao'aiga po o le fesooteai, a'o le tul aga e avea ai se tagata ma tagata maoa'e moni. E leai, o lo tatou lotomaualalo, ma lo tatou vaivai ma lo tatou naunau e auuina atu.

Ua aumaia e Iesu le alofa ma le agalelei o le agaga i le laulau o le Talisuaga Mulimuli ina ua ia ofoina atu ma le agalelei lona ola e fai ma meaai mo soo. E ui lava i lona aoao atu, e faigata lava ia i latou ona malamalama i lona auuina atu ia i latou ma fufulu o latou vae. O le ua faia e Iesu le faata'ita'iga sili mo i tatou uma, faaaogaina o le soifua ma le ola e auuina atu ai i si ou uso a tagata, ae sili ai le tautua ma auuina i le Atua ma lona finagalo.

**Tatalo:** Le Alii e, tau ina ia ou saunia pea e faasoa atu mea ua ou maua ia i latou o loo mana'omia le fesoasoani. **Amene.**

**Aso Faraile – Nov 10: “O ai oe i lou manatu?”** (*Who do you think you are?*)

**Tusi Faitau – Romans 14:1-6**

**Matua – f. 6:** *“O lē anaana i le aso, e anaana o ia i ai ona o le Alii; o lē ai e ai o ia ona ole Alii, auā ua faafetai i le Atua; o le le ai foi, e le o ia ona o le Alii, ua ia faafetai foi i le Atua.*

Na faia e le Atua le lagi ma le lalolagi i le amataga, ona ia tuu lea i ai o le tagata e na te tausia le foafoaga a le Atua. I le tausia ina la e le tagata o le foafoaga, o loo ua i ai i le tagata le fuafuaina lelei ma faasoasoa lelei le faaaogaina o le foafoaga. O le tausia ina la o le foafoaga a le Atua lea e mafua ai ona taofi eseese ai tagata. E pei o le tala o loo faamatalaina e le tusi tala o le tusifaitauaso, fai mai a ia le eseese o manatu o le to'alua, i le atunuu o Zimbabwe, e taumafai i latou ina ia tele ni pauna e aveeseina mai i o latou tino, a'o le UK, e fai mai a latou e tutusa aso, ma e le afaina ai i le isi tagata le ai a le isi tagata, a'o o loo au mai i le tusi faitau, o le tagata e anaana i le aso, o lona uiga o le tagata e galue ma faaoga tatau le aso. E pei ona aumai i luga le foafoaga pa'ia a le Atua, ua uma ona tuuina mai i le tagata e na te tausi ma faaoga tatau. E tula'i mai ai la faaletonu ia, ma i'u a ina oo i le oti.

Ua malamalama le tusitala i le aumai e Roma le taua o le suia o le auala tatou te amio ai e faatatau i le tulaga ua tatou oo i ai. Ua tatou ola i se lalolagi e le o taimi uma e manino ai po o le a le mea e sili ona lelei e fai, le auala sili e auuina atu ai i le Atua. O se faamalo iinei atonu o se faalumaina i se isi nofoaga, ma e le o taimi uma e iloa gofie ai pe aisea po o afea. E ui i lea, e pei ona faailoa mai i le tusi i Roma, o loo faasoosoina pea, ma faamasoina nisi e le o faia e



pei ona tatou faia. Ua faamalosiua i tatou ina ia faautauta! Afai o le mea o loo ou faia o l'oo mafua ai ni faafitauli mo isi ona e tatau ona ou mafaufau e taofi ma faataitai se isi auala, ae o le mea e sili ona taua, e tatau ona tatou manatu o le amio e sa'o ona tatou faia, o le amio e fia silasila i ai le Atua, o le isi lea mea e faasino i le mamalu o le Atua, e tatau la i a'i tatou ona savavali i ala ua uma ona faata'oto mai e Iesu Keriso.

**Tatalo:** Le Atua Pele, i le avea ai ma ou soo e masani ona eseese o tatou olaga mai le tasi i le isi. A o tatou ia malamalama lelei i la tatou misiona e faatatau ia te outou, ia tatou latalata atu i lau loto o le alofa ma le tasi i le isi. **Amene.**

### **Aso Toona'i – Novema 11: “Faaū i lalo le lalolagi”**

**Tusi Faitau – Luka 1:14-55** (*Turning the world upside down*)

**Matua – ff. 46-49a:** *“Ona fai ane lea o Maria, ‘Ua vivii atu lo'u loto i le Alii, ua olioli foi lo'u agaga i le Atua lo'u Faaola, auā ua silasila mai o ia i lana auaina fafine ua faamaulaloina; auā e amata mai nei ona faamanuia mai ia te au o tupulaga uma; auā o Le e ona le mana ua faia e ia mea silisili mo a'u.’”*

O le pese a Maria e atagia mai ai lona lava tulaga. Maria e avea ma tagata e siitia i luga, e mitamita ina ua taunuu lana pese faaperofeta, le tamaitai o Maria, ua sili atu ona faamamaluina i le taimi nei nai lo soo se isi lava aso. Mai lava i ona taimi, sa na o lana tama tama o Iesu, sa maua lava le lotomauualalo, Iesu lea na faapaleina i le laau talatala, o lē na faamamaluina ma sili atu lona mauualuga.

E mafai ona faigata i tamaitai talavou, lea e iloa foi e Maria ia. lea na ou iloaina e ala i la'u galuega, faamatala mai ia te au tala i lo latou sauaina ma le puleaina e tagata o e na faasesēina o latou olaga mo o latou lava faamoemoega. I le nofo ai i atunuu ia na foliga mai na fai mai e le afaina le taulimaina o se tamaitai i se auala faapena, o loo maua uma i Evagelia, se faamoemoe fou ma se naunautaga e tetee atu i uunaiga ua tuuina atu ia i latou.

O le faatinoga a le Atua ia Maria, o afioga a le Atua i le foafoaina o Maria, ua faaalai ai e faapea o le puleaina e le o se mea e finagalo i ai le Atua! I le taimi o Maria ma i le oo mai i o tatou lava taimi e mafai ai e tamaitai talavou ona faatino le lotomauualalo ma faaalai atu, e ui o loo i ai sauaga i le lalolagi, e leai se isi nofoaga e sili atu ona lelei e saili ai le lotomauualalo, faamoemoe fou ma le ola fou.

**Tatalo:** Le Alii e, ia e alofa ma ia e taualoaiaina e matitiva ma foliga mai e le taua. Alofa ina o matou vaai i o outou mata, ma iloa i o matou loto le alofa e te lagonaina. **Amene.**

## **TAGATA MAALEALE MA FAALETONU – HUMAN FRAGILITIES AND FOLLIES**

**Aso Sā – Novema 12: “Tioata”** (*Grey-tinted glasses*)

**Tusi Faitau – Mareko 8:14-21**

**Matua-f.16:** *“Ona latou felafolafoai ai lea, ua faapea ane, ua leai ni a tatou areto.”*

Ua felafolafoa'i le au soo, o lona uiga ua fefinaua'i, ona ua fesili mai le Alii i ni areto, ae tapa ane ua leai se areto, sa i ai i a'i latou le areto e tasi, ua le maumanatu ai le au soo. ua faatamala le au soo i mea e ao ona aumai. O le fefinaua'i la o le ausoo, ua galo i le au soo o loo latou faatasi ma Iesu, sa tatau ona latou manatua le vavega na faia e Iesu i le lima afe tane ae le faitaulia ai tina ma tama'ita'i, ia ma ete e fitu na toe faatutumu ina ua uma ona fafagaina le fa o afe, ae na faatutumu ai ete e fitu i toe'aiga na 'aai ai, o vavega ia sa toe faamanatu e Iesu i lona au soo, i lo latou ola masalosalo pea, o loo silafia e Iesu o loo i ai lona au soo se areto.

Ua fetalai Iesu, 'Ia faaeteete i le fefete a le au Faresaio ma le fefete a Herota.' O le fefete o le fatu lea o le manao pea i nisi mea: tele atu le mana'o i mea e tele atu, pe sili atu foi le amiotonu. O lona fefete e faatupuina le fiaaai ma le toe mana'o, e tusa lava po o le a le tele o mea ua tatou maua. O le fesili lea e tulai mai ai: o le a le mea ua lava? Ua lava ea a'u? O le tala fiafia e faapea o le tali o le 'Ioe'. Ua lava i tatou. E telegese le malamalama e pei ona tatou i ai, ua sili atu lo tatou lava. E pele i tatou. E tele i o tatou tamatamailima – o le tele o le alofa, o le ola, o le tagata. Alu ese mai ipu malamalama. Tagai i ato ua tumu i falaoa, ua gau i toega, faasoa atu.

**Tatalo:** Le Alii e, Ia efaailoa mai ia te au, e ala i lou alofa tunoa, ua lava ai a'u i mea ua ou maua. **Amene.**

**Aso Gafua – Novema 13: “E faavalevaleaina i tatou i le fefe”**

**Tusi Faitau – Esoto 32:1-6; 15-24** (*Fear can make us stupid*)

**Matua – f. 24:** *“Ona ou fai atu lea ia te i latou, O e o i ai auro ia motusi ese, ma ia latou aumaia ia te au; ona ou lafo ai lea i le afi, i le ua sau ai lenei tamai povi.”*

Ua faia le tama'i poviauro, ona ua tuua e le ta'ita'i le lafumamoe. Ua i ai le fanauga a Israelu i le togalauapi. Ua alu atu nei Mose i le mauga ae tuua na'o Arona ma le nuu, ua loa aso o alu Mose i le mauga, ua amata ona le to'a tagata pe ai se a ua alu umi ai Mose, ona a'e lea o se manatu, ia faia se latou Atua, aua ua latou le iloa poo i ai se mea o tupu ia Mose, ua tuai mai ai, ua leai se to'a. E le iloa poo le fefe o Arona i le nuu, ia poo ua auai foi i le le to'a o le nuu. Ua aveala le fefe o Arona pe afai ua fefe i le nuu, ua ia faia ai se faai'uga faata'ita'i ina ia faia se tama'i povi. Ua le gata la ua le faia le mea e tatau ona faia, e faatali pea ia Mose, ae ua galo ai ia te ia le Atua o loo faamalumu pea i o latou luga. O le tala lea e atagia mai ai le le galulue faatasi ma fesoasoani le isi i le isi, e pei o le alu atu o Mose i le mauga, ae ua leai se faamoemoe ia Arona ma le nuu ua ia te ia le vaaiga.

I la'u suesuega o le mafatiaga na ou iloa ai ua faia moni lava i tatou mo le tasi i le tasi. O o tatou fatu uaua e faitauina ai mea o loo siomia ai tatou, ma fesili mai 'Pe o ou saogalemu ea? Pe o a'u ea?' Tatou te pulea faatasi le tasi ma le isi lagona. O lo'u popole atonu e amata ai lou popole; o le to'a O le mafuaaga

lena e mafai ai e taitai ona ofoina atu le mea sili latou te mafaia pe a tatou tausia i tatou lava ma mafai ona tatou faaaogaina mea e manaomia, e punaoa i tatou i taimi o uunaiga, ae ua faapopoleina le tagata ona ua umi tele ona alu le taitai.

O le ala lea ua tula'i mai nisi o faafitauli, ona ua leai se fesoota'iga a le tagata ma lona ta'ita'i. A oo ina tuua e se ta'ita'i se mafutaga, e i ai aiaiga e tuua ai, e pei ona tuuina atu i se tasi le aia e ta'ita'i ai le mafutaga, e pei la o Arona na tuua i ai e Mose le nuu ina ua alu atu i le mauga. Peita'i ua le mafai e Arona ona tula'i i lona tulaga faa ta'ita'i, ae ua usita'i i le nuu, ua popole Arona i lona fefe i le nuu, ae ua le faia ai le mea e tatau ona fai. Ioe, afai ua filifilia i tatou e tauaveina le tulaga faata'ita'i, ia o tatou faia ma le atoatoa, faia ma le faamaoni, galulue malolosi ma fai le mea tonu.

**Tatalo:** Le Alii e, aveese le fefe mai ia te a'u ina ia mafai ona faailoa atu le moni o lau Afio i a'i latou. **Amene.**

**Aso Lua – Novema 14: “Mai le gutu o le asini”** (*From the donkey's mouth*)

**Tusi Faitau – Numera 22:21-35**

**Matua – f.28:** “Ona faagaganaina lea e le Alii o le asini, i le ua fai mai o ia ia Palaamo, Se a ea se mea ua ou faia ia te oe, ua e sasa faatolu mai ai ia te au?”

O le tala ia Palaamo ma le mana'o o Palako ina ia fetuu le nuu o Isaraelu, ona o le ua sauni le nuu e sopolia atu Moapi, o le tala lea na faagaganaina ai e le Atua le asini, aua ua uma ona fetalai le Atua ia Palaamo ia aua ne'i alu ifo, ae peita'i, sa le faalogo Palaamo, na fetalai le Atua ia Palaamo e alu, ae ina ua tula'i Palaamo ma faagutu le Asini, silafia e le Atua ua sauni Palaamo e talia meaalofo mai ia Palako. le ala lea na faagaganaina ai e le Atua le asini, e ta'u atu ia Palaamo ia aua ne'i alu.

O le le usita'i o Palaamo, o loo aumai ai se feau mo i tatou. Aua ne'i o tatou naunau i le oloa poo le tamaoaiga, a ia o tatou faia le finagalo o le Atua. Afai ua tuuina mai i a'i tatou se mea e ao ona tatou faia, ia o tatou usiusita'i ma faia, pe maua le tau pe leai, afai ua tuuina mai ina ia faia? E tatau ona tatou usiusita'i ma o tatou faia ma le faamaoni, i lou manatu ma lou malosi atoatoa. Ioe, ua faagaganaina le asini e ta'u atu ia Palaamo, e le tatau ona alu ifo, o lona le usiusita'i foi lea.

Ua sili ia Palaamo mea ua folafolaina mai ia te ia, nai lo le faalogo i le fetalaiga a le Atua. Aua o le nuu lea e alu Palaamo e fetuu, o le nuu o loo ta'ita'iina e le Atua. Ioe, e sili le usita'i nai le ga'o o le mamoe po'a. Afai tatou te usiusita'i ma o tatou malamalama lelei i le finagalo o le Atua, e leai se mea tatou te popole ai, O le Atua o le Atua na faia mea uma, o ia foi e pule aoao i mea uma. E i'u vale le tagata e le usiusita'i, e ese le faigata o le ola o le tagata e le usiusita'i, usita'i i ona matua, usita'i i faia'oga, faifeau, poo se isi lava e ta'ita'i, ia pe matua foi ia te oe. Ae le itiiti foi le manuia o le tagata e usita'i.

**Tatalo:** Le Alii e, alofa ma tatala o'u taliga ina ia ou lagona le upu moni ma vaai o'u mata i ou luma ma ia ou faia le mea sa'o. **Amene.**

**Aso Lulu – Novema 15: “E na o i tatou lava”** (*There is only us*)

## **Tusi Faitau – Faamasino 12:4-6**

**Matua – f. 6:** *“Ona latou fai atu lea ia te ia, Fai mai, Seepoleta; ona fai mai lea o ia Sepoleta, auā na te le mafai ona tautala faapea ona latou pue lea ia te ia, ma fasi ia te ia i asaga o Ioritana. O ona po ia na fasiotia o Efaraima e fagafulu o afe ma afe e lua.”*

Taua, ita, faailogalanu, faatautala, o mea e tutupu ona o fesoota’iga, ua leai se fesoota’iga a Iefata ma Efaraima, o le manatu lea o Efaraima ina ua sii taua Iefata ia sa Amoni, o le le fiasia la o Efaraima ina ua le logoa i latou e Iefata i le taua lea ma Amoni, a’o lea e fai mai Iefata, ua uma ona logo atu outou, a’o le tali, e matou te le o atu, o le ala lea ua o lava i matou e tau ma Amoni, sa o matou saili fesoasoani i le Atua, lea ua tali mai le Atua, ua tuu mai Amoni i o matou lima.

Sa faamatalaina e Makerita se tala i se faife’au na fesili pe faapefea ona tatou faia se i’uga e faa’uma ai le sa’o o se mea i le goto ifo o le la. Na tali ese tamaititi a’oga e faapea, e te iloina pe a e vaai mamao o se mamoe, ae le o se ta’ifau, I tali uma na tuuina atu e le fanau, sa lulu le ulu o le faifeau ma fai mai, e leai, e tatou te iloa pe a uma le pogisa, ae taou te vaaia le alu a’e malie o le malamalama, i fafine ma tamaloloa ua ala a’e ma o la vaaia ni foliga ese, o le vaaia lea o foliga o le tugane ma le tuafafine, e leai i la’ua, ua na o i tatou. O le tatou feagai ai ma o tatou fili, se’i toe tilotilo ane a poo ai lou fili, ona tatou mafaufau lea o i latou o tatou uso ma o tatou tuafafine, e tatu i a’i tatou ona maua le loto fefaamagaloga a’i, loto fetausi a’i, alofa le tasi i le isi, maua le fiasia, o le finagalo foi lea o le Atua mo lana fanau uma i le lalolagi.

**Tatalo:** Le Alii e, alofa ma liliu ese lo’u fefe ona o le ita, ma ia ou filifili e amata i se amataga fou.. **Amene.**

## **Aso Tofi – Novema 16: “Faamoemoea i taimi o faalavelave”**

**Tusi Faitau – Esekielu 37:1-14** (*Hope in times of catastrophe*)

**Matua – f. 11:** *“E faapea ifo, Ou te alu ai i le nuu o aai e le nofo ‘olo; ou te alu ia te i latou o e fīfilemu, o e nonofo faatalanoa, o i latou uma o nonofo ua leai so latou pa, e leai foi ni a latou faamaufaalava, po o puipui.”*

O le tala o loo aumai i le tusi a Esekielu, o loo aumai ai le faaaliga na oo mai i le perofeta, ua faailoa mai ai le le fiasia o le Atua i le nuu o Isaraelu. Ua tula’i mai ai le nuu o Isaraelu o se nuu ua foliga mai o se nuu ua leai se faamoemoe, o loo faamatala mai e le tusitala, e foliga mai ua leai se aoga o le faamoemoe, Aua o le faamoemoe o le tagata ina ia maua se lavea’ina, ia maua se toomaga, aua a o tatou faitau lelei i le faaaliga na oo mai i le perofeta, ua leai a se mea e toe suia ai le finagalo o le Atua, a’o le a faaoo lava le faasalaga.

Ua fetalai le Atua i le fuaiupu e ono, ou te matua aveese a a outou tupua ma mea maualuluga, ou te matua faatafunaina lou laueleele, aisea, ua latou le iloa le Atua, le Atua lea sa latou osi feagaiga, e fai le Atua ma o latou Atua, e fai i latou ma nuu o le Atua. Le faamoemoe lea sa masani ona i a’i latou pe a oo mai le fili, ona latou o lea i le Atua, a’o lea ua afio mai le Atua i lona aso, a’o ai la ua faamoemoe i ai? e foliga mai ua leai se faamoemoe.

Talofa e i le tagata e alu ese ma le Atua ma faia lava lona loto, talofa e i le tagata ua manatu ifo lava o ia ua atamai ma maua mea i lona lava malosi, ae galo le Atua, e oo mai le taimi, e oo mai le aso o le Atua, ona o tatou toe manatu lea, o ai tatou te o i ai, ioe, e tatou te toe foi lava i le Atua, aua a aunoa ma le Atua, o ai tatou te faamoemoe i ai?

**Tatalo:** Le Alii e, pe a oo mai faanoanoaga ona o le lalolagi, ma lagona le vavaeseina mai, alofa ma manava mai lou agaga ina ia ou mafai ona ou tula'i ai ma ou ola ai. **Amene.**

**Aso Faraile – Novema 17: “Faaogaina o avanoa” (Taking advantage)**

**Tusi Faitau – 1 Samuelu 24:37, 11-15**

**Matua – ff. 3, 4b:** *“Ua oo atu i lotoā o mamoe i le ala, ua i ai le ana, ona ulu atu ai lea o Saulo e ufiufi i ona vae, a o loo nonofo Tavita ma ona tagata i le muliana ... Ona tulai lea o Tavita, ua ia sesele ese lemu le pito ofu o Saulo.”*

O loo aumai i le tusi faitau i le aso lenei, le tala ia Saulo ma Tavita, a o taumafai pea Saulo e tulituli Tavita ina ia fasiotia. O loo aumai i lenei tala le maua ai e tavita le avanoa e fasiotia ai Saulo ma faauma ai le faafitauli o loo faia. Ae sa ia Tavita le agaga o le Atua na ia manatu ai e le oo lona lima ia Saulo. O avanoa tatau o avanoa e le aumaua, e faataunuaina ai ona faauma pe faamuta se mea o loo tupu. Fai mai ua o mai Saulo ma ona tagata i le fanua e i ai le lafumamoe, ma o latou maua ai se ana, ona manatu lea o Saulo o le a faia se malologa i le ana lea, sa le mafauina e Saulo se fuafuaga e tatau ona sailia muamua lea nofoaga pe saogalemu, peita'i sa mama le manatu o Saulo i lea tulaga, ua na o le mana'o lava e palasi le tino i lalo, ona malolo lea. A'o le ana lava lea i lona tau faasi'usi'uga, o loo i ai Tavita ma ona foi tagata, e pei ona aumai i le tatou autu, faaogaina o avanoa tatau.

Peita'i i lea taufetuliga o loo taufetuli ai Saulo ma Tavita, sa iloa lelei e Tavita le la va feagai ai ma le Atua, na iloa foi e Tavita, e le mafai ona ia faia se faai'uga e le o finagalo i ai le Atua, o le ola le tagata o le mea totino lava lea a le Atua. O le mea foi lea na fai mai ai Tavita, ou te le mafai lava o na oo lo'u lima i le tagata ua faauina e le Atua. Ioe, aua ne'i o tatou misia le avanoa ua oo i a'i tatou, o avanoa le aumaua, e pei o lea upu. E faigata i a'i tatou ona tatou le taliaina avanoa ua maua, ae peita'i, o lea fai mai Tavita, ia o tatou auiliili muamua poo se avanoa e tatau ona tatou talia pe usita'ia, ae filifili muamua, pe tatau ona tatou taliaina pe leai foi.

**Tatalo:** Le Atua alofa e, faamanatu mai o i matou lava o ni tagata vaivai ma le faatauva, fesoasoani i o matou le atoatoa i lou feau, **Amene.**

**Aso Toona'i – Novema 18: “Tatou o atu teisi pea” (We do go on a bit)**

**Tusi Faitau – Galuega 20:7-12**

**Matua – f. 9:** *“Sa nofo foi le tasi taulealea, o Eutiko le igoa, i le faamalama, ua maua e le moe gase; ua loa foi le lauga a Paulo, ua oo lava ia te ia le moe, ona pa'i ifo lea o ia mai luga i le tolu o pae o le fale, ua sii ae foi o ia ua oti.”*

I le amataga o le faitauga o lenei aso faamatalaina ai le lauga umi a Paulo, ina ua sauni o ia e alu ese atu i sana malaga, lea na lauga ai Paulo i se lauga umi. A’o lauga la Paulo, fai mai sa nofo se taule’alea e igoa ia Eutiko i le faamalama o le fale, o le fale e tolu ona fogafale, ua oo le lauga a Paulo i le tulua o po ma ao, au ua moe le taule’ale’a, ma pa’u ifo ai. E sii a’e lenei taule’ale’a ua oti lava o ia, sa fetagisi i latou sa i ai, a’o Paulo fai mai ua fa o o ia i luga o le tama, ona toe maua lea o le ola o le tama, fai mai na toe foi Paulo ma faaauau lana lauga. A’o i latou sa i ai fai mai ua matua ofo i latou ina ua toe ola le tama.

O le mafaufau o Paul o ina ia f’aaogaina tatau le taimi, aua a oo mai le ao, ona alu ese atu ai lea o ia. sa le’i avea la le pa’u o Eutiko ma mea e faavaivai ai Paulo. Fai mai ina ua toe ola le tama, ona toe faaauau lea o le lauga. Na oo lava i le tafa mai o ata o lauga lava le Aposetolo. O lea ua aumai e Paulo se ata manino mo i tatou, aua ne’i o tatou faavaivai i le galuega, aua le avea mea e tutupu i le olaga ma mea e taofia ai le tautua ma auauna i le galuega ua valaauina ai i tatou. Lagona le vaivai, tulei pea i luma lou sa, aua o loo faapea ona manuia atu ai ma le isi tagata. Finagalo le Atua ia tatou aga’i pea i luma ae aua le faavaivai, aua foi le avea mea e tutupu i le olaga e faavaivai ai.

**Tatalo:** Le Alii e, alofa ma faamanatu mai ia te’i matou ia aua ne’i avea mea tutupu mai e faavaivai ai le ola faatuatua i lau Afio. **Amene.**

## (2) FALETUSI O TUSITUSIGA PAIA – BIBLICAL LIBRARY Tulafono (Law)

**Aso Sā – Nov 19: “Tulafono ola mamā – faalia e tulafono le Atua atoatoa”  
Tusi Faitau – Teute 5:1-33** (*Moral law – the law displays God’s perfection*)  
**Matua – ff. 24a, 27:** “*Faauta, ua faaalua mai ia te i matou e le ALII lo tatou Atua o lona pupula ma lona silisili ese, o lona siufofoga foi ua matou faalogologo i ai ai totonu o le afi...Ina e faalatalata atu ia, ma ia e faalogologo i mea uma e fetalai mai ai le ALII lo tatou Atua, ma ia e ta’u mai ia te i matou mea uma lava e fetalai mai e le ALII lo tatou Atua ia te oe, ona matou faalogologo atu lea i ai, ma matou faia.*”

O le autū aoao o lenei vaiaso o le “Tulafono” (*law* poo le *torah* i le gagana Eperu—o ulua’i tusi e lima o le Feagaiga Tuai). Ua vaevaeina aso ta’itasi o lenei vaiaso i vaaiga eseese e mafai ona faalauaitale ai lo tatou su’esu’e i le “Tulafono” e pei ona aumaia e le Tusi Paia.

O le matāupu o le tulafono e amata lava i tulafono e sefulu (*ten commandments*) na tuuina atu ia Mose i Sinai. O le tatou tusi faitau o lenei Aso Sā (Teut. 5:1-33) ua toe faamanatu e Mose o tulafono ia a o sauni ai le nuu e ulufale i le Nuu o le Folafolaga (*Promised Land*). O lo ua toe faamanatu tulafono i le fāsefulu (40) o tausaga talu ona mua’i tuuinaina mai e le Atua. O tulafono lava ia o loo faavae ai le feagaiga a Isaraelu ma le Atua, ma o loo faavae ai foi le faiga faamasioga (*judicial system*) o le tele o faiga malo o le lalolagi i nei ona po. Tatou te iloa lelei lona tāua ma lona aogā tele mo ola mamā—peita’i ane, e tatou te soli pea nei tulafono i aso ta’itasi. Poo fea lava e

gata ai lo tatou faamaoni taumafai, e leai lava se tasi e atoatoa lelei i ai. E ui i lea, o le faamoemoega o le tulafono e lē na’o le faamasinoina o i le ola mamā. E leai! O loo faaalua foi e le tulafono le atoatoa o le Atua i lana feagaiga tausi ma Isaraelu. Ina ia mafai ona tatou o i luma o le Atua, e mana’omia se Faaola e mafai ona atoia i ai mea uma o le Tulafono. Viia le Atua ua Ia ‘aumaia ai Iesu.

**Tatalo:** Faafetai Iesu i lou afio mai ma faafesaga’i ai lou atoatoa ma le lalolagi agasala. Ua māmā avega ma matou savavali sa’oloto ai, **Amene.**

**Aso Gafua – Nov 20: “Tulafono o Sauniga – o le manogi o faamagaloga”**

**Tusi Faitau – Levitiko 1:1-17** (*Ceremonial law – the smell of forgiveness*)

**Matua – f. 9b:** “*O le taulaga mu lea, o le taulaga e fai i le afi, o le mea manogi lelei i le Alii.*”

O ananafi sa faitau le tala e uiga i tulafono o le ola mamā, ma lo tatou lē mafaia ai ona tausia. A o le aso nei, tatou te iloilo ina tulafono o sauniga—o le a le mea e fai pe a solia le tulafono o le ola mamā. O le tusi faitau o leni aso o loo faatāuaina ai le taulaga mu i luma o le Alii, ma e foliga mai o se faiga e lē masani a’i ai i tatou nei ua ola i le alofa tunoa o le Atua. A o le agasala o se mea e matuiā—auā e paia le Atua. E pau lava le auala e mafai ai ona tatou maua se faiā ma le Atua, o le ofoina atu o taulaga mu e sui a’i ai le agasala.

Mo tagata Isaraelu, o manu e leai se pona o le taulaga sili foi lea. O le tagata na te aumaia le taulaga, e tataua ona tuu lona lima i luga o le ulu o le manu e faailoa ai le autasi (f. 4); o le oti o leni manu o le a talia e le Atua e sui ai le tagata e alu atu i luma o le Atua. O le tele o tagata e ofoina atu se mamoe po o se ‘oti (f. 10); sa tuuina atu foi faatonuga mo povi (f. 3), ae ua na’o e maumea e gafatiaina; ma manu felele foi sa osi ai taulaga (fuaiupu 14), e taugofie lea mo e matitiva. E leai se tasi na tuusaunua i le faiga taulaga, mauoa pe mativa: o tagata uma e manaomia ona ia amiotonu i luma o le Atua. O le manogi o le taulaga mu sa ‘fiafia iai le Alii’ (f. 9). Ae peitai, e le o se faiga umi na faia ai leni mea. Na oo ai loa i se tasi aso, ua auina mai ai e le Atua le taulaga silisili—o lona Alo e to’atasi lea, o Iesu. Ma o le a faamatalaina o ia o se ‘taulaga manogi’. E le’i mafai ona tatou togiolaina a tatou lava mea sesē, ae sa fiafia lava le Atua e talia se taulaga manogi ina ia faataunuuna ai le tulafono mo i tatou.

**Tatalo:** Le Alii e, faafetai mo le taliaina o le taulaga o Iesu ua sui ai ita. Ia aua ne’i ia te i matou a ia viia lau afio ona o lou muai alofa mai, **Amene.**

**Aso Lua – Novema 21: “Tulafono faamasinoga – ta’iala mo vaega pogisa”**

**Tusi Faitau – Esoto 21:1-36** (*Judicial law – guidance for the grey areas*)

**Matua – f. 1:** “*O nei upu foi e faamasino ai, e te tuuina atu ia te i latou.*”

O le faitau e uiga i le pologa ma sauāga e masani lava ona faigata mo o tatou taliga i leni seneturi. O matāupu nei o le Tusi Paia tatou te lē fiafia iai—e foliga mai e le o gatusa ma le Atua, po o le auala na fuafuaina tatou te ola ai. Ae ua tuuina mai e le Atua le saolotoga e filifili ai, ma sa atiina ae foi e Isaraelu se aganuu e aofia ai mea ia e lua – pologa ma sauāga. E le o faatagaina e le Atua nei faiga ae tuuina mai tulafono e puipua ai tagata vaivai. E ta’ua nei tulafono

o le faafaamasinoga – mataupu faavae e fesoasoani e pulea ai fa' aiuga fai ina ia tonu ma sa'o.

Sa faamanuiaina tagata Isaraelu i le mauaina o nei faamalalamalama, ma fesoasoani e faauigaina ma le poto o poloaiga ma tulafono e sefulu. O aso nei o loo tatou feagai ma le tele o faaiuga tau amio e leai se mamanu faale-Tusi Paia o tuuina mai ai. O la tatou galuega o le faaaogā lea o le Mataupu Silisili e iloaitino ai le gaioioiga sa'o.

**Tatalo:** Faafetai Tamā mo lou mana taitai ua e faataoto ai ala o le Tusi Paia. Fesoasoani i o matou filifiliga fai ina ia tonu ma sa'o, **Amene.**

**Aso Lulu: “Faamalalamama le tulafono – e faapefea ona tauamiotonuina i tatou?”**

**Tusi Faitau–Mat. 5:17-22** *(The law explained – how can we become righteous?)*

**Matua – f. 17:** *“Aua ne'i outou manatu ua ou sau e tatalaina le tulafono po o le au perofeta; ou te lei sau e tatalaina, a ia faataunuuina.”*

O le tulafono ua faapei o se malamalama—e fa'aalia ai le agasala i o tatou olaga. E lē mafai ona tatou faitau i ai e aunoa ma le iloaina o a tatou masei, atoa ai ma ni mea e lē iloa mai e isi. E le'i afio mai Iesu e ave ese le tulafono: o le tulafono ua faavae i le alofa o le Atua. E faailoa mai ai le paia o le Atua, ma le lē paia o i tatou. E lē toe mana'omia pe afai e 'taunuu mea uma' (f. 18); pe a toe afio faalua mai o Iesu ma ave'esea ai le agasala. Ae mo le taimi nei o lo'o tumau pea e fa'aalia ai lo tatou faaletonu.

E na o Iesu lava, e amiotonu i luma o le Atua, na mafai ona ola i le usiusitai atoatoa i le tulafono ma, o lea, na maliu ai mo lo tatou lē usiusitai. O le ala lea na te faataunuuina ai le tulafono mo i tatou. Oka se meaalofa a tele!

**Tatalo:** Iesu e, faafetai ona o lou taulaga ofoina atu lenei ua ou ola ai. Faafetai i ona o lou alofa ma lou meaalofa lenei ua ou ola saoloto ai, **Amene.**

**Aso Tofi–Nov 23: “O nofoaga e vaivai ai le tulafono, e i ai le mana o le Agaga”**

**Tusi Faitau – Roma 8:1-11** *(Where the law is powerless, the Spirit has power)*

**Matua – f. 6:** *“Auā o le loto i la le tino o le oti lea; a o le loto i la le Agaga o le ola lea ma le manuia.”*

Ua tatou iloa le aogā o le tulafono: e faatulagaina ai tapulaa a le Atua, e atagia ai lona paia ma susulu mai ai se malamalama i o tatou olaga, e faailoa mai ai foi le mea ua tatou lē amana'ia ai le Atua. Ae e le mafai e le tulafono ona fai mea uma. E leai se malosi e faatoilaloina ai le agasala (f. 3). E le mafai ona ta'uamiotonuina ai i tatou. E na te le mafaia ona faalatalata atu i tatou i le Atua – ua na ona ta'u maia lo tatou mamao ese mai ia te ia.

Peita'i, e iai le talalelei; ua auina mai e le Atua o Iesu 'i le faatusa o le tino agasala e fai ma taulaga mo le agasala' e faatoilalo ai le agasala mo i tatou (f. 3). O lenei mea ua mafai ai e le Agaga o le ola ona faasaoloto i tatou mai le tulafono a le agasala ma le oti' (f. 2). O lona uiga ea ua tatou le toe agasala? E leai – o le fuaiupu e 10 o loo faamautu mai ai o le a feoti pea o tatou tino ona o le agasala. E le mafai ona tatou aloese mai le pala faaletino ma iu ai i le oti. Ae e le o le mutaaga lea o le tala; ona o le amiotonu ua manumalo ai Iesu mo i



tatou, ua ola ai nei o tatou agaga (f. 10) - ma o le a toetutu o tatou tino (f. 11) i le ola e faavavau ma le Atua i le lagi! E le tatau ona tatou faatali seia oo i lena taimi, e ui i lea: o le ola i le mana o le Agaga Paia i le taimi nei e aumaia ai le ola ma le filemu (f. 6). E faaitiitia lo tatou agasala ona o loo tatou ola i le Agaga nai loo le tatou tulaga agasala tuai (f. 9). A o tatou gauai atili atu pea lava pea i le taitaiga a le Agaga, o le a faateleina lo tatou manao e faamamalu le Atua.

**Tatalo:** Agaga Paia e, faatumu maia i matou i ola ma le filemu. Foi le naunauta'iga e faamamaluina ai le Atua i le manatu, upu ma galuega, **Amene.**

**Aso Faraile – Novema 24: “Tusia i o tatou loto – o le tulafono i o tatou loto”** (*Written on our hearts – the law in our hearts*)

**Tusi Faitau – Ieremia 31:23-34**

**Matua – f. 33:** *“A o lenei le feagaiga ou te osia ma le aiga o Isaraelu ... ou te tuuina la'u tulafono i totonu ia te i latou, ma ou tusi ai i o latou loto; e fai foi a'u mo latou Atua, o i latou foi e fai mo'u nuu.”*

E le na'o tamaiti e le fiafia e pulea a latou mea sese - e oo foi i tagata matutua. E sili atu ona tatou tuua'ia isi nai lo le faailoa atu o a tatou lava vaivaiga. E sili atu ona tatou tusitusi lima i o tatou matua, o tua'oi, o a'oga a le fanau poo le malo foi, ae mulimuli ai ona tatou vaavaai ifo i o tatou lava loto. O le fanauga a Isaraelu sa iai i se tulaga mata'utia – ua osofa'ia e Papelonia, o tupu leagafaia ma le tele o tagata ua faaunuuua – ae sa latou faauiga sese le tulafono a le Atua i se auala na tuua'ia ai le agasala i o latou tuua, nai lo le vaai ifo i totonu poo le mea na latou agasala i le Atua.

E le mafai ona e ola i le faatuatua a ou matua, poo se isi lava tagata. E tofu i tatou ma le matafaioi ma le tali atu i luma o le Atua. Sa ta'u atu e Ieremia i lona nuu, 'e oti tagata uma i lana lava agasala' (f. 30). Ua vavalo Ieremia i se taimi o le a tuu ai e le Atua lana tulafono i o tatou mafaufau ma o tatou loto (f. 33). Ua ia'i tatou le avanoa e iloa ai le taunuuga o lenei mea: e ala i le maliu o Iesu ma le afio o le Agaga Paia. O le mea lea, ua faamagalalo ai e le Atua, ma ua galo ai foi amioga le usiusitai uma (f. 34).

**Tatalo:** Alii e le Atua, ou te fia iloa oe i aso ta'itasi uma. Ia tuuina maia lou tulafono i lou mafaufau, ma ia tusia ai i lou loto, **Amene.**

**Aso Toona'i – Novema 25: “O le poloaiga fou – ia iai le alofa”**

**Tusi Faitau – Ioane 13: 31-35** (*A new commandment – let there be love*)

**Matua – ff. 34-35:** *“O le poloaiga fou ou te tuu atu ai ia te outou, ia outou fealofani; faapei ona ou alofa atu ia te outou, ia fealofani foi outou. O le mea lea e iloa ai e tagata uma lava o o'u soo outou pe afai ua outou fealofani.”*

Ua faaogaina lenei vaiaso e tatou te iloilo loloto ai le tulafono, i lona tulaga o loo faaalua ai le atoatoa a le Atua, faapea ai ma lona itu o loo faaalua ai o a tatou lava agasala. Ua faamanatu e lenei mea le moni o lona e ala mai ia Iesu e tausia le tulafono mo i tatou, ma totōina ai lona Agaga Paia i o tatou loto e faatoilaloina ai le agasala. O le tusi faitau o lenei aso, ua aumai ai le fetalaiga a Iesu e faatatau i se poloaiga fou: ia fealofani. E lē o se mea e 'fou', auā o

poloa'iga uma e sefulu o afiafi ai i tua o le alofa. Afai e te alofa i isi, e te le fasioti tagata, gaoi, taufaavalea, pepelo, poo se isi lava mea o loo apoapoa'i mai ai le tulafono.

E lua ni elemene tāua o loo poloa'i mai ai le tulafono. Muamua, o Iesu na mua'i alofa mai ia te i tatou (f. 34). O Iesu e iloa ai e le tagata le alofa moni o le Atua. O le alofa lea o loo talosaga mai ai Iesu ia tatou maua mai ai ina ia faatau-nuuina lana poloaiga ia fealofani—ia tatou alolofa atu auā ua alofaina i tatou e le Atua. Lona lua, o le taunuuga o lenei poloaiga o le a iloa ai e isi tatou te mulimuli ia Keriso. Lotogatasi, faamagaloga, alofa tunoa, agalelei - fa'alautele atu i tagata le talitonu: o le alofa o lo tatou taimi nei i le lalolagi. Ma e leai se molimau e sili.

**Tatalo:** Iesu e, o lou alofa mai ua le faatusalia i se isi lava mea. Se'i faatumulia ita nei i lou alofa le faatua'oaia, **Amene.**

## O ALII MA TAMA'ITA'I TOTOA FAALILOLILO (HIDDEN HEROES AND HEROINES)

**Aso Sā – Novema 26: “O se malosiaga faanatura – Sepela ma Pu'a”**

**Tusi Faitau – Esoto 1:15-21** (*A force of nature – Shiphrah and Puah*)

**Matua – ff. 15-17:** “*Ua fai atu foi le tupu o Aikupito i e na faatosaga i fānauga o fafine Eperu, o le igoa o le tasi o Sepela, o le igoa foi o le tasi o Pu'a ... 'afai o se tama ia fasioti ia te ia, a e afai o se teine ia ola ia.' A ua matatau i le Atua e na faatosaga i fānauga, e lei faia foi le mea na fai atu ai le tupu o Aikupito ia te i laua, a ua la faaola lava i tama tane.*”

E manaia le iloa o igoa a nai fafine faatosaga na tetena le faatonuga o le tupu o Aikupito, ma faasaoina ai pepe fafanu o le nuu o Isaraelu, a o nonofo ma faapologina ai i latou Farao. O Sepela ma Pua o ni fafine totoa faalilolilo o le Tusi Paia. E la te matata'u i le Atua, ma e fefefe foi ia Farao. E totoa i la'ua auā na sili atu ona la'ua faia o le amiotonu, nai lo le faia o le mea sese na faatonuina ai i la'ua e Farao. Na faatonu e faia le sese, ae ua vala'uina e faia le mea sa'o!

Ua fai nei fafina totoa ma faata'ita'iga lelei o tagata e mata'u ma usita'i i tulafono, e pei ona autū ai le matāupu o le vaiaso ua te'a. O le autū o lenei vaiaso, “Alii ma tama'ita'i totoa faalilolilo.” O Sepela ma Pua, atoa ai ma isi toa faalilolilo o le Tusi Paia o le tatou talanoa ai i lenei vaiaso, o fafine faatosaga ia na fesoasoani i le galuega foafoa (*creation*) o le Atua ma 'aumai ai lona meaalofa tagata i lalolagi, o faafine ia ua faapei “o se malosiaga faanatura”.

**Tatalo:** Le Atua Paia e, faafetai ona o lou meaalofa tagata e o Sepela ma Pua, ua tino mai ai galuega o lau Tulafono; fesoasoani ina mua ona faia le mea sa'o, ae te'ena le leaga, **Amene.**

**Aso Gafua – Nov 27: “O le mea e i ai le loto – Makiro, Noa, Hakelu, Maleka ma Tiresa”** (*Where there's a will – Mahlah, Noah, Hoglah, Milcah, Tirzah*)

## **Tusi Faitau – Numera 27:1-11**

**Matua – ff. 2-4:** *“Ua latou tutū i luma o Mose, ma luma o Eleasaro le ositaulaga, i luma foi o alii, ma le faapotopotoga uma, i le faitotoa o le falefetafai o le faapotopotoga, ua faapea mai, Ua oti lo matou tamā i le vao ... Pe tineia i se a le igoa o lo matou tamā i lona aiga, ina ua leai sona atalii?”*

E to’alima ni au uso tama’ita’i na latou faafesaga’i ma se tasi tū masani o le aganuu faa-Israelu. Ua maliu lo latou tamā o Selofeata, ae ua leai sona atalii e tauaveina lona igoa aemaise o le tofi o le aiga. O Makiro, Noa Hakelu, Maleka ma Tiresa, o le fanau teine ia o Selofeata, na latou maua le lototele e tautala ai i luma o le faapotopotoga ma finau atu, pe aisea o le a tineia ai le igoa o lo latou tamā i lona aiga ina ua leai sona atalii.

Ua tautala atu leni ‘au uso i le ‘aiā tutusa o tama’ita’i ma fanau tane o le nuu o le Atua. Afai ua oti lo matou tamā, ma ua leai foi sona atalii ae ua na’o tama’ita’i, o le a aveesea a la le tofi o lo matou aiga mai i le Atua? O le fanau teine o Selofeata ua faamaonia e le Atua lo latou tutū ma tautala atu ia Mose ma le faapotopotoga atoa. O nei ‘au uso tama’ita’i, ua totoa lava i latou auā sa latou le’i ufia faamanugase le mea sesē, ae ua filifili e tautala i le mea moni.

**Tatalo:** Le Atua e, ua ta’u fanau uma i matou e lau Afio. Ia faasa’olotoina i matou mai i tū masani ma faamasinoga o loo te’ena ai le ‘aiā tatau, **Amene.**

## **Aso Lua – Novema 28: “Filifili i le mea sa’o – fanauga a Isakara”**

**T. Faitau – 1 Nofo Tupu 12:32** (*Discerning what’s right – the men of Issachar*)

**Matua – f. 32:** *“O e o le fanauga a Isakara, sa popoto e faautauta e iloa ai mea e tatau ona faia e Isaraelu i ia ona po, o alii sili e lua selau, o latou uso uma foi e faalogologo mai ia i latou.”*

O le iloaina o le ituaiga e o mai ai i latou, e lē tutusa lea ma le iloaina o latou igoa! O ananafi na usuina ai igoa o le au uso tama’ita’i e to’alima (Maala, Noa, Hokala, Meleka, Tiresa), a o leni ua na’o le igoa o le aiga o loo ta’ua e le tatou tusi faitau aso. O loo iai le faitau afe ma le tau-valaauga o ta’ita’i ‘au ma ituaiga o tagata uma o lo’o o mai e lagolago Tavita. O le lisiga igoa ua pei o galu o le sami. O le fesili, e mafai faapefea ona tatou tuueseeseina i latou?

O le mea na iloga ai tagata o Isakara, o nei alii e lua selau ma o latou ‘au aiga, e foliga mai o lo latou ‘malosiaga’, o lo latou tomai e faamatalaina ai faailoga o taimi, ‘o le iloa ai le mea e tatau ona fai e Isaraelu’. A o le to’atele o i latou na faapotopoto e lagolagoina Tavita, ua na’o le faatumulia o latou loto mo se taua!

E masani ea ona tatou vaaia ni mea faapea i o tatou lotoifale? O le lagolagoina o se faamoemoe e mafai ona faapūmoo ai lo tatou vaai. E pei lava o le faalogo atu i le Agaga Paia, ma le mātauina lelei o faailoga o taimi. O mea ia e mafai ona fesoasoani ia’i tatou e galulue ai ma le faautauta i se faamoemoe.

**Tatalo:** Le Atua e, o lē valaauina o matou igoa, ua faateleina ona fevaevae’i le lalolagi ona o le faailogaina o i “latou” ma “matou”; tatalo o maotu loto i faaaliga o taimi, ma faia ai mea uma ma le faautauta, **Amene.**

**Aso Lulu – Nov 29: “Faatumauina le faatuatua i tala atu o le oti – Risepa”**

**Tusi Faitau – 2 Samuelu 21:1-14** (*Keeping faith beyond death – Rizpah*)

**Matua – f. 10:** *“Ona ave lea e Risepa le afafine o Aia le ie talatala, ma na fofola mo ia i le papa, e afua mai i le amataga o le seleselega, ua oo ina maligi mai le vai mai le lagi ia te i latou; ua le mafai ia te ia ona tuu ai o se manu lele ia te i latou i le ao, po o se manu feai i le po.”*

O le ata o se tinā o loo leoleoina tino o lona aiga e le'i tanuina, o se ata faamomoi loto ia. O le tala ia Risepa ua atagia ai se fafina, a'o se tinā alofa foi, ua toa le loto e lu'itau ai faai'uga ma faiga leaga a e pulea malo ma ituau.

O Risepa o le afaine o Aia, o le palake ia o Saulo na fanau ai Aremoni ma Mefiposeta. Ua fasiotia le fanau o Risepa ma ua faatāutauina latou i le mauga o Kipea i luma o le Alii (f. 9). Ona gaioia mai foi o le o ivi o Saulo ma ivi o Ionatana, ma ua fola faatasi atu i lea mea. Ona ave ai lea e Risepa le ie talatala, ma ua fofola ai mo ia i le papa, ma ua ia leoleoina ai loa o tino oti o lona aiga ua tāutau ma taatitia i le malae. Ua faalogo Tavita i lea mea ia Risepa, ona avea ai lea o ivi o Saulo ma Ionatana, ma ua faatasi ai ma ivi o ē na faatautau, ua tanumia ai i latou i laueleele o Peniamina i Sela, i le tuugamau o Kiso.

O le mataala o Risepa na i'u ai lava i le faalumaina o le tupu o Tavita i le tuuina atu o se tanuga lelei iā Saulo ma isi o ē na ia fasiotia. E tāua le mea na faia e Risepa ma e lē mafai foi ona tatou lē apei o le amanaiaina.

**Tatalo:** Le Atua amiotonu e, faafetai i lou auai mai pea i taimi matou te lu'itauina ai mea sese ma mea leaga o lenei olaga. **Amene.**

**Aso Tofi – Nov 30: “Tuuina atu o tatou tagata i aao o le Atua – Iapese”**

**Tusi Faitau – 1 Nofoaiga Tupu 4:9-10** (*Putting oneself in God's hands – Jabez*)

**Matua – ff. 9-10:** *“Ua sili le mamalu o Iapese i ona uso; na faaigoa foi lona tinā ia te ia o Iapesa, ua faapea, Ua ou fanaua o ia ma le tigā. Ua valaau atu Iapesa i le Atua o Isaraelu, ua faapea atu, E, fia manuia a'u ia te oe ma faalauteleina lo'u laueleele, ia ia te au foi lou aao, ma ia e leoleo mai ia te au ai le leaga, ina ne'i tigaina a'u. Na avatu e le Atua ia te ia le mea na ia faatoga atu ai.”*

Sa ou fesili ifo ia te au lava ia: O le a le mea a lenei tamaloa o fai ii? O le a se mea e manatua pea e uiga ia te ia? Ae aisea ua filifilia faatasi ai o ia ma toa o lenei vaiaso? O Iapese, e le'o ta'uta'ua o ia o se tagata malosi. Peita'i, o le mea o loo ta'uta'ua ai o ia ona puapuaga. Fai mai lona tina, 'Na ou fanauina o ia ma le tiga.' O lona igoa lava ia e ta'ua faatasi ma le tigā. O lea, e lē o se mea la e faate'ia ai, o lana tatalo i le Atua e faatatau i le faasaoina mai i tigā ma mea leaga. Na ia tatalo foi i le Atua ina ia 'au mai o ia i ia te ia.

Ua ta'utoaina Iapese auā sa ia faalagolago i le Atua ina ia fesoasoani mai i lana vaivaiga. O se tagata e mā'ale'ale tele. E na te lē aofia ni tulaga masani ua iloga ai tagata totoa, ae ua iai le loto e toa na te iloa ai lona faatauvaa ma le vaivai, ma e ioeina foi iai. O Iapesa ua faapei o tatou uma, e vaivai, fefe gofie, ma e lē atoatoa foi; ae le mafai ona natia le faatusa o le Atua na faia ai i tatou.

**Tatalo:** Le Atua e, faafetai mo tulaga uma ua e faia ai i matou. Matou te mā'ale'ale ma vaivai, ae ia faalagolago atu ma le lē aunoa i lau Afio, **Amene.**

**Aso Faraile – Tese 1: “Lagolago malosi, upu atamai – Pisila ma Akula”**

**T. Faitau – Gal. 18:1-28** (*Steady support, wise words – Priscilla and Aquila*)

**Matua – ff. 1-3 & 26:** *“Ua mavae atu ia mea, ona tuua lea e ia o Atenai, a e alu atu i Korinito; ua na iloa foi le tasi tagata Iutaia, o Akula le igoa, na fanau i Pono, na se'i sau mai Italia, ma lana avā o Pisila; auā na poloai mai e Kalaotio ia o ese atu i Roma tagata Iutaia uma lava; ua alu atu o ia ia te i laua; ona ua tasi foi lo latou faiva, ua nofo o ia ia te i laua, ma galue; auā o lo latou faiva le fai fale ie ... Ua afua foi ona tautala faamalosi o ia i le sunako; ua faalogo atu Akula ma Pisila ia te ia, ona la ave lea ia te ia, ma faamatala atu atili le ala o le Atua ia te ia.*

O ananafi, e na o le tasi le mau o le Tusi Paia na tuuina mai ai se ata o le tagata e toatasi. O le tusi faitau o lenei aso, o le mataupu atoa ua faapei o se faamatalaga faavavevave. O Paulo lenei, e pei o se tasi e masani ona e va'ai i le TV, femalagaa'i solo i le lalolagi, feiloai ma tagata o le lotoifale, galulue fa'atasi ma i latou, tala'i i lena nofoaga ma tuua iai sona aafiaga lautele i ola o tagata.

O Akula ma Pisila, o le tane ma le avā, o nisi ia toa faalilolilo o le Feagaiga Fou. Ua la maua le talalelei ia Paulo, ma ua la'ua faia ai le galuega faaauau o le talalelei. Ina ua la faalogo atu ia Apolo i totonu o le sunako, ona la ave lea ia te ia, ma faamatala atili le ala o le Atua ia te ia. O le galuega lea o ni tagata ua i le Atua. E galulue faalilolilo ina ia faasoa atili le ala o le Atua mo e ua le iloa. E ofoina le soifua ma le ola, ona le fe'au ma talalelei ua tuuina mai e le Atua mo tagata uma.

**Tatalo:** Faafetai le Atua, ona o e ua foai mai le faasoa i ala sili ona taunuu ai lou finagalo. Foai mai lou alofa tunoa e matou faia ai lou galuega, **Amene.**

**Aso Toona'i – Tesema 2: “Avefeau ma le feau – Epaferotī”**

**Tusi Faitau – Filipi 2:25-30** (*Messengers and meanings – Epaphroditus*)

**Matua – ff. 25-26, 30:** *“A ua ou manatu, e tataua ina auina atu ia te outou o Epaferotī, o lo'u uso lea ma le na ma galulue faatasi, ma le na ma matātau faatasi, o la outou ave feau, ma lē auauna mai i lo'u mativa. Auā sa naunau atu ia ia te outou uma lava, na atuaturvale foi o ia, auā na outou faalogologo ua ma'i o ia ... Auā na fai a oti o ia ona o le galuega a Keriso, e lei faapelepeleina foi e ia lona ola, a seia faaatoatoaina e ia mea sa totoe i lo outou auauna mai ia te au.*

O Epaferotī o se tagata taalo, ma o se tagata tosina foi. O ia o se avefeau na auina atu e le au Kerisiano i Filipi, ma la latou meaalofa ia Paulo i le falepuipui: o se fesoasoani lagolago ma se faailoga o le lotogatasi. O Roma (poo Efeso) e mamao ese mai Filipi. O se toeaina i lena faapotopotoga, ua ta'ua e Paulo o se 'tagata faigaluega', ua tuuina atu ai le tiute o le femalagaa'i ma ave le fe'au, ma ua toe foi mai nei ma le fe'au a Paulo. I le va o lana femalagaa'iga, sa ma'i o ia, ma o lenei faamatalaga puupuu mai le tusi a Paulo ua aumaia ai se lagona o le

felagolagomai. Na popole Epaferoti i ana aumea i le aiga ona o le popole ia te ia, ma sa popole foi Paulo mo i latou uma. O le tiute femalagaa'i e feagai pea ma le lamatia: o le malaga ai i va'a laiti, feagai ma ma'i, lamatia le pu'eina. O le fe'au atoa o lenei tusi e uiga i le tu mausali.

O le uiga o le igoa o Epaferoti, 'Ofoina mo Aferoti' (*Dedicated to Aphrodite*). O se faamanatu i nuu-faapaupau o loo siomia ai le au Kerisiano i Filipi. O se tasi lenei e le'i suia lava le igoa na tuuina atu e ona matua ia te ia, ae ua ese lana tautinoga i le taimi nei – ua ta'ua e Paulo o ia o le 'fitafita a Keriso', ma e tumau pea o ia i lenei faasinomaga.

**Tatalo:** Le Atua e, ia matou tu mausali i le galuega ona o lou alofa mai e ala ia Keriso Iesu. **Amene.**

## EFESO MA FAAOPOOPOGA – EPHESIANS PLUS

### 1. Ua lē toe tagata ese (*No longer strangers*)

**Aso Sā – Tesema 3: “Vaega o se tala atoa”** (*Part of a bigger story*)

**Tusi Faitau – Efeso 1:1-10**

**Matua – ff. 4-5:** *“Faapei ona ia filifili mai ia i tatou ona o ia, a o lei faavaeina le lalolagi, ina ia paia i tatou ma ia le mata'uleagaina i ona luma, i le alofa; ua na tofia i tatou anamua, ina ia aveva ma tamafai māna, ona o Iesu Keriso, e tusa ma le pule tunoa a lona finagalo.”*

Pe a mamafatū le olaga i tauiviga ma faafitauli, o le a faafaigofie lava ona tatou lē iloa atu le ata atoa o le ola, ae faafelavei ai i tatou i se mea ata la'ititi. Ua amata e Paulo lana tusi i Efeso i le faamanatu ma le folafolaga ua afifi atoa ai le tala mamalu atoatoa. O ulua'i fuaiupu e sefulufa o lenei tusi ua sasaa atoa ai e Paulo lana vaaiga i le tapuaiga ma le tumutumuga o le talalelei.

O le tapuaiga o le faavae lea o ana a'oa'oga, ma ua tusia mai i ona lava tiga—o loo tusia mai le falepuipui. Ua tuuina mai e Paulo se fa'ata'ita'iga o le uiga o le lototele i totonu o le nutimomoia o le tagata, ma ua faamanatu mai e lenei mea le ata atoa o le tala: ua foa'i mai mo i tatou le alofa o le Atua. Ua faaalua e Paulo o lenei tala e ala i le folafolaga a le Atua e aumaia ai mea uma i le lagi ma le lalolagi i le lotogatasi, ma lo tatou tulaga e pei ona filifilia ai i tatou, auā e fesootai mea uma. O mea uma na o le vaega o tala atoa o le Atua—o le mealilo sa ufitia muamua e le tulafono, a ua faia fua nei mo i tatou e ala i le galuega faaola a Iesu i luga o le satauro. I le faasologa o lenei vaiaso, o le tatou faasoa i le uiga o le aofia ai i toto o le tala atoa o le Atua.

**Tatalo:** Le Tamā paia e, oute vivii ia te oe auā ua e filifilia a'u e aveva ma vaega o lou tala atoa e ala i le galuega faaola a Iesu i luga o le sarauro **Amene.**

**Aso Gafua – Tesema 4: “Faamaufaailogaina”** (*Marked with a seal*)

**Tusi Faitau – Efeso 1:11-14**

**Matua – ff. 13b-14:** *“Ua outou faatuatua ia te ia, ona faamaufaailogaina ai lea o outou e le Agaga Paia, o le na folafolaina mai; o le faamaoni o ia o lo*

*tatou tofi, seia iu ina faaolaina e le Atua o i latou ua fai mona, ina ia viia ai lona mamalu.”*

I le vaega lenei o le tusi o Efeso, o lo’o talanoa le Paulo e uiga i se teu oloa faamaoni, e sili atu nai lo se tasi e teuina oloa faa-le lalolagi, ma e sili atu foi lona faatuatuaina nai lo se tasi e fefa’atauaiga ai tupe. Ina ua uma ona faataoto mai e Paulo lenei talalelei, ua faailoa mai foi e le Aposetolo e i tatou uma i lenei tala fiafia—ua uma ona tatou maua lenei ‘totogi’. Ua taliaina i tatou ma faamaufaailogaina e le Agaga Paia.

O le Agaga Paia ua lē na o se teu oloa o ia, ae e tuuina mai e le Agaga ia i tatou le oloa tele i le taimi nei, a o se tofo foi i mea o le a oo mai. O lo ua tatou ola nei i le folafolaga, ma maua ai foi lo tatou tofi. O le mea ofoofogia o lenei tofi, e mō tagata uma.

**Tatalo:** Agaga Paia e, faafetai ona o oe o la’u faamautinoaga. Faafetai ona ua e valaauina a’u ma filifilia a’u, ua mafai ai ona ou tu mausali i lau faamaoniga o lo’u tofi, i le taimi nei ma le faavavau. **Amene**

### **Aso Lua – Tesema 5: “Valaauina i le mana fefulisa’i”**

**Tusi Faitau – Efeso 1:15-23** (*Called into upside-down power*)

**Matua – ff. 19b-21a:** *“E tusa ma le galuega a lona mana tele lava, na ia mauā galue ai ia Keriso, ina ua toe faatuina mai o ia nei e ua oti, ma faanofo ia te ia i lona itu taumatau i mea o i le lagi, e silisili lava i alii sili uma lava, ma faipule, ma e ua malolosi, ma alii, ma igoa uma lava e ta’ua.”*

I vaitaimi o Paulo, sa avea Efeso ma nofoaga autū o taa’iga, o se nofoaga sa iloa uma ai le pule ma tulaga faapolokiki aemaise talitonuga faa-le lotu. Na iloa e Paulo lenei mea ina ua ia tusi ma le naunauta’i e uiga i le mana lē mafaatusalia o Keriso. Mo le Aposetolo lava ia, o le mana na toe faatūina mai ai Iesu mai le oti, ua vavaeeseina ai o ia mai i soo se mana faa-le lalolagi; sa ia tu malosi e tete’e atu i taula’iga faa-le aganuu ma ni manatu i pule faa-le lalolagi. Ona o le mana o le Keriso toetu na faia i totonu ia te ia lava ia, e ola foi lea mana i totonu ia i tatou.

Peita’i, e tatou te tau mānatunatu poo fea o i ai lenā mana; ma tatou lagona ai le vaivai ma le leai o se fesoasoani mai, ma manatu faatauvaa ai i upu o Paulo i lenei faitauga; ae ia tatou mautinoa, o lenei mana e faamoemoe i so tatou galuega poo so tatou gaiogiga. O le mana lenei na fanau mai lava i le puapuaga, e masani foi ona maua lona atoatoa i le faateleina o puapuaga.

Ua faamanatu mai e Paulo o ala uiga ese o le Atua e lē gatusa lea ma o tatou ala. E liliu e le Atua le mana ma le pule faa-le lalolagi i o latou ulu, ma e mafai ona faamalosia i tatou e tusa lava po o le a le vaivai tatou te lagonaina, o le mana lava lea e tasi na toe faatuina mai Keriso mai le oti o loo ola i totonu ia i tatou.

**Tatalo:** Le Alii e, ua e fultua faamoemoega faa-le aganuu, faaecaina ē vaivai; o lou mana tuufaafeagai e le mafaatusalia i se isi lava mana faalelalolagi. **Amene.**

### **Aso Lulu – Tesema 6: “Faaolaina i le alofa tunoa ua faalumaina”**

**Tusi Faitau – Efeso 2:1-10** (*Saved by scandalous grace*)

**Matua – ff. 8-10:** “*Auā o le alofa tunoa ua faaolaina ai outou i le faatuatua; e le mai ia te outou foi lea, a o le mea ua foaiina mai e le Atua; e le ona o galuega, ina ne’i mitamita se tasi. Auā o lana lava galuega i tatou, na faia i tatou ia Keriso Iesu, ina ia faia galuega lelei, na saunia anamua e le Atua, ina ia tatou savavali ai.*”

I lenei faitauga malosi mai le tusi o Efeso, fai mai Paulo e faaletonu i tatou uma. Ua lilofia i tatou uma i le natura o le agasala, ma le lalolagi o loo siomia ai i tatou. Nai lo le to’asā o le Atua, ua faatumulia i tatou i le alofa tunoa. E lē faaolaina i tatou i a tatou lava galuega – e leai se mea tatou te mitamita ai – ae ua faaolaina i tatou i le alofa tunoa e matuā uiga ese ma le faalumaina, ua faapea foi ona suia ai i tatou.

O upu a le Aposetolo loo aofia ai tagata uma ma i tatou uma. O isi upu ia o le faaofiina. Mo i latou ua manatu e lē mafai ona faaolaina i latou, poo i latou foi ua manatu latou te le agavaa i lenei mea, o le upu a le Aposetolo o Paulo, e aofia i tatou uma i lenei faaolataga. O le agalelei silisili lea o le Atua, o loo aapa mai ia i tatou ma faapotopotoina i tatou i totonu ia te Ia. O le alofa tunoa e saoloto ma taualoa, e lē limataofia ae matagofie, e agamalu ma malosi, e sili atu i mea uma, ma e lūa foi.

**Tatalo:** Le Alii e, faafetai ona o oe e tamaoaiga i le alofa mutimutivale. Toe faafou a’u i lenei aso i le mea moni ofoofogia, ma faamautinoa mai ia te a’u, ua ou aofia ai. **Amene.**

**Aso Tofi – Tesema 7: “Aofia tagata uma”** (*Everyone’s included*)

**Tusi Faitau – Galuega 11:1-18**

**Matua – ff. 16-17:** “*Ona ou manatua lea o le afioga a le Alii, ua faapea mai, Na papatisoina outou i le Agaga Paia. O lenei, afai e tusa le alofa ua foaiina mai e le Atua ia te i tatou atoa ma i latou, ina ua faatuatua i le Alii o Iesu Keriso, o ai ea a’u nei ou te mafaia ona vavao atu i le Atua?*”

O le faaaliga a Peteru sa iloa ai o le faaaofia o tagata uma i le faalapotopotoga ia Keriso; e aofia ai ma tagata ua faate’aeseina e nuu ma nisi faapotopotoga. Na faaali atu e le Agaga Paia ia Peteru ua talepeina e Iesu pa pupuni i le va o Iutaia ma Nuuese, ma e tatau ona ia faaaofia i latou uma ma le loto atoa. O se suiga tele lenei mea mo Peteru. O le mea na sau’i, o le Atua e mo ‘Israelu’, mo i latou sa aofia i le feagaiga tuai. Ae o lenei ua faailoa atu ia Peteru, sa fuafua mamao lava e le Atua lona aapa atu i tagata uma; o lana tala e lē faatapulaaina, ma o le faaolataga foi e mo tagata uma.

**Tatalo:** Le Alii e, matou te ofo i ala ua e foai ai lou alofa mo e mana-naomia; faafetai i lou faaaofia ai o tagata uma i lou tala atoa. **Amene.**

**Aso Faraile – Tesema 8: “Talileleia i totonu o le aiga”**

**Tusi Faitau – Efeso 2:11-22** (*Welcomed into the family*)



**Matua – ff. 19, 21:** *“O lenei, e le toe tagata ese outou, po o e ua āumau, a ua nuu faatasi ma le au paia, o le aiga foi o le Atua ...ua faatatauina ia te ia le fale atoa, o loo alu ae, ina ia fai ma malumalu paia i le Alii.”*

O upu ia Paulo ua atagia ai o le “Talilleia o tagata ese i totonu o le aiga”—o le gagana o le alofa ma le suiga ua ia faaaogaina, o le agalelei ma le malosi o le alofa tunoa o le Atua o loo galue, aumaia o fanau ua leiloloa i lona aiga ma tuuina atu ia i latou le tulaga tutusa. E le gata ua aofia ai i tatou i le aiga o le Atua, ae o i tatou foi o se vaega o le faapotopotoga ua tuufaatasia ma le faamoemoe e tasi. I le faa-Iutaia, o le malumalu o se fale taua faa-le lotu ma faaupufai, ae ua tuuina mai e Paulo ia i tatou se malamalamaga fou i le mea e uiga i le malumalu—o soo se nofoaga lea e gatasitasi ai tatou ona o Keriso. E le o toe tagata ese i tatou, pe mai fafo foi, a ua tatou i ai lava i totonu o le aiga a Keriso. O lea, ina ua tusia e Paulo lenei mea, sa ia mafaufau i se nuu fou, e le se Iutaia poo Nuuese o le tasi i le isi, a ua avea ma nuu e tasi ma fausia faatasi ai le aiga ia Keriso.

**Tatalo:** Le Alii e, matou te viia lau Afio auā ua le toe tagata ese i matou ae ua avea ma aiga o le Atua e ala i le maliu o le Keriso Faaola, **Amene.**

**Aso Toona’i – Tesema 9: “O suli o le folafolaga”** (*Heirs of the promise*)

**Tusi Faitau – Efeso 3:1-6**

**Matua – f. 6:** *“Ia avea nuu ese ma suli faatasi ma tino e tasi, ma ia tofusia faatasi i lana sa folafola mai ona o Keriso Iesu i le tala lelei.”*

O le avea ai ma Kerisiano ma le mauaina o le matagofie o le alofa tunoa, e le tatau ai ona tatou teena i latou ua suli faatasi ma i tatou i totonu o le aiga a Keriso—e oo lava i nisi e le’i mafaufauina. I le fuaitau na tatou su’esu’eina i le Aso Tofi ua mavae, o se a’oa’oga tele ia Peteru o le taliaina o tagata Nuu-ese; atonu na faapea foi mo le to’atele o tagata Iutaia sa i ai i le uluai ekalesia. O le matagofie foi lea o a’oa’oga a Paulo i lona talepeina o pa puipui uma i le va tuunonofo a tagata, ma lē tuu avanoa ai mo se fefaafinauiga: o tagata uma “o suli i le folafolaga” ma e talia lava soo se tasi.

Na tatou amata lenei vaiaso ma mafaufau i le “Tala Atoa” o le alofa o le Atua, ma ua tatou toe foi atu i le na matāupu. Talu mai le amataga, na faia e le Atua lenei tala, e faailoa mai le na mea lilo e ala i perofeta, ona faaalua atoatoa ai lea ia Keriso. Sa finagalo le Atua e faapotopotoina tagata Iutaia ma tagata o Nuuese e fai ma ana Aiga, ma ua finagalo pea o Ia e faapotopotoina i tatou ma tagata uma ina ia tutusa ma faamamaluina. O le Tala Atoa o le talalelei o se tala i le alofa tunoa ma le agalelei tele, e valaauina i tatou uma i se nofoaga e mafai ona tatou nonofo ai ma lo tatou Tamā oi le Lagi ma faapea atu ai ua le’o toe tagata ese i tatou; o suli i tatou, faatasi ma Isaraelu, i le folafolaga ia Keriso Iesu.

**Tatalo:** Iesu e, matou te faafetai ona o pa puipui ua e tatalaina ma faia ai i matou uma ma suli o le folafolaga ma le tala atoa i le alofa o le Atua. **Amene.**

**EFESO MA FAAOPOPOGA – EPHESIANS PLUS**

## 2. Se ola ta'uaogaina i lou valaau (*A life worthy of your calling*)

**Aso Sā – Tese 10: “E faaoga e le Atua soo se tagata e folafola lana Upu”**

**Tusi Faitau – Efeso 3:7-13** (*God can use anyone to preach his word*)

**Matua – ff. 7-8:** *“Ua fai a'u ma auauna a lena tala lelei e tusa ma le mea foaifuaina mai i le alofa tunoa o le Atua, ua na foaiina mai ia te a'u i le galuega tele a lona mana. Ua au mai ia te a'u, le aupito itiiti lava i le au paia uma, lenei lava alofa tunoa, ina ia ou folafola atu i nuu ese le oloa faula'i o Keriso e le masu'esu'eina lava.”*

O le iloaina e Paulo o lana tofiga na tuuina mai e le Atua, e ui i le lē agavaa, e le'i tuumāmā o le avea ma tagata filifilia e folafola atu le talalelei i Nuuese. Na maua e Paulo se faaaliga e le masani ai ma ua tatau ai ona alu e tuuina atu o lea lava faaaliga i Nuuese.

O lenei mea na tupu ia Paulo na faamanatu mai ai ia te au se tulaga mai le amataga o o'u tausaga talavou. Ua faamautinoa mai ai ia te a'u, “E faaoga e le Atua soo se tagata e folafola lana upu.” E iai tai tatou te manatu ai i o tatou lē tauagavaa i le galuega tele a le Atua i le lalolagi. Peitai, o Paulo na faatuatua lava i le Atua ma ua ia mautinoa ai i lana tofi o le fai ma aposetolo i Nuuese.

E mafai e le Atua ona faaogā soo se tasi e manatu o ia o loo avanoa e faaoo atu lana fe'au i le lalolagi. O le valaau mo i tatou uma ina ia faaavanoaina i tatou mo le fe'au o loo finagalo le Atua e faaogā e momoli atu ai i la tatou tupulaga.

**Tatalo:** Le Alii e, fesoasoani mai ina ia ou faaavanoaino le taimi e te finagalo ou te folafola lau upu i ou lava tagata. **Amene.**

**Aso Gafua – Tesema 11: “Iloaina le loloto o le alofa o Keriso”**

**Tusi Faitau – Efeso 3:14-21** (*Understanding the depth of the love of Christ*)

**Matua – ff. 17-18:** *“Ia nofo mau foi o Keriso i o outou loto i le faatuatua; ina ia maua ma faavaeina outou i le alofa, ia mafai ai ona iloa lelei e outou atoa ma le au paia uma, o le uiga o le lautele, ma le umi, ma le loloto, ma le maualuga.”*

O se tasi o fe'au autu na tofia i ai Paulo e momoli atu i le ekalesia i Efeso, o le fe'au o le loloto o le alofa o Iesu i tagata o Nuuese. Na ia faamautuina ai le mea moni, e tele mea e manaomia ona ia malamalama i ai i le loloto o le alofa o le Atua ia i tatou ia Keriso Iesu.

O le iloaina o le loloto o le alofa o le Atua e ala mai i le Keriso Iesu, e mafai ai ona tatou faafesaga'i ma taimi faigatā o le olaga. E iai taimi tatou te manatu ai ua tuulafoaiina i tatou e aiga ma nisi e latalata mai faapei o uo ma e masani, ona tatou faavaivai ai lea i fitā o lenei olaga. Peita'i, o le alofa o le Atua i le lalolagi agasala na lē tuua ai i tatou ina ia fano i le agasala. Ae ua foai mai lava e le Atua lona alo ina ia faaolaina ai i tatou, ma ia faia ai i tatou mona aiga. Ia aua ne'i faavaivaiina i tatou i mea a lenei lalolagi auā ua faia i tatou ma aiga o Keriso e ala i le Alofa mai o le Atua. E alofa le Atua ia i tatou e le faatuaoia, e tusa lava pe faatoilaloina i tatou i mea a lenei lalolagi. Ia aua ne'i tatou manatu faatauvaai i lona alofa e tusa lava pe tatou te lē malamalama i ai.

**Tatalo:** Le Atua le Tamā, faafetai ona o lou alofa mo a'u. E ui i le tele o taimi ou te le malamalama i ai ae faalagolago pea i lou alofa mai. **Amene.**

**Aso Lua – Tesema 12: “E lē faate’aeseina mai le alofa o le Atua”**

**Tusi Faitau – Roma 8:37-39** (*No separation from the love of God*)

**Matua – ff. 38-39:** “*Auā ua ou mautinoa, e le mafaia e le oti, po o le ola, po o agelu, po o alii, po o e malolosi, po o mea i nei ona po, po o mea atali, po o le maualuga, po o le loloto, po o se tasi mea na faia, e le mafaia e ia mea ona faate’aeseina mai i tatou i le alofa o le Atua, o loo ia Keriso Iesu lo tatou Alii.*”

Na ou mauaina se avanoa e talanoa ai ma se tamaitai talavou, ma na faasoa ai ona lagona e peisea'i e tatau ona ia faia mea uma e tatau i le alofa o le Atua. O lana talanoa mai, o taimi uma e faia ai se mea e na te lagona e le fiafia ai le Atua, e peisea'i ua mamao ese le Atua ma ia. O lona manatu, o lana amio e faia e faataumamaoeseina ai o ia mai le alofa o le Atua.

O loo manino lava, e pei o lenei tamaitai talavou, o le toatele o i tatou e faatusaina le Atua le Tamā oi le lagi e faapei o lo tatou tamā faa-le lalolagi. Tatou te manatu e mafai ona tatou maua lona alofa e ala i mea lelei tatou te faia. Ae peitai, e le o le amio poo galuega lelei na aumaia ia i tatou le leleiga ma le Atua; o lea la, e le o so tatou lelei e faatumauina ai i tatou.

Ua toe faamanatu mai e le tusi nei o Efeso ia i tatou o le alofa o le Atua iā Keriso Iesu e lē o se mea tatou galue i ai pe tauia foi i so tatou mea e fai. E lē faapei le Atua o se tagata e faalatalata mai pe a tatou lelei ma alu ese pe a tatou leaga. E leai se mea e mafaia ona faate’aeseina i tatou mai le alofa o le Atua o loo ia Keriso Iesu lo tatou Alii.

**Tatalo:** Le Tamā e oi le lagi, foai mai le malamalama loloto e iloa ai le moni o lou alofa mo i matou. **Amene.**

**Aso Lulu–Tese 13: “Ia taumafaia e taofi noanoataga o le filemu”**

**Tusi Faitau – Efeso 4:1-6** (*Make every effort to keep the bond of peace*)

**Matua – ff. 1-3:** “*O lenei, o a'u o le ua noanoatia ona o le Alii, ou te aioi atu ia te outou, ia outou savavali ia tusa ma le valaau ua valaauina ai outou. Ia outou loto maualalo ma agamalu, ma onosai. Ia outou faapalepale le tasi i le tasi i le alofa. Ia taumafaia e outou ona taofi o le loto gatasi i la le Agaga i le noataga o le filemu.*”

O Paulo o loo talanoa mai i se mataupu e foliga faigofie, ae e faigata tele ona ola ai i aso uma. Ua ia faamanatu mai o le ave ma tagata talitonu e tatau ona onosai ma feutaga'i ma isi i le alofa. Ua toe faaopopo mai, e tatau ona faia taumafaiga uma e faatumauina ai le lotogatasi o le filemu i le sootaga ma le Agaga. O le nonofo faatasi ai ma e ua lē pulea a latou amioga, fai mai Paulo e tatau ona tatou faia le mea e tausia ai sootaga o le filemu; o se faatonuga e matuā faigatā ae tatau ona mulimuli ai.

Atonu o se tulaga faigata lenei mea, auā ua ia te oe le taumafaiga ina ia tausi le filemu ae le o 'auai faatasi ai le manatu o le isi itu i le na mea. O le fesili: o le a sou faatatau i lea tulaga? Ua faapea mai le Tusi Paia, 'Ia outou nonofo

filemu ma tagata uma lava' ( Roma 12:18 ). O le fesili e fesili soo ai le tagata lava ia, 'Po ua ou faia ea taumafaiga uma? Po ua ou faia ea le tele o mea o loo i totonu iā te a'u?' Afai o lau tali o le ioe, o le mea e totoe o le tatalo mo le isi itu. Tatalo ina ia pai atu le Alii i o latou loto. Ua ia i tatou le galuega o le au faatuatua, ia faia taumafaiga uma e faatumauina ai le sootaga o le filemu.

**Tatalo:** Le Tamā paia e, foai mai lou alofa tunoa e faaauau ai le ola taumafaiga e tausia ai sootaga o le filemu. **Amene.**

### **Aso Tofi – Tese. 14: “Ia tutupu ma avea ma tagata matua o le tino o Keriso”**

**Tusi Faitau – Efeso 4:7-16** (*Growing to become the mature body of Christ*)

**Matua – ff. 15-16:** “*Peita'i, a o tautalatala faamaoni i le alofa, ia tutupu i tatou ia te ia i mea uma, o le ulu lava ia, o ia foi o Keriso; e mai ia te ia ona tupu o le tino uma lava, o loo o faatatauina ma faasooina i ua uma lava e fesoasoani i ai, e tusa ma le galuega i le fua o itu tino taitasi, ia iu ina atiina ae le tino e ia lava i le alofa.*

O taimi uma lava ou te vaai ai i se pepe fou, e maofa lava le loto i le foafoaga a le Atua i le auala na ia faaatoatoaina ai lenei tino itiiti. Ae e manaomia ona matua le alualutoto ina ia mafai ai ona fa'ataunu'uina galuega uma na faia ai. O le ola i totonu o le alualutoto o loo atoatoa i ai le ola na te manaomia; ae o le taimi ma le fafagaina ma nai isi mea e pei o le si'osi'omaga e ola ai ma le potō e a'oa'oina ai e fausia ai le tulaga e avea ai le pepe ma tagata matua. O le malosi atoatoa o le pepe e faalagolago i le tausiga.

E faapena foi i le tino o Keriso. Ua ia togiolaina i tatou, ma ua oo nei ia'i tatou le taimi e tuputupu a'e ai ina ia avea ma tino matua e fai ai i tatou ma sui o Keriso, ma ia tatou se'e ai i se'evae uma ua saunia e Keriso mo i tatou. E tāua tele le tausiga ma le a'oa'oina ina ia tatou mafaia ona faataunu'uina o vaega o le tino o Keriso ua tofia ai i tatou. O lea la, e tatau ona tatou manatu loloto i la tatou vaega i le ola tuputupu a'e e avea ma tagata matua o le tino o Keriso, ina ia fegāoioi lelei ai o vaega uma o le tino; o le Ekalesia lea.

**Tatalo:** Le Alii e, faafetai i lou taliaina o i matou e avea ma tino o Keriso. Fesoasoani i lo matou pito laau a'o tautua ai i totonu o lau Ekalesia, **Amene.**

### **Aso Faraile – Tesema 15: “Ave ese le mea tuai e ofi ai le mea fou ”**

**Tusi Faitau – Efeso 4:17-24** (*Take off the old to put on the new*)

**Matua – ff. 22-24:** “*Ina ia outou to ese le tagata tuai o loo ua leaga, e tusa ma le amioga faaanamua, e tusa ma tu'inanau e faasese ai. A e peitai, ia toe fuataiina manao o o outou loto, ma ia oofu outou i le tagata fou ua faia e foliga i le Atua, i le amiotonu ma le amio lelei e faamaoni.*”

A o faasolo pea le tatou faitauga mai le tusi o le Aposetolo ia Efeso, ua tatou oo mai i le fuaitau lenei o loo talanoa ai Paulo ina ia tatou “ave ese le mea tuai sa tatou ola ai, ina ia ofi ai le mea fou ua uma ona saunia e Keriso.” O le faatāua o lenei aso o loo talanoa sa'o i le soifua ma ola o le tagata. Afai ua tatou mautinoa i ola ia Keriso e manuia ai i tatou, e tatau foi ona tatou ola i le ola fou

ua uma ona faia e Iesu mo i tatou. E le upu moni lava, e le mafai e se ofi fou ona ofi faatasi ma le ofu tuai. E le mafai foi ona utu le uaina fou i totonu o se fagupa’u tuai; e pāpā ai fagupa’u ma ma’umau ai le uaina fou. E faapena foi le olaga ua tatou ola ai; afai ua tatou ola ia Keriso, fai mai Paulo, *ia to ese le tagata tuai ... ma ia oofu i le tagata fou ua faia e foliga i le Atua.*

O lo tatou ola fou ia Keriso ua matagofie ia, ae e lē mafai ona taualoa lona matagofie pe afai tatou te lē ave ese o le ola tuai.

**Tatalo:** Le Alii e, faafetai ona o le ola fou ua e aumaia mo i matou. Fesoasoani ia matou ave ese le tagata tuai e matagofie ai le ola fou, **Amene.**

**Aso Toona’i – Tesema 16: “O au upu e fesoasoani e fausia ai nisi”**

**Tusi Faitau – Efeso 4:25-32** (*Your words can be helpful in building others*)

**Matua – ff. 29-30:** “*Aua ne’i alu atu se upu leaga ai o outou gutu, na o le upu lelei e ati a’e ai i mea e aoga, e tupu ai le lelei i e faalogologo i ai. Aua foi tou te faatiga i le Agaga Paia o le Atua, ua faamaufaailogaina ai outou ia te ia, seia oo i le aso e faaolaina ai.*”

A oo i fuafuaga uma o le Atua mo i tatou i le lalolagi, e tatau ona tatou malamalama i le mamana o tatou gutu ma upu tatou te tautatala i ai. E tāua a tatou upu auā e mafai ona tatou faaaogaina e fausia ai olaga o tagata. Ua faailoa mai e nisi tusi o le Tusi Paia, o le ola ma le oti o loo i le malosi o le laulaufaiva (Faataoto 18:21); o lona uiga o mea tatou te tautala ai e mafai ona aafia ai le si’osi’omaga o loo tatou ola ai. O upu tatou te fai atu ai e mafai ona atia’e ai pe a faaeteete ma iloa ituaiga o upu tatou te tautatala ai i aso taitasi.

O loo ua faapea mai Paulo ia Efeso, e lē tatau ona tatou faamatuu atu ni upu leaga i o tatou gutu, a ia na’o mea e aogā e atia’e ai. O lea la, e iai la tatou pule i mea tatou te faatagaina e sau mai le gutu. Afai o le tulaga lenā, ia tatou filifili e tautatala i upu lelei e mafai ona atia’e ai isi tagata.

**Tatalo:** Le Tamā e, ‘aumaia lou alofa e faaeteete ai upu e tautala ai a matou gutu; ia tautala lava i upu lelei e fausia ai o matou tua’oi, **Amene.**

## **EFESO MA FAAOPOPOGA – EPHESIANS PLUS**

### **3. Olaina i le malamalama** (*Living in the light*)

**Aso Sā – Tesema 17: “Ola i le malamalama”** (*Living in the light*)

**Tusi Faitau – Efeso 5:1-14**

**Matua – f. 8:** “*Auā sa outou pouliuli anamua, a o lenei ua outou malamalama i le Alii; ina savavali ia pei o e ua malamalama.*”

O le autu o lenei vaiaso o le ‘Ola i le Malamalama’. O le tasi nei o autu e masani ona tatou faalogo soo i ai i lauga o faifeau aemaise pe a latalata mai le vaitau o le Kerisimasi. E fia talosagaina i tatou i lenei vaiaso e su’esu’e auiliili le mea o fai mai ai Paulo ia Efeso e uiga i le ola faapaiaina, ma o le a foi le uiga o le na mea i lona konitekisi (*context*). Ua oo mai le valaau – ‘Ia ola e pei o fanau o le malamalama’ – ia iloa Iesu i totonu ia te oe.

A o tatou faitau ma manatunatu i lenei vaiaso, o lo tatou lava valaauina i le ‘Ola i le malamalama’ o loo i ai foi se faasiliga manatu. A o tatou faitau, e le mafai ona tatou le amanaiaina le mea moni e faapea o loo tatou faatofuina foi i se isi tala – o le tala i le falemanu i Peteleema, o le tala i agelu ma leoleo mamoe, o manu ma tupu. E mafai faapefea ona fesootai nei tala e lua? Tatou malaga i lenei vaiaso ma sailiili loloto iai.

**Tatalo:** Le Atua o le malamalama ma le alofa, fesoasoani i lo matou sailiili ai i le ola i le malamalama e pei ona tusia ai mo Efeso, **Amene.**

**Aso Gafua – Tesema 18: “Faatoilaloina le inoino”** (*Overcoming hate*)

**Tusi Faitau – 1 Ioane 2:7-11**

**Matua – f. 9:** “*O lē faapea, o i le malamalama o ia, a o loo ‘ino’ino i lona uso, o i le pouliuli lava ia ua oo mai i ona po nei.*”

O le faitauga o lenei aso o le a tatou se’e atu ai i le tusi Muamua a Ioane (aua le popole, o taeao tatou te toe foi ai i Efeso). A o faaauauina le autu o le “ola i le malamalama”, e taua faitauga o lenei aso. O le tatou tusi faitau filifilia o loo talanoa e uiga i le leai o se malamalama ma le leai o se alofa. O le fautuaga a Ioane (Muamua) o le malamalama o Keriso i totonu ia’i tatou e maua ai le alofa. O i latou e faaalua le inoino e ‘leai se malamalama’, o loo iai se faamalosiuga ina ia latou liliuese mai le inoino ae ola i le ala o le malamalama ma le alofa.

O le faatusa o le malamalama o le mōlīga’o. Ua faia le nā mea ma taulaiga mo le faamanatuga, ae e foliga mai foi o ni faatusa laititi e tetee atu ai i le inoino ma lona nofoaga. O le malamalama na fa’aaogaina lelei e fa’afeiloa’i ai fe’au eseese o le alofa ma le fa’amoemoe.

**Tatalo:** Iesu e, le malamalama o le lalolagi, ua leai se vaipanoa e le’i susulu atu ai lou malamalama. Faafetai tetee atu i le lalolagi inoino, **Amene.**

**Aso Lua – Tese. 19: “Fautuaga mai ia Ioane ueselē”**

**Tusi Faitau – Efeso 5:15-21** (*Advice from John Wesley*)

**Matua – f. 18:** “*Aua foi ne’i onā outou i le uaina, o le mea e ulavale ai; a ia faatumuina outou i le Agaga.*”

Ua tatou toe foi mai i le tusi o Efeso, ma ‘aumaia ai upu o le matua ua foliga mai o se poloaiga e sili ona mamafa ina ia aloese mai le onā ma amioga matagā. Ua tatou latalata atu i le vaitau o pātī o le Kerisimasi. O le fesili, o le a so tatou faitau i nei fuaiupu ma le vaai atu i le vaitau o aso fiafia?

O le talitonuga lautele e uiga i le Metotisi e faapea o i latou o tagata ua atoatoa (*teetotal*). E faamaonia lenei faamatalaga i le vaitaimi o le Victorian, o le *teetotalism* ma le ‘faia o le tautoga’ sa matuā lauiloa i le li’o Metotisi. Ae ui i lea, o Ioane Ueselē, e le’i atoatoa. E masani ona ia inuina se ‘tama’i pia’. A o le mea na matuā te’ena e Iaone Ueselē ma tautala leo tele ai o ia o le soona taumafa o mea malolosi e pei o ‘mea sui’ (*gin*).

E le o se vaiinu e aumai i totonu o se fagu e manaia lona teuteuga; a o se mea e matua oona ma molosi tele. Na mafai ona iloa e Ueselē le leaga e mafua

ona o le tagofia o ava malolosi; e le gata e faaleagaina ai le tagata, ae e aafia ai ma le aiga atoa. O nei fuaiupu mai le Efeso e le’o fai mai e tatau ona avea i tatou uma ma tagata ua atoatoa. Ae o loo faamalosia i tatou e faia faaiuga potu ma saili le faa-malieina ma le olioli e ala i le mana o le Agaga Paia nai lo le sailia i nofoaga sese.

**Tatalo:** Le Atua o le potu, fesoasoani ina ia ou maua le potu ma le atamai e faia ai filifiliga lelei a’o matou aga atu i aso fiafia, **Amene.**

**Aso Lulu – Tese. 20: “Luga o le ala i Peteleema”** (*On the way to Bethlehem*)  
**Tusi Faitau – Efeso 5:22-33**

**Matua – f. 33:** *“A o outou, ia taitasi outou ma alofa i lana lava avā faapei o ia lava ia te ia; o le fafine foi ia ava o ia i lana tane.”*

A o faaauau pea lo tatou malaga faatasi i le faitauina o le tusi o Efeso, o le matua ua filifilia mo lenei aso ua ou mafaufau loloto ai i se tasi foi malaga tāua i luga o le ala i Peteleema. A o lata i le Aso Kerisimasi, tatou te manatua ai le tala ia Maria ma Iosefa na malaga atu i Peteleema. O Iosefa e mai le aiga ma le gafa o Tavita, ma e tatau ona toe fo’i i le aai e lesitala i le tusiga igoa. E o faatasi Maria ma ia auā, e pei ona ta’u mai e le Evagelia a Luka i le mataupu e 2, sa ‘tautō o ia e faaiipoipo iā te ia a’o tō ai o ia i se tama’. O le isi auala e malamalama ai ua tautō e faaiipoipo. O se feagaiga aloaia lea i le va o aiga ma sa noatia faa-let ulafono e pei o le faaiipoipoga lava ia. O le mafuaaga lea na mafaufau ai Iosefa e tatala lemu Maria ina ua ia faalogo ua maitaga o ia (Mataio 1). Sa noatia faa-le tulafono le tasi i le isi e ui lava e lei faia se sauniga o le faaiipoipoga.

Pe sa faape’i lenā malaga? Na i ai ea se felagolagoma’i ma fetausia’i—o upu faamalosi o le tasi i le tasi, malologa i le ala pe na faia ai ni mana’oga a le tina ma’itaga? Pe sa i ai ni taimi tigā, o upu maamaai, o taimi o le lē onosai po o le lē fiafia ona o le faigatā o le faia o se malaga tele a o maitaga mamafa na afaina ai? E lē tele so tatou iloa e uiga i le malaga a Maria ma Iosefa. Ae ina ua mae’a ni tofotofoga faa-le-agaga ma ni talanoaga faigatā i aiga, o lenei ua faatasi i la’ua i luga o le ala i Peteleema, ma sauniuni ai mo le fanau mai o le pepe fou a o taumafai lava e faamaoni i le tulafono ma le fetausia’i o le tasi i le tasi. E leai so’u masalosalo o le malaga i “luga o le ala i Peteleema” na matuā malosi ai lo la’ua mafutaga ma le avea ai ma se ulugalii.

**Tatalo:** Le Atua o mafutaga, matou te faafetau ona o mafutaga eseese ua lagolagoina ai i matou a’o matou taumafai i le ola faa-le ulugalii, **Amene.**

**Aso Tofi – Tesema 21: “O lalolagi eseese”** (*Different worlds*)  
**Tusi Faitau – Efeso 6:1-9**

**Matua – f. 9:** *“O outou alii foi, ia outou faia ia lava mea ia i latou. Ina tuu ia le faamatau, ina ua outou iloa o loo i le lagi lē ua fai ma o latou Alii atoa ma outou, e le faailogaina foi se tasi e ia.”*

E faigata ona faitauina lenei fuaiupu e aunoa ma le taia i le gagana o loo talanoa mai ‘alii ma pologa’. O faatonuga nei a Paulo e tatau ona malamalama

i totonu o le konitikesi (*context*); o pologa sa taatele i le lalolagi a Paulo ma sa ia lisi ai o ‘faatonuga mo tagata o le aiga’—avā, tane, ma fanau—o lo’o taumafai le Aposetolo e fa’amalosia sootaga sa’o i le va o ‘alii ma pologa’ i se taumafaiga e aofia ai tagata uma i totonu o le fale.

Ou te masalo o loo taumafai Paulo e galue i totonu o tapulaa o lona lalolagi. O lo’o ia vala’au mo so’otaga ma mafutaga sa’o i le va o tagata uma—poo le a lava lona tulaga i totonu o nuu ma faapotopotoga. Atonu sa tatau ona ta’u mai e Paulo le leaga o le nofo pologa, ma e moni o loo tatou ola nei i se lalolagi ua avea ai le pologa i ona uiga inosia uma ma ua lu’iina ma tafi’esea. Ae, o loo tumau pea se fesili—o le se tāua o lena mea mo i tatou?

O lo’o fa’apologaina pea tagata i lo tatou lalolagi, ae o le tele o taimi tatou te lē va’aia pe fa’alogo ai foi. Ua o’o i le taimi e sui ai lenei mea, ma e tatau ona fa’aalia le moni o le pologa i le taimi nei.

**Tatalo:** Le Atua e, matou te tatalo mo le faasa’olotoina o lau fanau i soo se tulimanu o lenei lalolagi ma ona uiga eseese, **Amene.**

**Aso Faraile – Tesema 22: “Agai atu i taua?”** (*Going into battle?*)

**Tusi Faitau – Efeso 6:10-17**

**Matua – f. 13:** “*O le mea lea ia outou tago ai i ofutau atoatoa mai le Atua, ina ia outou mafaia ona tutu ma tetee atu pe a oo i le aso vale, pe a uma foi ona outou faia o mea uma, tou te tutumau ai lava.*”

O le ata manino o lenei fuaiupu ua fai ma matua o le aso, o le ata o se fitafita e alu i le taua, o loo faaaaupegaina i latou ma sauni e tau faasaga i le leaga. O se ata mamana ua faailoa mai ai le tele o le gagana sa tatou faaaogaina i le ekalesia Kerisiano i le tele o seneturi. Ae o le a se mea tatou te faia pe afai o ata o taua e lē logo malie lelei i le faalogo, pe lē talafeagai foi i le taimi nei? E faapefea ona tatou malamalama i faatusa ma le talaaga na tusia ai lenei tusi? E mafai faapefea ona tatou maua pea se upu faalā’ei’au mai nei fuaiupu a o taumafai e see ese mai le manatu o le auai i se ‘taua paia’?

E iai le aogā o le vaai tonu i faatonuga autū o loo avatu e Paulo ia Efeso. Ia faamaoni! Ia sa’o ma le Atua! Ia saunia e faasoa atu le talalelei o le filemu! Taofi mau lou faatuatua i lou ulu ma lou loto! Ia faatāua le Tusi Paia ma ia mataala i mea o loo fai mai ai i ona itulau!

E le o le ta’u faatauvaaina le manaomia o le galulue e tetee atu i le leaga; ia tatalo i tulaga uma, ma ia talitonu ma le naunautai i le faamasinoga tonu; o le amiotonu, ma le mana o le alofa o le Atua ia Keriso e ala i le Agaga Paia.

**Tatalo:** Le Atua e, fesoasoani mai ina ia ou maua se toafilemu o lenei aso. Fesoasoani ia ou faasoa lou alofa i le aso nei ma aso uma o lo’u ola, **Amene.**

**Aso Toona’i – Tesema 23: “Lē fefe”** (*Being fearless*)

**Tusi Faitau – Efeso 6:18-24**

**Matua – f. 19:** “*Mo a’u foi, ina ia tuuina mai le upu ia te a’u, ina ia ou faamalosi ona tautala atu ma faailoa atu le mea lilo a le tala lelei.*”



O Tesema o se vaitau o le faimeaalofa ma fa'afeiloa'iga fiafia. O nisi tagata e fiafia e tusitusi a latou tusi Kerisimasi ma faamatala ai talafou o le olaga ma mea sa tutupu i le tausaga ua tuana'i. O le faitauga o lenei aso, o loo faasolo ona tusi faamavae Paulo i lana tusi ia Efeso. E talitonu nisi o faife'au e faapea, o le tusi o Efeso e avea ma se 'tusi talafe'au' e fepāsia'i solo i ekalesia eseese e aofia ai fo'i ma i latou i Efeso. I lenei tusi o loo i ai le tele o manatu tetele i a'oa'oga a Paulo aemaise lava le taula'i atu i le lotogatasi.

O le mea ou te fiafia ai i upu faai'u a Paulo, o lana faalā'ei'auga aogā ina ia tatou "faaauau pea". E i ai le tautinoga i le tatalo ma se lagona manino e manao ai Paulo ina ia tatou lototele ma ia lē fefefe i le faasoaina atu o le savali o le talalelei, e ui lava o loo iai o ia i le falepuipui i le taimi nei.

Ua tautala Paulo e uiga i le faailoa atu o le mealilo o le talalelei. A o tatou iai i lenei vaitau o le tausaga, ua fautuaina i tatou e toe tepa a'e i tua ma mafaufau loloto i le mealilo ma le mana o le liutino tagata sa limata'ita'ia ai lo tatou folauga i le na tausaga ua mou malie atu. Faafetai mo le faamaoni o Paulo—ma ia faafetai foi mo lenei vaitau o fiafiaga ma le faamanuia.

**Tatalo:** Faafetai le Atua i lou mana musumusuina ma le tele o ala eseese ua faasoa mai ai lou alofa ma lou faalaeiau i le tele o taimi faigata, **Amene.**

## KERISIMASI MA IOANE – CHRISTMAS WITH JOHN

**Aso Sā – Tesema 24: "Sa i le amataga le Upu"**

**Tusi Faitau – Ioane 1:1-9** (*In the beginning was the Word*)

**Matua – f. 1:** "*Sa i le amataga le Upu, sa i le Atua le Upu, o le Atua foi le Upu.*"

O le Evagelia a Mataio sa tusia lava mo tagata Iutaia. Na amata e Mataio lana tusi e ala i le tatalaina o le gafa o Iesu iā Tavita ma toe foi atu ai iā Aperaamo. E mafua lea tulaga auā na faamamafa e Mataio le avea o Iesu ma Tupu faapei o Tavita, ma le faataunuaina o le feagaiga faa-Aperaamo—e manuia foi nuu uma ia te oe! O le Evagelia a Luka sa tusia mo tagata Roma. Faapei o Mataio na amata ai i le gafa o Iesu, o Luka ua tatala atili atu i tua lona silafia o le gafa o Iesu. O le tala a Luka, o le gafa o Iesu e amata mai ia Atamu, o ia o le gafa o tagata uma o le lalolagi, ma ua sau foi o ia e faapei o se 'Atamu lona lua' (*second Adam*).

O le Evagelia a Ioane na tusitusia mo tagata uma. Faapei o Mataio ma Luka, na amata foi le tusi a Ioane i le gafa o Iesu. Peita'i ane, o le vaai a Ioane i le gafa o Iesu sa mamao lava nai lo Mataio ma Luka. O le tala a Ioane, o le gafa a Iesu e amata mai lava i le foafoaga (*creation*). Sa le'i tāua tele ia Ioane o tuaa-tagata a Iesu; ae na ia fia faamatala mai pe faape'i Iesu (*his likeness*). Ma o lea ua filifili ai Ioane e faamatala Iesu o le "Upu" – *Logos* i le gagana Eleni. A su'esu'eina le upu *Logos*, e mafai ona faaliliuina o le "Upu", "fuaiupu", "fe'au", "talanoaga", ma isi uiga taututusa. O se upu e aofia ai le *fesootaiga* (*communication*). O lea la, i le faamatalaina o Iesu o *Logos* poo le Upu, ua faailoa mai e Ioane ina ia tatou faalogo: E iai le mea o loo fetalai mai ai le Atua.

O lenei, e le’o auina mai e le Atua se feau i luga o ni papa maa, e pei ona ia faia i poloaiga e sefulu. O lenei, ua sau lava Ia. O lenei, ua sau o Ia e fai ma fe’au ma valaaulina i tatou ma ia.

O taeao o le Aso Kerisimasi, *Emanuelu!* “ua ia te i tatou le Atua!”

**Tatalo:** Iesu e, tatala la matou faalogo e lagona ai le Upu o le Atua ua liu tino tagata. **Amene.**

**Aso Gafua – Tesema 25: “Ua afio mai le Malamalama i le lalolagi”**

**Tusi Faitau – Ioane 3:16-21** (*Light has come into the world*)

**Matua – f. 17:** “*Auā e lei auina mai e le Atua lona Atalii i le lalolagi ina ia faamasino i le lalolagi, a ia faaolaina le lalolagi ia te ia.*”

Manuia le Kerisimasi! E tasi le mea ou te fiafia iai e uiga ia Iesu ma lona malamalama ma lana upumoni, e avanoa lava e le gata ia’i tatou ua iai i lona aiga, ae mo tagata uma. O lona uiga o la’u faafeiloaiga Kerisimasi e le na o ni upu manaia, a o le “Upu” e manaomia ai ona tatou filifili.

A susulu atu lona malamalama i le pogisa ma le momomo (*brokenness*), e tofu i tatou uma ma le filifiliga e fai. E mafai ona tatou solomuli i le pogisa e etoeto ai o tatou manu’a ma lalafi ai; e mafai foi ona tatou filifili e tuu atu i le malamalama mea leaga uma ma amata ai le faamalologa. O le solomuli i le pogisa atonu o lo tatou filifiliga muamua lea—tatou te lē fiafia lava e faailoa o tatou momomo ona o le maasiasi. A o le maasiasi e mafai ona ta’i sesē atili ai i tatou i le pogisa, ma atili ai ona tatou lalafi i le pouliuli. Ae peita’i, afai tatou te faamalosi e faasusulu atu le malamalama i lo tatou pogisa, afai tatou te lototetele e ioe faatasi ma Iesu a o ia ta’u mai le mea moni e uiga i lo tatou momomo, e mafai ona faaolaina ma faamaloloina i tatou.

O le tu’uina atu o le malamalama e fa’aalia ai o tatou tagata lilo ua se mea e taufaamata’u tele, ae peita’i o le malamalama o Iesu e lē fa’amaasiasi tagata, pe fa’asalaina ai foi se tasi. Na te le sau e faailoa o tatou leaga ma nofoaga uma e tatau ai ona faia filifiliga lelei, ona tuulafoa’i ai i tatou i lena nofoaga tu’imomoia. E leai, ua ia faasusulu mai lona malamalama ina ia mafai ai ona faasaoina moni i tatou mai le pogisa. O Ia o le malamalama ma le faamaoni, ina ia mafai ona avea o ia ma o tatou Faaola ma faamalologa.

**Tatalo:** Iesu e, faafetai i le aumaia o lou malamalama i le lalolagi. Fesoasoani ia faamalalamalama le mea moni i o matou tagata pogisa, **Amene.**

**Aso Lua – Tesema 26: “Ua liu tino tagata le Upu”** (*The Word became flesh*)

**Tusi Faitau – Ioane 1:10-14**

**Matua – f. 14:** “*Ua liu tino tagata le Upu, sa mau foi o ia ma i tatou, na matou matamata i lona mamalu; o le mamalu lava lea o le Alo e toatasi o le Tamā, ua tumu o ia i le alofa tunoa ma le faamaoni.*”

E ui lava ua leva ona sa’ili tagata mo le Mesia taunuu mai, ae latou te le’i iloina ua oo ina afio mai o ia. Latou te le’i iloa le puna o le ola uma, o le na faia ai i tatou uma. Aisea? Talu ai e lē tutusa Iesu ma le mea na latou faatalitali iai; auā, ua lē taulau le tagata e fai ma soo o le Atua. Atonu na latou faatalitali i

se tupu? Atonu o se tasi ua sau ma le mana e faaalua atu lona malosi? Masalo na latou manatu o ia e sau ma le pule e pulea ai a latou nuu ma faiga malo?

Peita'i ane, ua faamanatu mai e Ioane o Iesu o le Atua ua filifili e tuua le lagi ma ona mamalu uma. E le'i sau o ia e faamalosi se mea ia'i tatou, ma e le'i sau foi o ia ma le sauā e faatūina ai o ia lava ma se Alii. Leai, ua afio mai Iesu o se pepe meamea, ma faaaauu pea ona ola i lana savali o le alofa i le mafutaga ma i tatou; auā o le uiga lena o le alofa moni. E faapena le Atua. O Iesu e le'o se tagata fia pule, ma e na te lē faamalosi foi lona ala. E na te lē finau e avea ma pule pe fia faaalua foi lona malosi. E leai, na sau o ia e fai ma o tatou tua'oi; faatu lona fale ie faapei o i tatou; ma ia avea foi o ia ma o tatou tua'oi, ma uo a tamaiti. E le'i iloa Iesu e le lalolagi auā e matuā ese lava le mea na tatou mafaufauina e faatusa iai le Atua

Ua ta'u mai e Mataio ma Luka iā i tatou o Iesu o le Tupu, o ia o le faamanuiaga mo tagata uma, ma o ia o le Alo o le Atua. A o Ioane ua alu mamao lava i tua—o Iesu o le fe'au o le alofa ua siitia mai i lo tatou nofoaga e fa'aali mai se auala sili atu e ola ai: o ala o le alofa.

**Tatalo:** Iesu e, fesoasoani e faailoa mai ia te i matou lou tagata moni ma ia matou mulimuli ai i ou ala o le alofa, **Amene.**

**Aso Lulu – Tesema 27: “O Lē ua filifilia e le Atua”** (*God's Chosen One*)

**Tusi Faitau – Ioane 1:29-34**

**Matua – f. 31:** *“Ou te lei iloa foi o ia; a e peitai ina ia faaalua o ia ia Isaraelu, o le mea lea na ou sau ai e papatiso i le vai.”*

O Ioane le Papatiso o se tagata ese. Na ia tuua lona nuu e nofo ai i le toafa, ma sa ia iloa foi, o ia na te saunia tagata mo le afio mai o le Mesia. Sa ia te ia lava ona soo, na ia valaau atu foi i tagata ina ia latou liliu ese mai le amioleaga ma ta'uta'u atu a latou agasala ina ia mafai ona faamagaloina. Sa ia papatisoina tagata, ma valaaulina i latou e ola i le amiotonu ma faasoa atu i ē matitiva. Na ia lu'iina le 'au failotu, ma o lea na ia tu ai i ona talitonuga ma iu ai ina vavae ese lona ulu. Ae ui i lea, i lana lava ta'utinoga, na ia lē iloina o Iesu o le Mesia i le taimi muamua. Atonu na te le'i manatu o le a avea le Mesia ma ona tausoga. Atonu fo'i sa ia manatu o le Mesia e afio mai ma le mana e faasaolotoina ai faiga sauā sa ola ai tagata. Peita'i, na lava lona iloa o ala o le Atua, ma ina ua ia faalogo o faasino mai e le Atua Iesu “O Lē ua Filifilia e le Atua”, na ia faatuatuaina ai o le upu moni lea.

**Tatalo:** Iesu e, fesoasoani mai ina ia ou iloa oe i taimi uma ma aso uma, **Amene.**

**Aso Tofi – Tesema 28: “O le Alo o le Atua”** (*The Son of God*)

**Tusi Faitau – Ioane 1:43-51**

**Matua – f. 49:** *“Ona tai mai lea o Natanielu, ‘Rapi e, o oe lava o le Alo o le Atua, o oe lava le Tupu o Isaraelu.’”*

E pei ona tatou vaai i ai i aso ua mavae, o loo faamamafa e Mataio ma Luka le gafa tau tagata o Iesu. Ua latou faailoa mai o Iesu o le Tupu, ma o ia o le Alo

o le Atua. Ma sa faagaetia nisi o le au soo ina ua sau le tagata faaaloaloga o Nikotemo e feiloai ma Iesu, a o mananao ai foi o Iakopo ma Ioane e nonofo i le itu taumatau ma lona itu tauagavale o lona malo. Ma ina ua faia e Natanielu lana tautinoga, ma siitia ai le tulaga o Iesu i luga. O le tulaga taualoga o le tagata e foliga mai o se mea tāua tele. Ma e faapena foi i nei ona po ma lalolagi ua tatou i ai nei. O le tulaga taualoga e siitia ai i tatou i totonu o faapotopotoga ma totonu o nuu.

A o Iesu, e pei ona faailoa mai e Ioane, e lē popole o ia i na mea. O le mea tāua e le’o lona malosia, poo le mafai foi ona faato’ilaloina le Emepaea o Roma i sona malosia. ‘O le sili atu i nei mea’, na fetalai ai Iesu, e lē o tulaga taualoga ma le mauululuga, a o se ata o agelu o ō a’e ma ifoifo i ona luga. E le’o le tulaga tau-tagata le mea sili, a o le itu tagata faalotoifale o Iesu: o le na te aumaia le lagi i le lalolagi, ma le lalolagi i le lagi, o le na te faia se ala mo i tatou.

**Tatalo:** Iesu e, o oe o le Tupu. Ae matou te fia iloga poo ai tonu lou tagata faalotoifale—sili atu nai lo le tulaga tau-tagata. Faailoa mai ia te a’u, **Amene.**

### **Aso Faraile – Tesema 29: “O le malamalama o le lalolagi”**

**Tusi Faitau – Ioane 8:12-19** (*The light of the world*)

**Matua – f. 12:** “*Ona toe fetalai atu lea o Iesu ia te i latou, ‘O a’u nei o le malamalama o le lalolagi; o lē mulimuli mai ia te a’u, e le savali o ia i le pouliuli, a e ia te ia le malamalama o le ola.’”*

I ni nai aso oi luma, o le a tatou faamanatuina ai le Epifania ma manatua le ala na mulimuli ai le au makoi i le fetu pupula e sue Iesu. E ui o nei ona aso tatou te le saili se fetu mo le taitaiga. O le mea moni, a tatou saili e mulimuli i le malamalama, o le a taitai atu i tatou ia Iesu. Ia Iesu o lē e finagalo e faailoa mai se ala fou e ola ai. E le’o le pogisa a’o lona malamalama.

E pei ona matou fai atu i le Aso Gafua, o se tasi o fa’amoemoega o le malamalama, o le fa’aalia lea o mea ua faamomomoina, ina ia mafai ona faamalalamaina ma fa’amalolo ai - o se mea lelei lea mea, e tusa lava pe le fiafia iai, pe tiga foi. Ae le na o le susulu atu o le malamalama i le pogisa o le tuimomoia. E aumaia foi e le malamalama le manino i mea sa fememeai ma fenumiai ai, e mafai ai ona tatou iloga le mea moni. E avea i tatou mai le taufetuli solo i le pogisa, i le mafai ai ona vaai malamalama i le matagofie o le ola. E fesoasoani tatou te maua ai se auala pe a tatou se. O lona malamalama e aumaia ai le ola i lona atoatoaga. E aveesea ai i tatou mai lo tatou faaletonu ma fesoasoani tatou te iloga ai le mea e sili ona taua. E ave ai i tatou mai se tulaga o le moe i le ala ma mataala. E susunuina ai o tatou loto mo ia, ma mafai ai ona tatou olioli i le olaga e pei ona tatau ona olioli ai.

**Tatalo:** Iesu e, faafetai i le susulu mai o lou malamalama. Faaali mai lou matagofie ma le upu moni. Fafagu maia lou nei ola ia te oe, **Amene.**

### **Aso Toonai – Tese. 30: “O le ola e ala mai i le Atalii”** (*Life through the Son*)

**Tusi Faitau – Ioane 5:16-27**

**Matua – f. 24:** *“E moni, e moni, ou te fai atu ia te outou, o lē faalogo mai i la’u upu, ma talitonu ia te ia na na auina mai a’u, ua ia te ia le ola faavavau; e le oo foi o ia i le faamasinoga, a ua oo atu o ia i le ola, sa i le oti.”*

O le ‘au Faresaio o tagata na faaalu le tele o tausaga o lo latou olaga i le taumafai e ola e tusa ai ma le tulafono a le Atua. O i latou o ‘tagata lelei’ ma sa latou manatu ua latou iloa ma malamalama i le Atua. Sa latou faaalua le tele o le taimi e suesue ai le tulafono, ma maua ai le tele o faauigaga ma tusi-tusiga lelei, ae ua le mafai lava ona mulimuli atoatoa iai. O le latou faia ai o lea mea, ua latou motusia ai le Atua mai le tulafono, ma ua avea ai le tulafono ma o latou atua. Ma o lo latou ‘atua’ o se faamasino sauā, e sili atu ona naunau i tulafono nai lo tagata, o se ‘atua’ e leai sona alofa ma se agaalofoa.

Ua matuā sa’ili Iesu e faasusulu atu le malamalama i lo latou malamalama ua faamalumalu i le faafiaamionotonu. Na ia ta’u atu ia i latou, ua faausese mea uma! Na te faia vavega i le Sapati, ma fesili atu ia te i latou, pe faapefea ona ia faia se’i vaganā ua finagalo malie le Atua? Pe sa latou le’i iloina ea le galuega a le Atua, ona sa faia i se aso sesē o le vaiaso? Na faapefea ona latou naunau i le auiliiliga o le tulafono, ma ua le mafai ai ona latou iloina le Agaga o loo i tua o le tulafono?

Ona atili fai atu ai lea o Iesu ma faapea atu, o se tasi e iloa le Atua ia Iesu e le faamasinoina o ia ae maua le ola e faavavau. O le Atua e le tulafono ia. O le tulafono na fuafua e faasino mai le Atua, ae e le o le Atua ia.

E faigofie ona tatou maofa i le au Faresaio, a o se fesili e mafaufau atili ai, pe le Faresaio ea i tatou i nisi taimi? O la tatou faauigaga faaletulafono o tusitusiga paia, o tulafono tatou te fatuina, o tu ma aga e le mafai ona tatou suia. O tagata e tumau pea e lei faamaloloina, le faoloina, le alofaina ona ua tatou toe faia le Atua i lo tatou faatusa.

**Tatalo:** Iesu e, faafetai ona o lau faaali mai o le Atua moni ae le o le tulafono. Ia matou iloa le tāua o le tulafono, ae le o le faia lea ma atua **Amene.**

**Aso Sā – Tesema 31: “O le ala ma le upu moni ma le ola”**

**Tusi Faitau – Ioane 14:6-14** *(The way and the truth and the life)*

**Matua – f. 7:** *“Ana iloa e outou o a’u, po ua iloa foi e outou lo’u Tamā; e amata nei foi ona iloa o ia e outou; tou te vaai foi ia te ia.”*

Na maua e le Tulafono ma Perofeta lo latou faataunuaina ia Iesu; na iu ina latou faasino atu ia te ia ma ta’u atu poo ai o ia. Ma ua faasino mai e Iesu i tatou i le Tama; o ia o le faaaliga atoatoa a le Atua. E pei ona ta’ua e Paulo, o mea uma muamua o ni fa’ailoga ata lafoia, ae o lea ua fa’amalamalamaina le mea sa le manino.

E le mafai ona e iloa le Atua e aunoa ma le iloina o Iesu. Ua faaalua atoatoa le Atua ia Iesu. Sa i ai pea le Atua ma o le a pei lava o Iesu. Ua faailoa mai e Ioane ia i tatou, e le popole Iesu i tulaga poo le tusi o le tulafono. Na te le’i sau e faato’ilalo se emepaea, pe faia se faiga faapolokiki. E le’i sau o Ia e faamalosia i tatou e sui, pe pulea i tatou. Ma o le mea moni, o loo faapea mai Ioane e faapena foi le Atua. Pe ana faapea e lē o Iesu le Mesia na faatalitalia e le ‘au

Faresaio, o le a se faate'iga tele i le faailoa mai e Ioane mo latou, ma tatou foi, e ese le Atua mai le mean o loo tatou manatu iai ia te ia.

O lea ia, e faape'i Iesu, e faape'i le Atua? O Iesu o le ala, o le upu moni ma le ola. O ia lea ua avea e pei o i tatou, ma ua fai lava ma o tatou tua'oi. O ia lea ua afio mai e fai ma fe'au, ma e valaaulia i tatou e talanoa ma ia. O ia o le malamalama o le lalolagi, ua afio mai e faaola ma faamalolo. Ua afio mai o ia e faaali mai le matagofie ma le upumoni, ma ua sau foi e faaali mai se auala ese e ola ai. O se auala e agalelei ma agamalu, e onosai ma alofa. Ma ua ia valaaulia i tatou e savavali faatasi ma ia, ma talanoa atu ia te ia e uiga i mea uma, ma ia ola e pei o loo soifua o ia, ma ia matuā faatofuina i lona alofa.

**Tatalo:** Faafetai Iesu i lou faaali mai ia te matou poo ai tonu le Atua,  
**Amene.**